


المسرحية

العدد الثاني عشر - تصدر عن مجلة المسرح

قهوة املوك

تأليف : لطيفة الخولي



العدد ٣ قروش

Sp.

892

K4

a

وزارة الثقافة

مؤسسة فنون المسرح والموسيقى

مسرح الحكيم

□ ————— □

المسرحية ..

العسدد الثاني عشر

تصدر عن مجلة المسرح

رئيس التحرير
رشاد رشدي

سكرتير التحرير
فاروق عبدالوهاب

□ ————— □

المقالات والرسومات
مصطفى حسين

□ ————— □

المشرف الفني
جمال عزام

قهوة الملوك

تأليف : لطفي الخولي

كلمة

بات من تقاليدنا أن ندق الطبول على الصفحات الأولى لكل عمل أدبي يصدر .
أما في صورة مقدمة من الكاتب الخالق أو تعليق ناقد .
وفي رأيي أن هذا التقليد يتعارض مع طبيعة العمل الأدبي . فهذا العمل ليس
« نصا قانونيا » لابد من أن يصاحب تشريعه مذكرة إيضاحية تفسره وتشرحه ، أو
« تحقيقا اجتماعيا » ينالزم فيه رصد الحقائق بالتعليقات المباشرة .

العمل الأدبي في حقيقته كائن حي . والكائن الحي في غير حاجة إلى مقدمات
تحلل وتشرح ، عند مواجهته للحياة . ومن هنا يجب أن يستقبله القراء كبا ولده
إبداع منتج عاريا من أردية التعليقات والمقدمات . أن حركته الذاتية في المجتمع
والتجاوب المتبادل بينه وبين الناس ، وبينه وبين ظروف عصره ، هي وحدها التي
تفصح عن لونه وتكشف مرامييه وأهدافه وتحدد وضعه وموقفه من الإنسان والحياة
والفن على السواء .

لهذا كله لن أسطر مقدمة لهذا العمل . ولكن ما الذي أفعله الآن ؟ أليس مقدمة ؟ !
لا . ليس مقدمة . إنه مجرد « فهرس » للعمل . وإن كان من نوع آخر غير فهرس
أرقام الصفحات الذي درجنا عليه .

أن هذا الكتاب لا يضم عملا منفردا ، بل عملين اثنين يعالجان موضوعا واحدا .
أحدهما في صورة قصة قصيرة باسم « بدوى أفندي وشريكه » كتبها عام ١٩٥٦ .
والآخر في شكل مسرحية تحمل عنوان « قهوة الملوك » وهو نفس العنوان الذي يحمل
هذا الكتاب الذي أصدره اليوم من عام ١٩٥٨ .

ولست أدري - والحالة هذه - إذا كان من حقى أن أوصي القراء بقراءة
« بدوى أفندي وشريكه » قبل « قهوة الملوك » ، أم لا ؟ ! . فكل عمل منهما مستقل
تماما بذاته ، يتميز بابعاده ومقاييسه الفنية . بل وتطور مضبونه ونكهته الخاصة
أيضا .

مهما يكن من أمر فإن « بدوى أفندي وشريكه » كان - تاريخيا - شيئا من
التخطيط الأولى لقهوة الملوك . ثم نفذت إليه حركة الواقع ، وأجواء الحياة
وتطور الشخصيات خلال الصراع الإنساني .

والآن .. افعلوا ما يحلو لكم .

ل . خ

شخصيات سرية

شخصيات رئيسية :

بدوى أفندى : رجل فى الخامسة والثلاثين من عمره . عمله غامض ، الكل يعتقد أنه تاجر ، دون أن يعرف على وجه التحديد ماهية تجارته . يسكن بغرفة فوق فوق سطح المنزل المملوك للمعلم شهدة . بينه وبين أم خليل السلطنة بذات المنزل علاقة ود .

المعلم شهدة : ابن بلد يقترب من الحلقة الخامسة . صاحب مقهى الملوكة ويضعه منازل بالحي . يسكن أحد هذه المنازل كل من بدوى أفندى وأم خليل . يسعى الى كسب قلب أم خليل بكل وسيلة .

ناشد أفندى : موظف حكومى على المعاش . تخطى الخامسة والستين نشيط . صديق للمعلم شهدة . يهتم بمشاكل رابطة كونها مع بعض زملائه للدفاع عن حقوق أصحاب المعاشات ، يحشر أنفه فى كل شئ . ينافس بدوى أفندى حول كتابة العرائض لاهل الحى ونقابة العمال .

أم خليل : أرملة فى الثلاثين من عمرها . ترمى طفلها خليل بالعمل حائكة للثياب . تسكن بمنزل المعلم شهدة . تواجه للمقهى .

مسيد : صبي مقهى الملوك . في الثلاثين من عمره . صديق
حميم لبدوى أفندى .

عم موسى : رجل معمم في حوالى الأربعين من عمره . يحاول
دائما التحدث باللغة العربية الفصحى . اتصل
ببدوى أفندى خلال العمل وصار شريكه .

الريس خفي : رئيس نقابة عمال مصنع افتتح حديثا بالحى .
محبوب من العمال . سنه تقارب سن بدوى
أفندى .

الشاويش عفيفى : مخبر لدى البوليس السرى .

الإستاذ سليم : محام شاب .

شخصيات ثانوية :

خليل : نجل أم خليل . طفل في التاسعة من عمره . طالب
بالمدرسة الابتدائية .

مهندس البلدية .

حماة المعلم شهدة .

بائع السجائر الملاصق محله للمقهى . يمتاز بجنته الضخمة .

بائع الطماطم ومجموعة من البائعين الجائلين .


مجموعة من العمال وموظفى المعاش ورواد المقهى .

مجموعة من نساء الحى .

مجموعة من المعزين فى ماتم .

مجموعة من جنود البوليس .

الفصل الأول



الزمان — الساعة التاسعة من صباح يوم من أيام الخريف عام ١٩٤٦ .

المكان — حارة صغيرة من حواري القاهرة الشعبية بحى عابدين .
ضيقة غير منتظمة الجانبين . تزدهم رويدا رويدا بالمارة الذين يغلب عليهم الفقر ، سواء كانوا بالملابس البلدية أو الافرنجية . يلحظ بينهم كثير من العمال بأرديتهم الزرقاء يسبزون بخطوات سريعة ، في حين تتهاذى في شيء من الدلال النساء اللاتي لففن أجسادهن بالملاميز السوداء .

يحتل الركن الايمن من الحارة مقهى بلديا . على واجهته لافتة كتب عليها « قهوة الملوك » . تتصدرة منصة من رخام صفت عليها وعلى الارفف الخشنة بالحجار الخلقى المواجه للجهنم أو أن مختلفة للشاي والقهوة والشيشة والجوزة الخ . . تتخاطفها يدا القهوجى بسرعة خيرة لأعداد طلبات الزبائن .

وفي ساحة المقهى الداخلية ، وعلى رصيف الحارة انتشرت المتناضد والمقاعد ، يشغل الزبائن بعضها وقد راحوا يجذبون الشيشة والجوزة بطريقة جماعية في الغالب . يثرثرون . . يرتشفون بصوت مسموع المشاي والقهوة ومشروبات أخرى . يغدو بينهم في حركة متصلة وصراخ مستمر « سيد » صبي المقهى مرتديا جلبابا وفوقه مريسة بيضاء بالية بعض الشيء . تظهر عليها بقع مختلفة ، وعند الوسط جب كبير متصل بداخله التقود عند الحركة . على رأسه طاقية سوداء بأزار ابيض ، وعلى ذراعه اليمنى فوطه .

بجانب المقهى محل صغير لبيع السجائر . انحشر به صاحبه بحيث لا يرى وان كانت ذراعه تظهران من وقت لآخر وتشبان بضخامة جثة صاحبهما بغالبه التعاس فيصدر عنه شخير حاد .

وعلى الجانب الاخر من الحارة صف غير مهندس من البيوت الشعبية الضيقة الحجم ذات الطابع القديم . وان تخلقه سمات من الطابع

الجديد ، فالقوافض الحديثة بجانب المشربيات بجانب المشرفات التي تتدلى من بعضها قطع من الفسيل . تبين من أن لآخر وجوه بعض النسوة من القوافض والمشرفات يختبرن بأيديهن مدى ما وصل اليه الفسيل من جفاف ، ويتبادلان التحيات في ود وبساطة . وعلى مرمى البصر يبدو شاهما متناقرا قصر عابدين الملكي .

من حين نغير الحارة عربية يدفعها بائع متجول ينادى على بضاعته بصوت منغم . بعض القوافض تفتتح عن نسوة تشبكن مع البائعين في مساومات حول الاسعار .

المعلم شهدة صاحب المقهى ممتلىء الجسم يعاوه وجه متنفخ ذات فيه القسيمات . يرتدى الملابس البلدية . يحرك بين أصابعه حبات مسبحة صفراء ويلعب باصبع البنصر من يده اليسرى — التي يحركها دائما في وجوه محدثيه — خاتم ذهبي كبير نوعا ما . يهيم بالجلوس الى مضدة على عتبة المقهى وهو يفرك يديه بنشاط . المعلم شهدة : الله يا كريم !

(يبدو مقيلا ناشد أفندى بخطوات منتظمة وان شاربها عرج خفيف نحيف الجسد . ذو ملامح حادة رغم جلام وجهه المكرمش . يضع عند منتصف أفقه نظارة مذهبة . مسبب شعر الرأس الذى يبين لامعا على جانبيه الطربوشى الاحمر الفاقع القصير . يرتدى الملابس الافرنجية بعتابة ملحوظة ، وان كان واضحا أنها ليست من طراز العصر . تطل من عروة الجلكنة وردة حمراء . يعلق بجيب جاكته العلوى خمبسة افلام مختلفة الالوان والاحجام . ويحتفظ تحت ابطه ببعض الاوراق والصحف ، يلحجه المعلم شهدة مقيلا فينهال وجهه ويفتل شاربته وهو يواصل كلامه) .

المعلم شهدة : اهلا . اهلا . اشرفت الانوار يا ناشد أفندى . والله ولا ساعة الملك (ينظر الى سباعته الذهبية التي يخرجها من جيبه) تسعة . . تسعة بالدقيقة . (ناشد أفندى يصل الى مكان المعلم شهدة . يمد الاخر يده ليصافحه . لكن ناشد أفندى يمتنع وهو يحرك يده اليمنى متالما . يجلس ببطء على المقعد الذى يقدمه له المعلم شهدة . سيد صبى المقهى يقترب منهما بناء على اشارة من المعلم شهدة وينادى بصوت ممطوط) .

: عندك واحد على الريحه . وشيشة عجمى للمعلم

سيد

أحد الزبائن : والشاى يا سيد ، يعنى نفعك سنة علشان بقا شاى .

سيد : (مقاطعا وبذات الصوت الممطوط) والشاى المخصوص استعجله .

(ناشد أفندى يخلع طربوشه بحرص ويضعه مع الأوراق على كرسى بجانبه فى حين ينقل المعلم شهادة نظراته بين ناشد أفندى وناقذة مغلقة فى البيت المقابل . يظهر فى الحارة بائع صحف) .

بائع الصحف : الأهرام الاثنين والدنيا .. المصرى . اقرا حادثة الخمار .. أخبار مظاهرة الاسماعيلية (يلقي بنظرة فاحصة داخل المقهى ويسال سيد) هو بدوى أفندى ما جاش ؟

سيد : (سيد يجيبه بالنفى بهزة من رأسه وهو يصيح بصوته الممطوط) واحد قديم . وادى اثنين كمان يبقوا ثلاثة جنزابل .

الرئيس حنفى : (مستكملا حديثا) والعمل يا استاذ ؟

الاستاذ سليم : ما هو أنا ما أقدرش اكتب لكم كل شىء .. محاضر منشورات فى كل وقت . خطر يا حنفى خطر . أنا مقروض محامى النقابة ويس . وانت عارف اليومين دول الواحد لازم يحتاط . احسن خسايرنا كتبت . خصوصا بعد مظاهرة امبارح ..

الرئيس حنفى : عندك حق . لكن نعمل ايه فى حالتنا . ده اللى ظروفه كويسه من العمل يا دوب يسرق يفك الخط .

الاستاذ سليم : يا أخى اتعلموا وعبروا عن نفيسكم بنفيسكم بالكتابة ، زى ما بتعبروا باللسان .

الرئيس حنفى : ما احنا بنتعلم فعلا يا استاذ سليم . لكن المسألة ، عايزة وقت ، وانت عارف اللجنة خلت نقابتنا مسئولية عن عمال المنطقة دى .. منطقة بسيلامته (يشير الى القصر الملكى) .

الاستاذ سليم : انت لموش كتبت لى مرة ان فيه راجل يقتول فيه

ساكن هنا في حثتكم بيقراً وينكتب كويس .
وحاتوظفوه سكرتير للنقابة يكتب لكم كل اللي انتم
عايزينه ؟

الرئيس حنفى : مضبوط . بدوى أفندى . ابن حلال مصفى . وقله
بيكتب الكلام زى الدوا تمام . وفيه كمان ناشد
أفندى (يشي ناحيته) ريقه بيجرى على الشغله .
راجل طيب برضه ، بس كتابته بصراحة توخم
الواحد وتخليه ينعس .

الاستاذ سليم : ظيب ومستنيين أية على بدوى أفندى ده ؟
الرئيس حنفى : عدم المؤاخذة . الفار بيلعب في عبه حبتين . وأصله
موش عارف بيتاجر في ايه . أهو أنا مستنيه لما

ينزل أكله تانى . هى الساعة بقت كام دلوقت ؟
الاستاذ سليم : ياه . الساعة قربت على عاشرة . أنا أتأخرت على
الحكمة المهم بقا انكم تحضروا كل المستندات اللي
قلت لك عليها واذا خلصت الجلسة بدرى ارجعك
قبل الظهر .. والا بقى يا عم تجيبوهاالى المكتب
قبل الساعة ستة أحسن نازل أعزى بعد كده .
الرئيس حنفى : اتفقنا أما أقوم معاك أنا كمان .. عشان الحق
اخلىص وأكون في القهوة قبل الظهر .

سيد : (يلوح الرئيس حنفى والاستاذ سليم ناهضين)
الله . على فين يا رئيس حنفى . بدوى أفندى
زمانه جاى . ده عمره ما اتأخر كده . موش تستنى
لما الاستاذ يشوفه يمكن يقدر يقنعه بكلامه الحلو .
الرئيس حنفى : أنا واصل المصنع وجاى تانى . أصلى اتأخرت
خالص . والاستاذ وراه شغل .

بائع الصحف : (ماضيا داخل الحارة حتى يحنفى) الاهرام اتناشر
صفحة . مظاهرة الاسماعيلية . المصرى والانتين
والدنيا . حادثة الخمارة بالصور أهرام .
ومصرى .

ناشد أفندى : ده الرئيس حنفى ماشى أهو . ما كنا كلمناه يا معلم
عن الشغلة .

المعلم شهده : كلمته . كلمته يا ناشد أفندى . وحياتول لنا بعد
يومين .

ناشد أفندى : يومين ! طيب .
(تسمع أصوات نداءات بانح الصحف عن حادثة
الخمارة) .

ناشد أفندى : شفت حكاية الخمارة دى يا مسلم . تصدق بالرب .
الاخلاق خلاص انعدمت من البلد . تصور أربع
أولاد صغيرين ما بين سبعتاشر وتسعتاشر سنة
يهجموا على خمارة بالسيدات يقتلوا فى الناس
ويسرقوا الفلوس فى عز النهار والشمس طالعة
والخلق رايحه وجايه . آه يا ليدى (يقلب يده
اليمنى فى حرص مبالغ فيه) .

المعلم شهده : (يهز رأسه موافقا فى حرارة) السيميا ! وحياتك
انت ما فيه غيرها يا ناشد أفندى . السيميا هى
السبب . أقول لك حكاية .. الواد سمبسكة .
سامى .. ابنى من جماعة شبرا .

ناشد أفندى : (مقاطعا وهو يواصل تحريك يده اليمنى بآلم)
ماله ..

المعلم شهده : رحت لهم السبت اللى فات . حاكم أنا يا ناشد
أفندى راجل حقانى قوى . الجمعة والسبت والاحد
ونص الاثنين عند جماعة شبرا . وبقية الايام مع
جماعة بولاى آه .. حاكم أنا أحب أرضى الله فى
المسائل دى . تعرف ! لو خدت لواحد موز لازم
أجيب للثانية موز برضه من نفس الصنف . برتقان
بصرة .. برتقان بصرة .. موش بلدى . لا .
بصرة . آه . منديل بأويه . منديل بأويه . لبشة
قصب لبشة قصب (يخفت صوته ثم لا يلبث أن
يحتد) لكن ما فيش فائدة .. الغيرة يا ناشد
أفندى . الغيرة . تصدق بالله أنا ..

ناشد أفندى : (مقاطعا) ما قلت ليس . سامى ماله (يستمر
فى جرس يده اليمنى) .

المعلم شهده : سامى ! أه الواد سببسكة . يا دوب تسع سنين

(مفكرا) شوف على عزرائيل الفلوس ما يجى ..

ناشد أفندى : عزرائيل الفلوس !

المعلم شهده : مفتش الضرايب يعنى . على ما ييجى يحاسبنا ..

سين جيم سين جيم . يتم الواد تسع سنين . ما

اطولش عليك . يا سيدى السبت اللي فات .

شبرا يعنى . لقيت الواد رابط حبل فى عمود السرير

ومتشعلق فيه . وعمال يعوى زى الكلاب السعراة

قام يا ناشد أفندى آ .. آ .. آ .. آ ..

(المعلم شهده يرفع صوته بالاهات وهو يطوق

قمه براحتى يديه . رواد المقهى يهبون من أماكنهم

ينظرون فى حيرة وعجب الى المعلم . سيد بهرع اليه

مستسرا فى دهشة . بعض المارة يتوقفون

ويحلقون فى المعلم شهده) .

مسيد : فيه حاجة يا معلم . زغطه اجيب لك كباية ميه ؟

المعلم شهده : (غاضبا) زغطة ايه ياولد . جاك زغطة تتصفر شبتك

(متشيجا بذراعيه) عجائب والله على دى الخلق .

ايه ؟ اكونش بلياثشو . والا اراجوز قدامكم . ما

تتهوى منك له يا ولد .

(يفرق الناس باسمين . ناشد أفندى يحاول

جاهدا أن يخفى ضحكته لكنها لا تلبث أن تنطلق .

المعلم شهده ينظر اليه والى الناس حائرا ثم فجأة

تصدر عنه ضحكة باهتة ويتلوها بصليل من

الضحكات الرنانة فينبفجر الناس بالضحك وتفتح

التوافذ فيما عدا نافذة فى البيت المواجه للمقهى ..

وتبدو فيها وجوه نساء مستطلعات) .

أحدى النساء : يوه ! جرى ايه للرجالة يا أختى النهاردة ؟ !

(ترسل ضحكة خافتة تتبعها بأجرى مرتفعة . وعلى

الأثر تنهمر الضحكات النسائية من التوافذ ويفرق

المسرح فى موجات عارمة من ضحكات الرجال

والنساء المخلطة . يصوب المعلم شهده نظراته الى

النافذة المغلقة) .

المعلم شهده : وحدوه يا اخوان .. الله . ناشد أفندى انت موسى
ثايف حاجة كده ولا كده ورا الشباك ؟
(تتعثر الضحكات خلال التسابيح التي ارتفعت من
الناس ردا على نداء المعلم شهدة وتهمد شيئا
فشيئا) .

ناشد أفندى : صحيح البنى آدم منا ضعيف . ما يصدق يلاقى
حاجة . ويلزق فيها ويروح مقلدها . واحد ضحك .
هب الكل وراه زى الغنم . لكن ما قلنايش حصل
ايه لسمنكة ؟

المعلم شهده : (معتدلا يستكمل روايته وكان شيئا لم يحدث) آه .
قال ايه الواد بيقلد طرزان السيم . الله . ما أنا
شفتاه سوا لما رحنا السيم الاهلى الاسبوع اللي
قبل قبل قبل اللى فات ، الراجل العريان اللي
بيتنط من شجرة لشجرة زى القرد . والله واخف
من القرد يا ناشد أفندى .

ناشد أفندى : (بضيق) هيه . هيه
المعلم شهده : وعنها يا سبدي والواد سمبسكة يروح واقع على
الارض تنقص رجله .. عدوك امه صوتت ولت
علينا الدنيا . وخدته أنا وطيران على الجبراتي .
ناشد أفندى : (مقاطعا) تصدق بالرب يا معلم . ما فيه حد لازم
له الجبراتي غمري .

(ناشد أفندى يحرك يده اليمنى ببطء وحذر فتعلق
بها عينا المعلم شهدة الذي يتكلف الانزعاج) .
المعلم شهده : سلامتك يا ناشد أفندى . خير .

ناشد أفندى : تصدق بالرب يا معلم . ايدى اليمن من ليلة أمبارح
موش عارف أحرکها . اتجمدت . زى ما تقول
صوابها صدت . خلاص بقى .. الواحد عجز .
وعضاه تخشيت .

المعلم شهده : ما تقولش على روحك يا ناشد أفندى . تصدق
بالله . الشباب حايفط من عينيك ويخرق النضارة
ويرقص هنا على الترايزة . (يخط بكفه على سطح
المنضدة ثم يزغد ناشد أفندى في كتفه زغدة قوية



حتى يكاد يوقعه الى الارض) انت بس اللي بتتعب
روحك أكثر من اللزوم في حكاية الجمعية دي .
ونازل في كتابة المراض عريضة ورا عريضة
ما تقولش رجعت الحكومة تانى .

ناشد أفندى : (وهو ينظف زجاج نضارته) الحكومة ! تصدق
يالرب يا معلم أنا أيام الحكومة . هه الحكومة .
ما كنت أنهمد أبدا ولا ايدى تبطل كتابة حاكم أنا
زى ما انت عارف كنت ريس . ريس قلم الارشيف .
وتحتى بقى . يعنى تحت رياستى أنا يعنى . .
خمس موظفين . لكن أنا . . أنا بقى اللي كنت
أعمل كل الشغل . حاكم دي مسئولية يا معلم .
مسئولية مبرى والمسئولية المبرى تعجز البنى آدم
بسرعة . دي المرحومة مراتى . مقدسة مرتين . .
وحياتك . كانت تقول لى سنة الحكومة بخطف
خمس من عمرك ياسى ناشد .

(ناشد أفندى تصفيه الكحة)

المعلم شهده : يا ناشد أفندى . اسمعها نصيحة منى . ربح نفسك
وبلاش كتابة كل يوم . خلى واحد تانى يشيل عنك
شوية (يخفض من صوته وكأنه بوجه الحديث الى
نفسه مع التطلع الى النافذة المغلقة) يا ناس .
فيه حاجات بتلعب ورا الشباك .

**(سيد يحضر المشيشة الى المعلم شهده والقهوة الى
ناشد أفندى الذى يشرب بعض الماء ثم يسكب
بحرص نقطة منه في فنجان القهوة) .**

ناشد أفندى : أريح نفسى ازاي يا معلم . اهو أنت سيد العارفين
مين غيرى يكتب العرايض .

المعلم شهده : واحد من زملايك دول . محمد أفندى . نخلة
أفندى . . .

ناشد أفندى : (بسخرية) محمد أفندى . محمد أفندى القط .
اللى يا دوب يكتب سطر ومخه ينهج فى التانى .
والا يوسف أفندى نخله اللي كتابته نكش فراخ ما
تعرف منها السنين من اللام . من النون . تصدق

بالرب يا معلم لولا اليد دى (يرفع يده اليمنى)
الصواب دول ما كانت ولا عريضة تنكتب .
ما كانتش جمعية حضرات التابلة موظفى المعاش
اتوجدت . ولا قهوة الملوك شافت خلقهم .
المعلم شهده : (يبط رقبته فى استطلاع مشير الى النافذة المغلقة)
غريبة ا

ناشد أفندى : ولا غريبة ولا حاجة . دول كانوا موظفين بالاسم
فقط لا غير . لكن شغل ما فيش شغل . دا أنا
لما كنت فى الحكومة ريس قلم . كان عندى موظف
أقول لك ايه بس . بلاش كلام فى سيرة الناس .
احسن حرام . حاكم أنا زى ما انت عارف راجل
فى حالى . ما حبش لسلنى ينبش فى حال حد والا
محتد .

المعلم شهده : ونعم الاخلاق يا ناشد أفندى . تصدق بالله . أنا
(يبحلق فى النافذة المغلقة) أنا زيك تمام .
(يظهر فى الحارة بائع متجول يدفع عربة يد محملة
بثمار الطماطم ينادى على بضاعته بصوت منغم
رخيم . ناشد أفندى يشرع فى ترتيب وتصليح
أوراقه . المعلم شهده يشرد مفكرا وهو يتابع جذب
أنفاس الشيشة) .

البائع المتجول : يا احمر من خدود الحبايب يا قوطه .
(تفتح فجأة النافذة المغلقة ويطل منها وجه سيدة
شابة تعصب رأسها بهنديل فاقع اللون . تزين
جوانبه شوارب مختلفة الالوان . ويتدلى على
كتفها صغيرتان من الشعر الاسود الفاحم تضيفان
مزيذا من التالى للصدر الناصع الزجاج) .
المعلم شهده : (بصوت هزته المفاجأة وحبات المسبحة تتحرك بين
أصابعه فى مرج والابتسامة تفرش وجهه) سبحان
الله سبحان الله . الله جميل يحب الجمال .
سبحان الله . .

السيدة : (متعمدة تجاهل الجميع) ياعم يا بتاع التوطة .
ناشد أفندى : (رافعا رأسه تدريجيا عن الاوراق) أما أنا النهاردة

ناوى أكتب حقة دين التماس .. للوزير .. للوزير
رأساً (نأشد أفندي بلقت الى المعلم شهده فيصطدم
بنظراته الوالهة فيتابعها حتى السيدة التي تطل من
النافذة . يهز رأسه مرات ثم ينشغل فى الكتابة مرثلاً
ما يكتبه بصوت أخف) .

نأشد أفندي : يتشرف برفع هذا التماس الى .. الى عتبات
مغاليكم ..
السيدة : (بضيق مضطجع وصوت مرتفع) يا عم يا بتاع
القوطة .

المعلم شهده : سبحان الله .. سبحان الله ..
(البائع يتوقف عن السير ويركن عربته أمام باب
البيت المواجه للمقهى تماماً) .

البائع المتجول : نعم يا ست . صباحك قشطة ولين باذن الله .
المعلم شهده : (السيد) مات واحد شأى بالحليب أبو خير .
أشربه يا واد الهطه لهط . سبحان الله . سبحان
الله .

السيدة : (للبائع دون أن تعي المعلم شهده التفاتاً) عندك
قوطة صابحة وكبيرة .

البائع المتجول : قوطة ! انا عندى تفاح . جواهر . بنت يومها
وحياة الى خلقك . وخلق القمر ونجوم السما
فى يوم واحد .

السيدة : (تصدر ضحكة عالية متكسرة الى ثلاث نغمات
رقيقة) جواهر . ويكام بقى رطل الجواهر .

المعلم شهده : سبحان الله . سبحان الله ..
البائع المتجول : علشان خاطر عيونك ووشك السمح . خمسة
تعريفة .

نأشد أفندي : (مستمراً فى الكتابة والترتيل) ولقد اضعنا زهرة
شبابنا فى خدمة الحكومة .. فى خدمة الحكومة ..
فى خدمة الحكومة (يتوقف مفكراً) .

السيدة : (متطلعة البائع لحظات) خمسة تعريفة . اوعى
يا راجل تكون مصدق انك بتبيع جواهر صحيح .
قال خمسة تعريفة قال .

البائع المتجول : طيب والى خلقتك أحسن من الجواهر . دى يا قوت
مصنى . دوقى واحدة بس (يرفع اليها إحدى
الثمرات) .

السيدة : اسمع يا راجل . انا ما حبش الفصال ع الصبح
تجيب الرطل بقرش ؟

البائع المتجول : (محتدا) قرش ! الرطل كله بقرش . ليه . هو
انا كنت سارقها . والله لما اكون لاقىها فى الشارع
ما ابيعها بأقل من قرشين (البائع يهم بالسير
بالعربة) .

السيدة : تباع بتلاتة تعريفة ؟

البائع المتجول : (بعد تردد وهمهمه غير واضحة) عليه العوض .
عاوزه كام رطل ؟ (السيدة تختفى داخل المنزل
لحظة . ضجيج المقهى يرتفع . البائع ينادى على
بضاعته . المعلم شهدة بواصل جذب انفاس
الشيشة . والتطلع فى قلق الى نافذة السيدة .
ناشد أفندى منكب على الكتابة والقرتيل . وبين
الحين والآخر يبسط يده اليمنى ويقبضها بقصد
اراحتها) .

ناشد أفندى : (عائدا الى الكتابة والقرتيل) فى خدمة الحكومة .
أطال الرب عمر الحكومة (يتنسم فى زهو) هه .
بقا نخله أفندى يكتب جملة زى دى (بتنغم) أطال
الرب عمر الحكومة . يا أخى دهنه .. هيه ..
ونحن نطمع يا صاحب المعالى فى عطف .. لا .. لا
(يتوقف مفكرا ثم يعود لكتابه باسم) ونحن نطمع
يا صاحب المعالى العظيم فى عطفكم الكريم الذى
غمر العالمين . (السيدة تظهر فى النافذة مرة أخرى
وتدلى بسلة الى البائع) .

السيدة : سيد .. يا سيد ..

المعلم شهده : يا سيد . واد يا سيد . كلم الست أم خليل يا ولد .
(سيد يهرول ناحية البائع تنفيذا لأمر المعلم شهده)

أم خليل تتلفت في دلال الى المعلم شهده وكأنها
لم تلاحظ وجوده من قبل . فتتفرج شفاه في
سعادة) .

أم خليل : صباح الخير يا معلم . اسمع والنبى يا سيد .
المعلم شهده : صباح النور والهناء .
ناشد افندى : (وهو يرفع بصره الى النافذة من خلال نظارته)

وآدام الرب عهدكم السعيد الى ابد الابدین .
أم خليل : سايقة عليك النبى يا سيد تنقى لى رطلين قوطه .
على الفرازة يا سيد (سيد ينهمك مع البائع في
اختيار ثمار الطماطم . يظهر في اقصى الحارة
طفل صغير يرتدى مريلة مدرسية سوداء ويحمل
بعض الكتب بيده . يسير على مهل تارة ويجعل
تارة اخرى)

أم خليل : (صارخة عند رؤيتها الطفل) يوه . يا فتاح
يا عليم . ايه اللى جابك يا واد يا خليل دلوقت .
(الطفل يستمر في سيره دون مبالاة حتى يصل
الى طرف المقهى)

أم خليل : ما تنطق يا واد
خليل : أصل . أصل المدرسة . أنا . أنا جعان يا امه
أم خليل : (في حدة) هى البلاعة اللى جواك دى موش
حانتسد شوية ابدا .. يا واد ما تقول المدرسة
مالها . يوه يادى الخيبة

خليل : قا . قا .. قالوا لنا أطلعوا بره . وتعرفى مين
كمان يا امه
أم خليل : هيه ؟ ..

خليل : الواد جوده . والواد سنبل . وكمان اسماعين .
وكل اللى ما دفعوش المصاريف .

أم خليل : (بحق) المصاريف ! يوه . يادى الخيبة .
مصاريف ايه يا ادلعدى ياست يا مدرسة .
همه كام يا واد

خليل : الم .. الما . المصاريف يعنى . أصل . أصل
أصل أنا جعان يا امه

أم خليل : يا واد ما انت طافح الصبح شقة بقول مدمس .
يا واد انطق احسن والله العظيم تلاته بالله العظيم
ما خللى ايبيك تتلم على لقمة .

المعلم شهده : (ناهضا ومحتضنا الطفل) ماتصلى على النبي
وتهدى اخلاقتك امال (لعامل النصبه) روح ياواد
هات لخليل شقة بطعمية والا حلاوة . الى
يعجبه .

خليل : حلاوه ! (يذهب عامل النصبه من احدى منحنيات
الحارة لاحضار الساندوتش)

البائع المتجول : (صائحا في ضيق) دى ملكانتش بيعه . ماتخلصونا
بقى .

أم خليل : خلصت روحك . راجل عديم الذوق صحيح .
يا راجل يا شايب . انت موش شايف الواد
مطرود من المدرسة .

(البائع المتجول يحاول الرد على أم خليل بالسباب
ولكن المعلم شهده يمنعه . المعلم يعاود احتضان
خليل وتدليله)

أم خليل : آه يا طفس . يا واد قول . انطق . المصاريف
كام ؟ !

(خليل لا يجيب . نائسد أفندى يظهر ضيقه ويكف
عن الكتابة) .

نائسد أفندى : يا ستار . ده ولا المورستان ..

المعلم شهده : (لخليل في صوت حنون) يعنى تعرفت تقول
المصاريف كام . موش معقول تعرفت . موش
معقول ..

خليل : (في تحد طفولي) أيوه أعرفت . تعرفت كام . يعنى
تعرفت كام يعنى . قرش صاغ و .. وخمسة
جنيه . وتلاتين قرش كمان .

أم خليل : (بغضب قائم) بتقول كام . خ .. خ .. خمسة
جنيه . ليه ؟ هو أنا حا اشتري المدرسة . والا
يعنى حا اشتري تلات أربع دست مدرسين .

خمسة جنيه ! ده ولا المهر اللي دفعه لى أبوك
الله يرحمه . ولا قسط ماكينة الخياطة اللي
مربية شحك ولحمك وسترانا . يوه يادى الخيبة
القوية .

(يدخل عامل النصبه بالساندوتش ويناوله للمعلم
الذى يناوله بدوره الى خليل)

المعلم شهده : ما تحليش هم يا ام خليل . الفلوس موجودة
تحت امرك (يربت على موضع محفظة النقود
من سترته) اى فلوس .

الفلوس اللي تقضى كل مطلوبك ومطلوب خليل .

ام خليل : فلوس ايه وبتاع ايه يا معلم . هو احنا كنا مدينا
ايدنا وقتلنا لك حسنة لله يا معلم . لا ياعומר .
أنا باربى ابنى بعرقى وعفيتى . هم ! لاحوش .
شيل همك بعيد عنا يا ادلعدى . احسن يغرقنا
.. حوش !

المعلم شهده : (فى ارتباك) هو حد قال حسنة يا ست ام خليل .
عيب . أنا قصدى سلف . بس كده . سلف .
تصدقى بالله .

ام خليل : (مقاطعة) لا يا معام . احنا لابنستلف ولا بنسلف .
احنا بنشتغل وعائشين على قد القرش اللي
يدخل لنا .

(المعلم شهده يحاول الاعتذار بهمهمات مضطربة .
يستجد بناشد افندى بيديه . ام خليل لا تهتم به
فيجلس حانقا يجذب أنفاس الشيشة بعصبية)

ام خليل : (للبائع وسيد) ما تعبوا القنوطه فى القفص
(مبسملة) أما عجائب والله على الناس اللي
شابو، ومايختشوش .

قال سلف قال . تعالى هنا ياواد يا خليل عقبال
ما يبجى سى بدوى افندى واخليه يكتب عرايظ
لاكبر ثنبات فى البلد .

(خليل يغادر الحارة الى المنزل)

ناشد أفندى : (هامسا) بدوى أفندى يكتب عرايط . عيى

يا عيى
أم خليل : (مستطردة) عريضة للنظر .. وعريضة لرئيسه ..

وعريضة لرئيس رئيسه ان شالله يكون في
صايع سما ..

المعلم شهده : شوق النسوان يا ناشد أفندى . أنا نيتى ضافية

وسلية . أعوذ بالله أقدم الورد يرمونى بشوكة ..

(ناشد أفندى يهز رأسه روتينيا ويعود لتصفح

أوراقه والكتابة فيها . أم خليل تجذب السلة التى

امتلات بالطماطم)

خمسة جنيه .. وثلاثين قرش . وقرش كمانى ..

ليه .. هى الناس بتلاقى القرش بالسسهل ..

بتسخره . بتزرعه .

(تصل السلة الى حافة النافذة فتناولها أم خليل

بيديها وتغيب داخل المنزل . يتحرك خليل أيضا

وينفذ بصعوبة من الباب الى الداخل بسبب قربة

الطماطم التى تسده تماما . بغض النسوة يظهرن

في الحارة بالملاءات السوداء كما تطل أخريات من

التوافذ والشرفات ويشتركن جميعا في مساومات

مع بائع الطماطم الذى يبدو حائرا بينهن . ومن

آن لآخر ينادى على بضاعته)

المعلم شهده : (لنفسه فجأة) بدوى أفندى . بدوى أفندى

(يرفع صوته) الراجل ده يا أخى لابد يكون مولود

في ليلة القدر وأمه داعية له . لازم يكون كده ..

ناشد أفندى : (يرسل نحنة خفيفة وهو مكب على الأوراق)

مين ؟

المعلم شهده : بدوى أفندى .. كل حاجة بدوى أفندى . الاكل

بدوى أفندى . الشرب بدوى أفندى . المدرسة

بدوى أفندى . ناقص تنزل ترقص له بقى في الحارة

آه . أدى اللي ناقص . ترقص له في الحارة ..

(في انفجار) الله يلعن اليوم اللي اجرت له فيه

أودة السطوح . ولف على الولية يا خويا ولا

العنكبوت (يحرك حبات السبحة) سبحان الله .

صحيح ولا العنكبوت .

ناشد أفندى : (ببطء وهو يضغط على الكلمات) عنكبوت . ده

تعبان ماتعرف . ديب ماتعرف . تعلب ماتعرف .

ده مصيبة . لغز . يا سلام . تعرف أنا لما كنت

في الحكومة ريس قلم الارشيف . تحت ايدى اربع

موظفين كان عندى موظف .

المعلم شهده : (مقاطعا) آه يا بدوى الكلب . ولعه للشيشة

يا سيد .

سبحان الله . سبحان الله .

احدى النساء : (لبائع الطماطم) والنبي ما ادفع الا قرش واحد

فى الرطل

البائع المتجول : يفتح الله

احدى النساء : (للبائع) اسمعنى بعث لام خليل بقرش .

ثانية : روى انت اعملى خياطة وهو بيع لك بقرش

ثالثة : خياطة ! فشر !

المعلم شهده : (غاضبا) . ابره تنغز فى عينك منك لها يا بنت .

مالها الخياطة (النسوة يخفضن اصواتهن ويتغامزن

ناشد أفندى يهدى من روع المعلم شهده)

ناشد أفندى : يا معلم امسك روحك . الحكاية ريحتها فاحت على

الآخر وناقص لها رجلين وتمشى فى الحارة

كلتها .

المعلم شهده : وماله . هو انا لاسمح الله باخطف والا باسرق .

كله بالتمن وعلى يد الماذون . تصدق بالله اكتب

لها نص البيت مهر . شوف بقى يعنى ايه . نص

البيت بحاله .

ناشد أفندى : يا راجل ده انت عندك عيلتين . فى كل عيلة نص

دستة عيال .

المعلم شهده : وماله يا ناشد أفندى . فاضل لى كمان اتنين على

شرع الله وسنة رسوله . تصدق بالله . انا نفسى

من زمان اعمر لى كده بيت فى السيدة زينب ببركة

ام العواجز الطاهرة .. مجد يا ست .

ناشد أفندى : تصدق بالرب يا معلم . انا لا يمكن افكر في الجواز بعد المرحومة مراتى . ولو حتى ادونى مية جنيه . ورقة واحدة كده ودسوها في جيبي الجوانى ده . وقالوا لى خد واتجوز يا ناشد أفندى .

المعلم شهده : يدوك ! مين دول اللى يدوك ، مية جنيه ، ورقة واحدة لا . لا يا ناشد أفندى لكم دينكم ولى دينى . انا ياعم أجوز وأجوز وأدفع انا الميت جنيه . آه لولا بدوى الـ .. استغفر الله العظيم بقى . دى جوازه زى اللحمة المشفية . من غير عضم . جوازه من غير حماه يا ناشد أفندى . عارف يعنى ايه من غير حما .

البائع المتجول : تمن القوطة ياست يا للى خدتى الرطلين . خلينا نتوكل .

ناشد أفندى : تصدق بالرب يا معلم . انت المحقوق .

المعلم شهده : أنا !

ناشد أفندى : أيوه انت . انا موثن قلت لك ميت مرة ومرة .

ماتاجرثى لحد قبل ما تعرف فصله وأصله وشغله .

يكون مين بدوى أفندى . ابن مين بدوى أفندى

بيشتغل ايه بدوى أفندى . محدوف علينا من أى

داهية حاجة غريبة ، دا انا لما كنت فى الوزارة

ريس قلم .. كان عندى موظف ..

المعلم شهده : (مقاطعا) أهو قال لى انا تاجر يا معلم (بتاكيد)

هو أصله تاجر .. بالظبط تاجر . لكن تاجر ايه .

تاجر فين . الله وحده هو العالم . هو القادر على

كل شىء (بصوت منخفض) يا أم خليل نظرة .

دا انا طالب القرب فى الحلال .

ناشد أفندى : تاجر ! تاجر ايه ده الاجرب الصفلوك . اللى ..

اللى محسوب على البنى آدمين راجل . الغريبة

انه تارج .

المعلم شهده : (مقاطعا) صحيح تارج

ناشد أفندى : عمره ما يستحى . تصور انه بيشتري الجورنال

كل يوم الصبح . وعامل نفسه فالج قدام النقابة .

يقرا ويكتب في عرايظ . كا . . كأنه موظف حكومة
(يقهقه بسخرية) وموش بعيد يقول لك مرة . .
أنه ريس قلم مثلا . أصله يمكن فاكرك أن ريس
قلم دى بسيطة . طيب ده أنا لما كنت ريس قلم ،
كان عندى موظف . .

المعلم شهده : (صاحا) يا واد ماتيجى تصلح الشيشة . لكن
تعرف تقول لى يا ناشد أفندى ، أهو انت ياعم
ريس قلم قد الدنيا

ناشد أفندى : (بحسرة) كنت . . كنت يا معلم . . أيام وفاتت
زى الاكسبريس . مابقى الا محطات قليلة . ونبلط
فى الخط

المعلم شهده : اكسبريس ايه . ومحطات ايه يا ناشد أفندى .
يا راجل انت كونت وفونت وفاضل دايا كده على
طول ، فوق الرأس ، وجوه العين ، ريس قلم .
أكبر قلم وأكبر دواية ، والحقة كلتها . .

(المعلم شهده يشيح بيده . يظهر بعض الضيق
على وجه ناشد أفندى بسبب عبارات المعلم
شهده الأخيرة . سيد يحضر وعاء مملوء بجمرات
النار ويضعها فوق قهوة الشيشة . ويصطدم
بقدم ناشد أفندى)

ناشد أفندى : (بصوت خفيض) دواية ! (بصوت مرتفع) ياسيد
حاسب . حا تحرق البنطلون بالنار يا ولد .

المعلم شهده : بعيد . بعيد يا ناشد أفندى . قول لى بقى . أفندينى
فى سى بدوى أفندى ، أعمل قيه ايه . بالاصول
(باستفسار) أقطع له الكونترانو وأعزله .

ناشد أفندى : ماتقدرش . القانون يمنعك .
المعلم شهده : القانون . . قانون ايه ده بقى ؟

ناشد أفندى : قانون ال . . على العنوم المسئلة موش محتاجة
كل ده مادام ناويين يهدموا كل بيوت الحقة لأجل
يعملوا السكة الجديدة قدام السراية .

المعلم شهده : يهدموا ! طيب تصدق بالله . الذى يهد بيتى انسا
أهد حيله وعافيته . أهى ساييله . المهم خلينا فى

موضوعنا . قانون ايه اللي يمنعنى من طردساكن
موش لادد على

نأشد أفندى : قانون المساكن .

المعلم شهده : قانون المساكن ! هي البيوت رخره عملوا لها

قانون . على فكرة ليلة امبارح سهرت فى فرج على
كيفك ، كان فيه واحد بيضرب على قانون ، لكن
ايه ؟ ضرب يرقص الحجر يا نأشد أفندى (بعد
برهة) حلفت لو كان فيه قسمة لاجبيه فى ليلة
دخلتى على أم خليل (لحظة صمت) الله ! هو لما
واحد ساكن فى بيتك يشبك مع ساكنه من
السكان ، مثلا يعنى مثلا . ما تقدرش تطلعه .
قانون ايه اللي يمنعك ؟ موش كفاية قانون
الضرايب اللي بيلف الفلوس من غير ايه سبب .
وتتبلع بلع فى السريات والخدم والحشم والفخفة
(يشير الى القصر الملكى) .

نأشد أفندى : اصل يا معلم . يا الطاف الرب ! ياريتنا افكرنا
فى حاجة تستاهل .. عزبه . والا الف جنيه !

أهو حضرته شرف . (يظهر فى فرجة باب المنزل
بدوى أفندى يرتدى جاكته سوداء وبنطلون رمادى
باهت ، عصب رأسه برباط أبيض وأمسك بيده
طربوشا لا يستطيع الخروج من الحارة بسبب
عربة الطماطم التى تسد الباب)

بدوى أفندى : يا فتاح يا عليم . مسدودة والحمد لله . يعنى
يا بنى آدم الدنيا كلها ضاقت ، والحارة خلاص
انزحمت عن آخرها مافيش غير الحنة دى تقف
فيها وتسد الباب على الخارج والداخل . ياناس
ميزوا . فكروا . احيوا المأسوف على عمره اللي
دفتنوه فى روسكم (يشير الى رأسه) يا ناس
العقل . العقل . هو الفرق الوحيد بين البنى آدم
وذوات الاربع ..

باتع الطماطم : حيك . حيك . ايه هى الحكاية يا سيدنا الاندى

مالنا احنا ومال الذوات . ما بلاش تقطيم على
الصبح

المعلم شهده : خليك ياواد فى مطرحك ولا تسأل . ده بيتى أنا
وأنا سمّاح لك . آه . لغاية ماسكاتى كلهم
يشترخوا وينبسطوا (يصفق) هات واحد هنا على
الريحة كمان لناشد أفندى على حسابى .

بدوى أفندى : حسابك . بيتك قهوتك . سكانك . عبيدك . لكن
ماهياش حارتك دى حارة الخلق كلتهم .
المعلم شهده : (ضاحكا بعصيته) أنا حر

بدوى أفندى : أنت حر جوه نفسك . ان شالله تطربقها .
تفرتكها . تسدها . لكن بره نفسك . لا . فيه
الناس . والحارة بتاعة الناس . كل الناس
(**لبائع الطماطم**) يابنى آدم حس . واتعتع
بعريتك خلىنى أخرج لشغلى .

(**أم خليل تظهر فى النافذة من جديد**)

أم خليل : يوه . مالك ياسى بدوى أفندى . صباح الخير
بدوى أفندى : (وهو لا يزال على عتبة الباب) صباح النور .
ولا حاجة ده بتاع القوطة سادد الباب بعريتته .
والمعلم قاعد يهندس ويامر . . و . .

بائع الطماطم : (**مقاطعا**) ماتدوتا فلوسنا واحنا نفسبيها لسكرم
جرى . دى بيعة ايه دى اللي تطير الدماغ .

أم خليل : (**ترمى الى البائع قطعة من النقود**) خد يادلعدى
وسد حلقك بقى . حقك على أنسا ياسى بدوى
أفندى أنا اللي وقفته . . لا مؤاخذه أصل الواد
خليل . .

بدوى أفندى : (**مقاطعا**) حقك انت اللي فوق رأسى يا ست أم
خليل وخالق الكون ما أعرف أنك انت اللي موافقة
(**لنفسه**)

انارى أبو سبعة فالصو محموق قوى .

(**بائع الطماطم يفحص قطعة النقود بعناية**)
يجسها بين أسنانه ويرنها على الأرض)

بائع الطماطم : لا يا ست . الحنة بخمسة دى وشها ماسح (بدوى أفندى) شوف كده يا سيدنا الافندى

أم خليل : وشها ماسح . موش أحسن مايكون وشها ملغط زى وشك . اهى فلوس حكومة يا ادلمدى روح دور بقى على الحكومة .

بدوى أفندى : (ناظرا لقطعة النقود) تمشى برضه . تمشى .
بائع الطماطم : تمشى ازاي يا سيدنا الافندى . يا ست اعلى معروف بدليها بغيرها .

أم خليل : من فين يا ادلمدى . وحياء صباحك ماعندى غيرها . تاخذها والا تاخذ القوطه ؟

(بائع الطماطم يتردد لحظات ثم يضع قطعة النقود في جيبه . ويضع في سلة أم خليل الباقي منها . ويدفع عربته مناديا على بضاعته الى خارج الحارة . المعلم شهده يتابع حديث بدوى أفندى وأم خليل باهتمام وقلق . يقوم ويقعد على مقعده لاشعوريا . نائدا أفندى يحاول تهدئته دون جدوى . بدوى أفندى يخرج الى الحارة بحيث يبين لعيني أم خليل التى يصيبها الانزعاج بسبب ضمادات رأسه)

أم خليل : يوه . الشر بره ويبعد يا سى بدوى أفندى . مالك يا خويا كفى الله الشر . ايه اللى حصل . يا عيني عليك . اجرنك نازل متأخر . حسدوك والنبي يا سى بدوى أفندى حسدوك .

المعلم شهده : شوف . شوف الولية ناقص ترمى له نفسها من الشباك

بدوى أفندى : الحمد لله اللى جت على قد كده . دى كانت راسوق حاتنقطم قطم^(١)

نائدا أفندى : (بصوت خافت) عمر الشقى بقى^(٢)

أم خليل : بعيد الشر ياسى بدوى أفندى .
بدوى أفندى : وخالق الكون زى مايقول لك كده . امبارح كنت فى . فى . فى الشغل قاعد يامانة الله على كرسي

جنب الباب . وبعدين رحلت قائم .. قائم كده من
نفسى ، ومن غير سبب ، ورحلت قاعد جوه ،
وكأنى وحياتك يا أم خليل على ميعاد مضبوط ،
يادوب قعدت وحطيت الجورنال جنبى ، ومديت
ايدى اقلع الطربوش .. وهوب والكلوب اللى فى
السقف يروح طلاب فوق نافوخى عدوك ، الدم
ساح . و ...

أم خليل : (مقاطعة) شغل ايه ده اللى يسبح دم البنى آدم
والبنى حسدوك ياسى بدوى أفندى ، مانهتتش
على ليه ؟ كنت عملت لك حبسة بن على الجرح ،
كانت ناره بردت على طول

بدوى أفندى : تعيشى (بتحسس رأسه)
المعلم شهده : (مغیظا) ناره بردت ! . بقى ما أقدرش اعزله
يا ناشد أفندى . ؟

بدوى أفندى : (مستطردا) تعيشى يا ست أم خليل . كلك
انسانية .

(بدوى أفندى يهم بالانصراف لكنه يتوقف على
عودة أم خليل للحديث)

أم خليل : تعيش أنت ياخويا وتسلم لشبابك ولاحبابك .
يوه ، ده أنا كنت حا اطلب منك حاجة . لكن
بقى ..

بدوى أفندى : لكن ايه ؟ أما مالكىش حق يا ست أم خليل ،
وخالق الكون لتأمرى باللى انت عايزاه . هو أنا
لى بركة الا انت .

أم خليل : أبدا . دا أنا كنت عايزاك تكتب للواد خليل
كام عريضة من كلامك الحلو ، لحسن طردوه من
من المدرسة لكن بقى تلاقى مالكش دماغ للكتابة
دلوقت .

بدوى أفندى : دماغ ! ده أنا ان ملكائش عندى استلف . ده أنا
علشان خاطرك اكتب ميت عريضة .. اكتب جرنال
بحاله (بعد هنيهة) اكتب كتاب .

أم خليل : طيب ومستثنى ايه ؟
بدوى أفندى : (بصوت يبدأ خفيفا ثم يرتفع) مستثنى تمن
 الشربات . واجرة المائون . الليلة بعد ما أجى من
 الشغل تكون كل العرايض اللي أنت عايزاها
 جاهزة .

أم خليل : الهى ما يجرمنى منك ابدأ ياسى بدوى أفندى .
 روح ربنا يجعل لك فى كل سكة سلامة (وهى
 تغلق النافذة) أسيبك بعافية بقى .
المعلم شهده : (ناهضا) الله يعافيك يا ست أم خليل . الف ألفا
 عافية (لناشد أفندى) سامع المسخرة دى . بقى
 ما أقدرش اعزله ؟

(بدوى أفندى يتجه الى المعلم شهده)
بدوى أفندى : يا راجل احترم السبحة الللى بتلعبها بصوابك .
 وبلاش العافية دى .
المعلم شهده : أما غريبة على دى أشكال . ايه ؟ بارد العافية
 على واحدة من سكانى . عيب . كثر . ده النبى
 امرنا برد التحية باحسن والطف وارق منها .
 ايه ؟ عايزنى أخالف امره يعنى ؟ ومع واحدة من
 سكانى كمان .. ده انا احب النبى (بعد هنيهة)
 واحب احدى واريح سكانى قوى . أنت ما تعرفنيش
 كويس يا بدوى أفندى ، ده انا موش سهل ابدأ .
 احب اريح على الآخر .

بدوى أفندى : طيب لما أنت كده . تحب تريح سكانك . شيلت
 البرميل ليه من تحت حنفية السطح ومليته رمل ؟
المعلم شهده : اتفضل اسمع بجاجة سكان الايام دى يا ناشد
 أفندى (مقلدا بدوى أفندى) شيلت البرميل ليه من
 تحت حنفية السطح ومليته رمل ؟ انا حريه اخى
 فى بيتى . ده ملكى . موش عاجبك اتفضل .
 وزينا عرض اكنافك . عايز تفجى مية البيت فى
 البرميل كل يوم واسيبه لك . يا اخى اتوكل
 وسيننا فى حالنا . .

بدوى أفندى : واليت قرش الى يلعتهم اول امبارح ؟ !

المعلم شهده : الميت قرش !! اياك عايز تبكن منجنا . لوجه

الله . اتفضل . اسمع يا ناشد أفندى .
اتفضل .

ناشد أفندى : يا معلم روق . وهدي اعصابك .

المعلم شهده : أروق ازاي والعكارة زى مانت شايف ماليه
الحارة

(صمت لحظات ، الجميع يتبادلون النظرات .

يدخل بائع الصحف مناديا) .

بدوى أفندى : عكاره ! !

بائع الصحف : المصرى والاهرام . الاثنين عدد ممتاز .

بدوى أفندى : عكاره ! الله يسامحك (**بائع الصحف**) هات

يا بنى الاهرام ، هات . خلينا نشوف شغلنا .

يا لطيف الطف بدى صباحية (**بدوى أفندى يتحرك**

نحو المقهى ويجلس منتحيا ناحية مقابلة لكان

المعلم شهده وناشد أفندى)

ناشد أفندى : يا سلام على القنصره يا سلام . جرنال كل يوم

الصبح ؟ ليه ؟ لازمته ايه ؟ سياسى حضرته . والا

يعنى تاجر فى البورصة . والايمكن موظف حكومة .

ريس قلم مثلا بيتاجر فى ايه بس الاجرب ده .

تعرف يا معلم ..

(يتهامس مع المعلم شهده . سيد يلحظ دخول

بدوى أفندى الى المقهى فيتبادل معه تحية

صامتة)

سيد : واحد شاي بالحليب والبقسماط لبدوى أفندى

(يقترب منه) ايه العبارة ؟ سلامتك . والله

ما أعرف الا من كلامك دلوقت مع ام خليل .

تعرف لو بدرت شوية كنت لقيت الرئيس حقيقى .

كان عايز يشوفك قبل ما يروح المصنع . علشان

الحكاية اياها . ناشد أفندى كان قاعد ولا عبره .

بدوى أفندى : اعمل ايه يا سيد الزاجل بتاعك ابو سبحة فالصو .

زحزح البرميل وملاه رمل . تمت متأخر .

سيد : البرميل !

بدوى أفندى : ايو يا أخى . البرميل اللى تحت الحنفية . صحيت فى ميعادى لقيت الشمس لسه ما جاتش على البرميل . قلت فى سرى ياواد أنت لازم صحيت بدرى . نام لك شوية . وفين وفين لما الشمس فرشت على البرميل واقوم يا سيد يا خويا . الأقيه مليون رمل وبعيد عن الحنفية مترين ثلاثه . عدوك قمت زى الماكينة . ويالكم الراجل أبو عين زايغة على شبابيك الناس بقول لى بكل بجاجة أنا حر . ده بيتى . سكاتى (سيد يقدم الشاى والبقسماط لبدوى أفندى)

سيد : فكرتتى يا أخى . ما تلحق تخش الدنيا باليمامة (يشير الى نافذة ام خليل) أحسن يا بطل تقع منك فى شبكة المعلم .

بدوى أفندى : يمامة ايه . وشبكة ايه . هو دخول الدنيا سهل ياسيد ده زى كل حاجة فى البلد دى . بالقرش . عندك قرش تدخل (يتحسس رأسه) آه يا دماغى . ماعندكش تخرج وتنطرد بالقديمة . وعبك أبو سبحة فالصو يدخل احسنها دنيا . ليه ! فى جيبه القرش . أما احنا فى جيبنا هوا . على الرصيف دايا . بره الدنيا . الدنيا اللى فيها شمس وراحة ولحمة وسرير بمرتبة وميه جوه البيت (بعد هنيهة) موش السجن ده . آه من السجن يا سيد يا خويا .

سيد : السجن . السجن . يا ستار . انت موش حا تنسى الأيام السوداء دى أبدا .

بدوى أفندى : وأتساها ازاي . اذاكانت لسه كابسه على نفسى . وهو انت تفتكر يعنى ان فيه فرق بين جوه السجن وبره السجن . أبدا . هناك الحديد تشوفه فى الزنانة . على الباب . حوالين ايديك ورجليك . وهنا موجود برضه

سيد : (مقاطعا) موجود ؟ !

بدوى أفندى : طبعاً موجود . بس ايه ؟ لأبس طاقة الإخفا .

فما تشوفوش . بقى يعنى بذهمتك أما تقف أنت

وابنتك عبده ازيه من حق . الكحة خفت (سيد

يزوم) هيه . أما تقفوا قدام بكانة الحلوانى اللى

على ناصية الشارع العمومى . ويجرى لسان

المحروس على حثة بسبوسة والا هريسة .

وتحسس فى جيبك ماتلاقيش القرش . تحس

بإيه ؟ أنك مبسوط . منجبح . حر والا متقيد فى

سجن (بعد هنيهة) طبعاً فى سجن . تقدر تلد

إيدك . وتأخذ حثة بسبوسة . أهو مافيش حديد

يا عم . ازاز . ازاز بس . تقدر ؟ !

سيد : اكسره . اكسر القزاز . يجرى ايه يعنى .

بدوى أفندى : لا ولا حاجة . بسيطة خالص . يدخلوك الدنيا

أم حديد اللى من غير طاقة الإخفا . فقط لا غير

(يرتشف جرعة من الشاي فتلسعه سخونتها)

اعوذ بالله . ده سخن بيغلى . ولا مية النار .

والله عايز يندلق فى عينين الكهنة أبو شمير

مبسبب المحفورين تحت النضارة زى خنادق

الحرب . شوف الرجل ياخويا ببيرق فى ازاي .

والله ولا إلبومة اللى صوتت فى وشى يوم ماخدت

الخمسة جنبه من مكتب البوسنة .

سيد : (ضاحكا) إسكت . ده حا يموت علشان يعرف

أنت بتاجر فى ايه . ده كل يوم عمال يحاورنى

ويداورنى ، هو والمعام (يقلد نأشسد أفندى)

دكانته فين ؟ عنده سجل تجارى ؟ بيتاجر فى أى

مصبية ؟

بدوى أفندى : مصيبة تقطع لسانه اللى بقى أطول من عمره .

هو ماله ومالى بس . أبويا . أمى ؟ عمى .

جوز خالتي . ستى راضعة على المرحوم جدّه

(بعد هنيهة) بيتاجر فى ايه ؟ فى الكفن اللى يدوب

فى عرق جتته . فى البسم الهارى اللى ينقله من

سيد : ريس قلم الدنيا لريس قلم الآخرة .
 بدوى أفندى : من حق . جيت سجاير ؟
 سيد : سجاير ! آه . وخالق الكون . كنت حا أنساها .
 خد . (بدوى أفندى يخرج من جيبه مجموعة مختلفة من السجاير . سيد يحتويها براحة يده)
 سيد : ياه . المحصول النوبة دى عال .. لاكى سترايك .
 كرافن . ملك مصر . بحارى . هما كام (يغد)
 جوز . جوزين تلا ..
 أحد الزبائن : شيشة والنبي يا سيد
 المعلم شهده : بما تتلطح يا واد يا سيد تشوف طلبات الزبائن
 الى فيم . مايدة
 مسيد : امال انا باعمل ايه يا معام . شيشة حوى على
 المظبوط . انا باحاسب بدوى أفندى (تنبسط
 أسارير المعلم شهده سيد يستمر فى عملية عد
 السجاير) ثلاث تجواز أربعة (يظهر الأستاذ
 سليم المحامى من جديد وينادى سيد فى عجلة)
 الأستاذ سليم : سيد .. سيد .
 مسيد : الله . الأستاذ سليم
 الأستاذ سليم : هو الرئيس حنفى لسه مارجعش من الصنع ؟
 مسيد : لا لسه . ما فيش غير بدوى أفندى . قاعد هناك
 أهو
 الأستاذ سليم : بدوى ! بدوى مين ؟ (متذكرا) آه . بدوى أفندى .
 هيه . (يرسل نظرة فاحصة الى بدوى أفندى)
 بقى هو ده بدوى أفندى .
 مسيد : راجل سكره صحيح يا أستاذ سليم . يعجبك
 قوى كلامجى . ومكتبجى عرايظ على الآخر .
 الأستاذ سليم : (ضاحكا) مكتبجى ! طيب اسمع يا سيد . لمايجى
 الرئيس حنفى قول له يفوت بنفسه على المكتب
 ضرورى . سلام عليكم . أوعى تنس يا سيد
 مسيد : اتنى ازاي يا أستاذ سليم . مع السلامة .
 (ينصرف الأستاذ سليم . سيد يستأنف حديثه مع

بدوى افندى ويشرع فى عد السجائر من جديد فى وقت واحد)

سيد : جوز . جوزين . تلاته . ده الاستاذ محامى النقابة أربع تجواز خمسة . ستة .. يا حظك يا أخى . والله انت راجل طيب يا بدوى افندى . واحدة كمان وكنت وقعت فى رقم النحس . نيتك صافية .

بدوى افندى : (وهو يقبل راحة يده اليمنى وظهرها) نحمده . تعرف يا سيد . وخالق الكون كانوا حايقوا . تلاتاشر .

قول لى ازاي ؟

سيد : ازاي ؟

بدوى افندى : أقول لك ازاي . شوفة يا سيدى . الكلوب ، لما طب على نافوخي فى الصوان وقعت . وجبات وقعتى عين يا حظ قول لى عين ؟

سيد : عين ؟

بدوى افندى : أقول لك عين . على ترابيزة السجائر . اتبحثروا على الارض . مديت ايدى والقدم سسايح على الآخر وحياتك يا سيد . وكبشت . فضلت واحدة تحت كرسي راجل تخين . رجليه زى رجلين فيل تمام . قعدت أحاور علشان أخدها . والناس تشد فى عاوزه تقومنى . وأنا اتصلب ورجلين الفيل زى ماتكون اتزرعت فى الارض زرع . وما فيش فائدة يا سيد ابدا .. الله . الله . شوف ياخويا الراجل الروبايكا (يشير الى ناشد افندى) حا ياكلنى بعينيه ازاي .

(سيد ينظر الى ناشد افندى مبتسما . ويغادر)
بدوى افندى لاداء عمله . ناشد افندى يصصيه ارتباك نتيجة نظرات بدوى افندى المسلطة عليه ويرفع من صوته متعمدا وكأنه يستكمل حديثا بينه وبين المعلم شهده)

ناشد أفندى : آ . ب . بقى الموظف اللى كان عندى فى
الارشيف ..

المعلم شهده : (مقاطعا) موظف ! موظف ايه ياناشد أفندى ،
ما تخليك معايا امال أنا لايد أعزله . ارميه بره
البيت . ده بيتى . القانون ده مايمشيش على
لا . ده أنا أدفع ديته على قد ماتكون . عشرة
عشرين . الفلوس تفوت فى الحديد وتخليه عجين
يا ناشد أفندى .

ناشد أفندى : بشويش . بشويش يا معلم . أحسن واخذ باله
(المعلم شهده يرمى ببصره الى بدوى أفندى فى
حق . ثم يرتد الى ناشد أفندى يحدثه همسا .
سيد يعود من جديد الى بدوى أفندى)
بدوى أفندى : (مستكملا حديثه السابق) شفت بقى القسمة
والنصيب يا سيد .

سيد : أنت والله بركة يا بدوى أفندى . أصلك بارك كل
حاجة لله . ومتوكل عليه .

بدوى أفندى : (فى حماس) وخالق الكون زى ما بتقول تمام
يا سيد أهو . أهو مثلا لما خرجت من السجن
وحدى . فرع ومقطوع من شجرة . لا أخ ولا أم
ولا صديق ولا قرش . ولا حنة أنلم فيها . ربنا
مايوريك ساعة زى دى يا سيد . ومشيت على
باب الله . حاجة كده طلعت فى راسى وقالت لى
سيب الشوارع العمومى يا بدوى وامشى فى
الحوارى . فى الضلمه . زى ماتقول كنت لسه
واخذ عليها . وخايف من النور والنساس . آه
وحياتك كده يا سيد . وامشى لك حزنان . وكاتم
غلبى وخالتى كلها بالبالا . وما أشعر بنفسى إلا
وأنا جوه ...

سيد : جوه . جوه ايه ؟

بدوى أفندى : جوه صوان ميت . والناس حوالى بتواسى فى
اللى يدس فى جيبي قرش . واللى حنة بخمسة .

واللى يقدم لى سيجارة . واللى . واللى .. وأنا
قال ايه نازل نهنه زى العيل الصغير اللى تاه من
امه فى الزحمة .

سيد : حاجة غريبة صحيح . المقدر يا بدوى افندى
بدوى افندى : وخالق الكون زى مباحكى لك كده . باقول لك
حاجة الهية كده ما اعرف لها لغاية النهاردة عله
من سبب . هى اللى مشتنى حارة من جوه حارة .
قمعدتنى فى الصيوان . نزلت الدموع من عينى ..
حاولتنى بالناس . وفين وفين لما فقت لنفسى .
واتلميت على عقلى . واهى بقت شغلانة . تجارة .
تجارة ربانية يا ابنى . لى لوحدى . لاشريك ولا
منافس . ولا ريس ولا ضرايب ولا ديالو .
تلقانى علشان كده موش عايز اتبطر عليها ابدأ .
قسمتى . اللى انكتب لى . ولها حكاية الريس
حنفى دى فصدقتى أنا قلبى موش مطاوعنى
عليها .

سيد : لا . انت بتزودها قوى يا بدوى افندى .. اى
نعم القسمة والنصيب ما بنقولش حاجة . لكن
برضه الواحد يسعى علشان شغله . والا تجارة
يعرق فيها بالحق والشرف . موش ! ...

بدوى افندى : (مقاطعا فى احتداد) يغرق فيها ! ده انا موش
بس باعرق لاجل لقمة العيش دى . لا . بدمع
كبان . بدمع بحق وشرف .. بدوب روحى
وأعصابى فى دموع بحق وحقيق . فاهم يعنى
ايه بحق وحقيق . يعنى بتنز من قلبى . يعنى
الناس بتصدقها وتتأثر بها . وتترحم على المرحوم .
والرحمة على الاموات خير وبركة وثواب فى
الآخرة .

سيد : يا سيدى موش كده . بتدمع . بتعرق . المسألة
أن الشغل ..

بدوى افندى : (مقاطعا بنفس الاحتداد) الشغل ! شغلتنى انا
حاجة تانية . جديدة . تجارة جديدة . مالهاش

مثيل . ايه يعنى لما تتاجر فى قوطة .. فى خرغان .
 قول نابت . والا حتى لؤلؤ وذهب حر اربعة
 وعشرين قيراط . ولا حاجة (يمثل بيديه) بكام
 بكذا . موافق . لا . كثير . لا قليل . يفتح الله .
 أو عليه العوض وتمت الشفلة . بسيطة . فيها
 ايه ؟ ولا حاجة . . تجارة عرق عادية . أما أنا
 فتجارتى وحيدة فى نوعها . فنية . عايزة حداقة
 ومفهومية . تجارة قلب . احساس شعور
 (بعد هنيهة) ت تجارة دموع (يهدأ قليلا)
 ثم يقول بصوت ممطوط حالم (تجارة دموع .
) بدوى أفندى يسكت تماما وكأنه وفق الى
 اكتشاف من طال غموضه (

سيد

يا عم أنت حر . المهم أنا باقول لك ماتضيعش
 فرصة الرئيس حنفى . ناشد أفندى عمال يبصبص
 لها ووسط المعلم . هيه . أما أروح ابيع لك
 السجاير للدخانى . يا أخى الراجل ده على قد
 ماينسمن على قد ما بيخل ويشخر .
 (يسمع شخير بائع السجاير)

بدوى أفندى :

(ساهما) يشخر ! يا بخته

سيد

مالك يا بدوى أفندى . مالك . راسك بتزن
 عليك ؟

بدوى أفندى :

(متبها) لا . ولا حاجة . هيه . حاتروح
 للدخانى . طيب عال . اجدعن مفاه . ماتخذ
 لك كام سجارة تعفرهم . والله لانت واخذ .
 خلاص خلعت بالله .

سيد

ان ماكتتش تحلف . طيب يا سيدى حاضر . بعد
 اذنك سيجارة ملك مصر . وسجارة انجليزى من
 البخارى . احرق فيهم زى ما هم حارقين البلد
 وخاريينها . وكاتمين على نفسنا . الله يكتم
 انفسهم جميعا فى ساعة واحدة وتكون مفترجة .
 دول دبحوا العالم امبارح فى ميدان الاسماعيليه

بدوى أفندى : وخالى الكون لتأخذ واحدة كمان ، جرب الأمريكانى
اللاكى سترايك جـرب . ده الأمريكانى زى
الانجليزى تمام .

سيد : لا كفاية . علشان نبيع للدخانى عشرة مرة
واحدة . على فكرة . الرئيس حفى وعماله كانوا
ماشيين فى مظاهرة ميدان الاسماعيلية وكان
حايقتبض عليهم فيها .

(سيد يهم بالتوجه الى محل السجاير ولكنه يتوقف
أثر ظهور شخص طويل القامة يرتدى الملابس
البلدية وفوقها بالطوكلى . وعلى رأسه طربوش
طويل كالح اللون وبيده عصا صغيرة . حركاته
تشى بتربية عسكرية تطل من عينيه نظرات حذرة
متحساسة . سيد يتنبه اى كثرة مروره بالحارة
مرار قبل ظهور بدوى أفندى . بدوى أفندى يشرع
فى تصفح الجريدة)

سيد : (هامسا لبدوى أفندى) يا أخى . الرجل المخشب
دهه . تالت مرة يدخل القهوة ويخلق فى الموجودين
واحد واحد . ويروح طالع تانى
(بدوى أفندى لا يعبر سيد التفاتا ويظل يتصفح
الجريدة)

بدوى أفندى : (دون أن يرفع الجريدة عن عينيه) صحيح الدنيا
بقت على كف عفريت . العالم ياخويا اتلم عليه
شوية مجانيين ملخطين كيانه . هى آخرتها ايه ؟
الله أعلم ؟

سيد : الله . الله . ده الرجل المخشب جاى عليك
يا بدوى أفندى . الله . الله أنت تعرفه والا
ايه ؟

بدوى أفندى : (وهو على ذات الوضع) والخلق نازلة حش فى
بعضها . الكبير بياكل فى الصغير زى السمك
(يرفع رأسه عن الصحيفة) آه . يابا نفسى فى
أكلة سمك مشوى . وجنبه شمعية بطاطس محمرة
نص نص . ورغيف مقدد وكام حطة ..

(في هذه اللحظة يكون الرجل ذو الباطن الكاكي قد وصل قبالة بدوى أفندى تماما ومد ذراعيه اليه . المفاجأة تذهل بدوى أفندى وهو مستمر في الحديث)

بدوى أفندى : يا خالق الكون ! عفيفى ! موش معقول . الشاويش عفيفى ! وخالق الكون ما عرفتك يا شاويش عفيفى . أهلا وسهلا (يتصافحان) أهلا . . ده أنت اتغيرت خالص . سمعت شوية وريت شنيك . أهلا وسهلا . أهلا . (يتصافحان من جديد) ماشاء الله . ماشاء الله الخاتم بيطل من صباعك ، يخزى عين الحسود . أنت ورثت والا ايه ؟

الشاويش عفيفى: أهلا وسهلا (يشير للخاتم) ذهب اصلى وحياة اولادى . بالوزن ! حاكم فى الصباغة بيوزنوا الذهب فى ميزان طبط . موش زى ميزان السجن . فكره يابدوى أفندى

بدوى أفندى : هو فيه حد ينسى أيام السجن يا عفيفى . تشرب ايه بالذمة . يا سيد . واحد شاي على اصوله للشاويش عفيفى (سيد يهز رأسه ويلقى بالنداء على الطلاب للنصبة ويفسادر المقهى الى محل السجائر . الشاويش عفيفى يلكز بدوى أفندى وهو يلتفت يمنا ويسرة ويتحدث بصوت خافت)

الشاويش عفيفى: وطى حسك يا بدوى . وبلاش كلمة شاويش دى

بدوى أفندى : (هامسا) ايه ؟ هو انت سبيت السجن . تركت الخدمة

الشاويش عفيفى: لا انتقلت حنة تانية . فى البوليس برضه . بس ملكى بقى .

بدوى أفندى : سرى يعنى !

الشاويش عفيفى: عليك نور . دا أنت بتقهمها وهى طيارة . ايه اللي عرفك ؟

بدوى أفندى : ايه اللى عرفنى ؟ لبسك يا أخى . ودى عايضة حاجة وانتقلت مين على كده ؟

(الشاويش عفيفى يلتفت يمينه ويسرة . ثم يهمس فى آذن بدوى أفندى بكلام غير مسموع . تبسو على وجه هذا الأخير تعبيرات مختلفة يشوبها القلق والدهشة . المعلم شهدة يقرع المنضدة بقبضة يده)

المعلم شهدة : (وكأنه يواصل حديثا) كلام ايه اللى بتقوله ده يا ناشد أفندى ده أنت ريس قلم وكنك نظر . بقى أنا المعلم شهدة ابن فرحات ابن عبد المطلب ابن شهدة الكبير قوى فى المقام . اسال أهل الحنة .. بقى أنا مسقدرش على حنة تاجر صنلوك . ده أنا موش أعزله ويس . ده أنا أعزله بالجملة . أعزله بالقطاعى . ذراع ، وراجل ، ورا راس .

ناشد أفندى : تصدق بالررب . الموظف اللى كان عندي فى الارشيف ..

المعلم شهدة : (مقاطعا) تصدق أنت بالله . كان عندي ساكن بيقل أدبه برضه على السكان . تعرف عملت له ايه ؟ علمته الادب . آه . ولما .. (يمر بائع فى جلبه شديدة وينادى على بضاعته « لحمة الرأس » بصوت مرتفع . تضع فيه كلمات المعلم شهدة . ويسمع من جديد الحديث الدائر بين بدوى أفندى والشاويش عفيفى)

بدوى أفندى : (يدهش) يا سلام ! الشاويش عفيفى : وحياة العيش والملح زى ماياقول لك كده .. بالراس ! كبيرة صغيرة .. بخمسة جنيه . قدر بعقلك بقى خمسة جنيه يعنى ايه ؟؟
بدوى أفندى : خمسة جنيه !

(سيد يحضر الشاي للشاويش عفيفى ويشمر الى بدوى أفندى بإشارات يفهم منها بدوى أفندى أنه باع السجائر للدخانى)

الشاويش عفيفي: وفيه بقا مواسم الروس تنطلب قوى . ألفه
راس . الفين . ثلاثه . وانت وشطارتك . تطلع
لك باربعين خمسين جنيه . تكسي العيال وتدفع
بصاريفهم في المدرسة . وتملا البيت عيش ولحمة
ورز . وتعيش ملك زمانك ومزاجك .. حبة سكر
يا أخينا أحسن الشاي دلع ..

بدوى أفندي : وإذا ما لقيتني ؟
الشاويش عفيفي: ما لقيتني ! (يشرب جرعة من الشاي ، سيد
يخضر السكر وينهمك الشاويش عفيفي لحظات
في قلب السكر وتجربته . تبرز بجانب القهوة
سيده متشحة بملاءة سوداء تنادي على سيد)

السيدة : سيد . نادى لى المعلم . اعمل معروف
(سيد لا يجيب ويتجه رأسا للمعلم شهده)
سيد : حماك يا معلم . أم جماعة شبرا يا معلم
(المعلم شهده ينهض منزعجا ويجر حماته خارج
الحارة ويسمع صوتهما من خارج المسرح)
صوت الحماة : بقى يا راجل . تجيب لضره بنتى أول امبارح ملاية
حرير

صوت المعلم شهده: ملاية حرير ! تصدقى بالله ..
(يتلاشى صوت المعلم شهده وحماته . ينتهى
الشاويش عفيفي من قلب السكر . يتجرعه في
رضا . ويواصل حديثه)

الشاويش عفيفي: بتقول مالقيتني ! ده أنت على نياتك خالص
يا بدوى أفندي . ده مافيش أكثر من الروس . دى
في البلد . هو فيه حد يا راجل في الزمن ده موش
قرمان من (ياتفت حوله) بسلامته ؟ والا بسلامتهم ؟
خلاص أهو ده المطلوب

بدوى أفندي : المطلوب ؟ !
الشاويش عفيفي: أيوه المطلوب . أنت مثلا . مثلا يعنى . رايك
ايه في بسلامته ؟

بدوى أفندي : زفت .
الشاويش عفيفي: وبسلامتهم ؟

بدوى أفندى : قطران مسيح .
الشاويش عفيفى : خلاص . تنفع راس تتقدم ويندفع عليها خمسة أهيف .

بدوى أفندى : يا خالق الكون ! لكن ده ظلم .
الشاويش عفيفى : ظلم ! وهو لما مالاقيش أوكل عيالى موش ظلم لما أبويا عمى علشان موش لاقى ولا تمن القنطرة ماكتش ظلم . لما . لما أنت خدت من عهدة الحكومة كام جنيه سلف تسد بينهم جعورة صاحبة البيت فسكعوك سنتين سجن ورغدوك من وظيفتك . موش ظلم . الناس زى ما هى بتظلمنى أنا كمان حاظلمها . وأمسك فى زمارة رقابيهما لغاية ما أخلعها خلع . واحدة ورا الثانية (يرتششف جرعة من الشاي) تقول لى ظلم ؟ الظلم ضد الظلم .

بدوى أفندى : وحده الله فى قلبك يا شاويش عفيفى الظلم مايداوهش الظلم . ده انت يا راجل بتصطاد المظلومين . المظلومين اللى زيك وزى وتقدمهم لبسلامته ويسلامتهم . دول شبيحة . دول زى مايكونوا . والا بلاش ياعم أحسن .
الشاويش عفيفى : لا . لا . خد راحتك . احنا اخوان . مافيناش من خوانه .

بدوى أفندى : اخوان ايه بقى يا شاويش عفيفى . ونخالق الكون انت زعلتنى قوى . بقى ياراجل تشتغل فى بيع روس الناس . لله . . (يتردد ويشير الى القصى الملكى) وللانجليز .

الشاويش عفيفى : أكل العيش يحكم يا بدوى أفندى الا ماقتلش انت بتشتغل ايه دلوقت ؟

بدوى أفندى : (متردداً) أنا . أنا ت . . تاجر . بتاجر يعنى . .
أيوه تاجر .

الشاويش عفيفى : وبتاجر فى ايه كده بالصلاة على النبى . يمكن اشترى منك حاجة . أنفعك .

بدوى أفندى : (حائراً مرتبكاً) لا دى ت . . تجارة بسيطة .

باشتغل معاه حاكم هو راخر ابن اكابر . والاكابر
مع الاكابر ؟ ؟

بدوى أفندى : أخوان !

الشاويش عفيفي : (باستحسان) بدوى أفندى ده مخه كبير قوى .
يفهمها وهى طابرة ، ده كان فى السجن جن مصور .
ياخد كل مطلوبه بالحداقة (يضحك) نهايته . بقى
هم اتصلوا بمين ؟ بحضرة الضابط وقالوا له عمال
المصنع عاملين شوية نقابة ودوشة . وابصر ايه .
طالبين يزودوا الاجرة . ويقصروا وقت الشغل .
واشتركوا كمان فى مظاهرة امبارح مع الطلبة
وعايزين همتك وشهامتك يا أبو خليل حاكم هو
اسمه ابراهيم . اليوزباشى ابراهيم . مين الراجل
بقاع أبو خليل اللى يوثق فيه ويبيض وشه ؟
عفف .

بدوى أفندى : عفف !

الشاويش عفيفي : (يذق صدره بارتياح) محسوبك يعنى . وعفف
بقى يدوب فى زوارق العمال . تصور أنهم بكل
بجاجة عايزين يشتغلوا تسع ساعات فى اليوم .
تسع ساعات بس تقولش أولاد السلطان . المهم
انى اعرف لك مين الزعما مين الرئيس . وده
بيقول ، وده بيعيد . واطلع بكام راس ويا بخت
مين نفع واستنفع (هنيهة) لكن . لكن قطرة العين
دى تكسب كثير يا بدوى أفندى ؟

**بدوى أفندى : والله . أهى مستورة يا شاويش عفيفي (يعود
الى تصفح الجريدة مرتبكا)**

الشاويش عفيفي : ماقلنا بلاش شاويش دى . اسمع . ان كان
حالك موش ماشى . احنا اصحاب . والاصحاب
احن من الاخوات . عندي لك شغلانة كويسة .
قرب ودنك منى ..

**(الشاويش عفيفي يكمل الحديث همسا فى اذن
بدوى أفندى)**

بدوى أفندى : تعيش . تعيش يا عفيفي . خيلنا فى . فى التجارة .

الاعمال الحرة احسن من شغل الحكومة . اسأل
مجبب .. الله . شوف . شوف الحادثة دي . اما
راجل عبيط صحيح اللي انتحر دم . اقرا . .
حدث مساء امس ان كان (ينهمك كل من الشاويش
عفيفي وبدوى افندى في القراءة . بيدو مقبلا الرئيس
حنفي رئيس نقابة العمال يتوجه الى محل
السجاير . يلححه سيد فيضطرب)

الرئيس حنفى : (لياتع السجاير) يا راجل اصحى امال . وادينا
سيجارتين يا راجل فوق . والله حا تصحى يوم
تلاقى اللي في دكانك كله طار (تسمع حشرجه
تشخير بائع السجاير وهمهمته . ناشد افندى يعود
من الخارج حاملا ورقا ابيض في يده)

المعلم شهده : كنت مين يا ناشد افندى ؟
ناشد افندى : الورق خلص . قمت اشترت ورقتين . الاتماس
طلع كبير (ناشد افندى يعود للكتابة)

المعلم شهده : بفايدة ان شاء الله . اهو الرئيس حنفى بتاع
النقابة جاى انا كلمته علشانك يا ناشد افندى
وحا اكلمه تانى . بس لايد تشوف لى طريقة فى
بدوى . الله . ده بيتى ياتاس . سبحان الله .
سبحان الله ..

الرئيس حنفى : (وهو يتطلع الى سيجارتين بيده) لا . لا ياعم .
انا ما باحبش السجاير دي ابدا بتقول ايه ؟ بفل .
وانا عايز الفل ليه ؟ هو انا عايز اسد قرازة .
والا اشرب سيجارة . لا . لا

(تسمع همهمة بائع السجاير . تسيد يسيطر
عليه الارتباك ويذل مجهودا ضائعا لتنبية الرئيس
حنفى الى الخطر)

سيد : (للرئيس حنفى وبذات نفمة النداء على الطالبات)
وواحد مطلوب كمان وخليك عندك .

(الرئيس حنفى يستمر فى محادثته مع بائع السجاير
وغير ملق بالا الى مجهودات سيد)

الرئيس حنفى : باقول لك لا . وانا مالى ومال سجاير البشوات .

ايه بقرش ! برضه لا . يا راجل ادينى اتشين
هوليود . انا ماخلش مزاجى يتقنزع على أبدا .
تعرف لو عودته النهاردة على السجائر أم فل .
بكره حايطاب أم أربعة وأربعين . وبعده أم ستين
فى سيعين . وليه ياعم كل ده . خلينا فى الهليود .
يانقطع نفسه . ياقطع نفسنا (تسمع من جديد
همهمة بائع السجائر . وتبادل الأيدى الأربع
للسجائر . الرئيس حنفى يضع سيجارة خلف أذنه
السرى ويفادر المحل فى اتجاه المقهى وهو يشعل
السيجارة الأخرى)

الرئيس حنفى : (لبائع السجائر) نام لك بقى شوية . لأجل الملايكة
اللى كنت بتحام معاهم مایز علوش منا .

(الرئيس حنفى يصل الى المقهى فيصافحه المعلم
شده بحرارة ويقدمه الى ناشد أفندى ويتحدث
الجميع بأصوات غير مسموعة . وبين حين وآخر
يشير الرئيس حنفى الى بدوى أفندى)

بدوى أفندى : (مستهرا فى قراءة الجريدة بصوت مرتفع) ..
وسرعان ما افرغ فى جوفه كمية من (هنيهة)
البقية على صفحة ..

الشاويش عفيفى : (مكمل) صفحة ستة !

(بدوى أفندى ينشغل فى تقليب صفحات الجريدة .
وسيد يحاول أن ينتهز فرصة تنفيه الرئيس حنفى
الى خطر الشاويش عفيفى)

الشاويش عفيفى : (مستطردا) تعرف صفحة ستة دى يا بدوى
أفندى .

أهو أنا انكبت فيها الشهر اللى قبل اللى فات .
أنا واليوزباشى أبو خليل فى حقة واحدة . هو
فوق . وأنا تحته بشوية . قاعد متسلطن على
سطر لوحدى . عفيفى أحمد عفيفى . أصلهم
نشروا كل اللى اترقوا . واسم محسوبك جه لرق
فى اعلان صابون لوكس . مرسومة فيه حورية
زى القمر .

بدوى أفندى : مالك واقف موش على بعضك يا سيد ؟ !
(سيد يلفت نظر بدوى أفندى صامتا الى وجود
الرئيس حنفى فيصاب هو أيضا بالاضطراب .
الرئيس يترك المعلم شاهده ويتجه ناحية بدوى
أفندى والشاويش عفيفى)

الشاويش عفيفى: تعرف ان مرأتى عاينه الجرنال تحت مرتبة
السريـر لغاية دلوقت ، بس خزقت عين الحورية ،
عقول النسوان صغيرة زى ما انت عارف .

الرئيس حنفى : السلام عليكم .
بدوى أفندى : (فى وقت واحد) السلام عليكم ورحمة الله
والشاويش عفيفى وبركاته .
وسيد

(الرئيس حنفى يسحب كرسيـا ويجلس بجانب
الشاويش عفيفى ، يزداد اضطراب بدوى أفندى
وسيد)

الشاويش عفيفى: اهلا وسهلا . موش تعرفونا بالناس الطيبين
(للرئيس حنفى) محسوبك عفيفى . صاحب بدوى
أفندى الروح بالروح .

الرئيس حنفى : يا الف مرحب . بدوى أفندى ده عزيز علينا قوى .
وأصحابه يبقوا أصحابنا على طول . ويزيدونا
شرف وعلو مقام .

الشاويش عفيفى: الله يحفظك . وحضرتك تاجر برضه ؟
الرئيس حنفى : تاجر ! لا انا رئيس ..

بدوى أفندى : (مقاطعا فى اضطراب) حاتشرب ايه يا رئيس
حنفى . شـاى ؟ ! طبعا شـاى . شـاى صعيدى
(يرسل ضحكات مقتضبة)

الشاويش عفيفى: وحضرتك رئيس ايه بقى بالصلاة على النبى ؟
الرئيس حنفى : يا سيدى والله هم اللى عملونى رئيس . أصل
الحكاية انه ..

سيد : (مقاطعا) الشاى بالنعناع يا رئيس حنفى . موش
كده .

(متاديا) واحد شاي ونعتمه على الآخر .
بدوى افندى : (محاولا تغيير دفة الحديث) تعرفوا أن الجو
النهارد حر .. حر تمام .
الرئيس حنفى : حر ! بتقول الدنيا حر . يا بدوى افندى انت
ساعات تطلع لنا بكلام وحاجات غريبة قوي .
فين الحر ؟

(للشاويش عفيفي) انت حاسس بحر يا .. يا ..
بدوى افندى : عفيفي .. الشا ..

الشاويش عفيفي : (مقاطعا في سرعة) المعلم عفيفي . المعلم ..
الرئيس حنفى : (مكملا حديثه) يا معلم عفيفي . حقه الدنيا حر ؟
الشاويش عفيفي : ابدأ . الدنيا فل خالص . من حق احنا لسه
ماتشرفناش

الرئيس حنفى : حاقول لك بنس عايز منك خدمة يا معلم عفيفي .
مادام فيه صحوبة كده بينك وبين بدوى افندى .
اتوسط لنا عنده .

الشاويش عفيفي : يا سلام . الأمر .
(سيد يحضر الشاي ويضعه أمام الرئيس
حنفي)

الرئيس حنفى : يا سيدى أنا عندي شغلانة كويسة لبدوى افندى .
وهو راجل يستحقها وقدها وقودوها .
الشاويش عفيفي : ادام داخله في الكار بتاغه ومريجه . يبقى
خلاص .

الرئيس حنفى : (مستظردا في صوت خافت) تعرف ان ناثبد
افندى دهه بيجرى وراها . لكن أنا وزميلي كلتهم
عايزين بدوى افندى . وأدينا من أسبوع ..
اسبوع ! من عشرة أيام وحياتك واحنا نلح عليه .
وهو ولا هنا :

سيد : (بعصبية) الشاي ابو نعناع اهو . اهو يا رئيس
حنفي اشتره قبل ما يبرد .

الرئيس حنفى : الله . جرى لك ايه يا سيد . ما أنا شاياف الشاي
قدامى يا جدع (للشاويش عفيفي) اهو زميلي

جاين هنا دلوقتى . حاكم احنا بنيجى هنا في
قهوة الملوك لغاية ما تلاقى مكان . واصل الحكاية
كلها جديدة مابقلهاش كام شهر .

الشاويش عفيفى : مكان ايه يا ريس حنفى . انا موثى فاهم
حاجتن تخلق .. تصدك دكان يعنى ؟

الريس حنفى : دكان ! دكان ايه ؟ مكان متسع . اصل المكان مهم
جدا من غيره ما نعرفش نشغل ابدا . هو اللي
يجعنا ويرستقنا (لدوى افندى) انت من راى
والا لا .. يا بدوى افندى .

بدوى افندى : طبعا . طبعا . بس يعنى عايز اقول يعنى انه ..

(ام خليل تفتح النافذة وتطل براسها . بيدو خليل
في الحارة متجها نحو الدكاكين) .

ام خليل : هات السمن نباتى اصلى باواد .. والا ارجعك
بيه .. عدم المؤاخذه ياسى بدوى افندى . ياترى
أقدر اعرف الساعة كام ؟

بدوى افندى : (ناظرا لساعة الريس حنفى) الساعة .. الساعة
يا ستى حذاشر (المعلم شهده ينهض وهو ممسكا
بساعته الذهبية)

المعلم شهده : حذاشر وسبع دقائق بالظبط . موثى كده ياتاشد
افندى . اصل ساعته ماشية على ساعة القصر
دقيقة بدقيقة .

(ناشد افندى يحرك راسه مؤيدا للمعلم شهده .
الشاويش عفيفى ينهض مودعا في عجلة)

الشاويش عفيفى : حذاشر ! الوقت ده حرامى صحيح . ببسرق
البنى آدم . سلامو عليكم . أما الحق اروح
المصنع .

الريس حنفى : (باستفسار) المصنع ! تعمل ايه في المصنع يا معلم
عفيفى . ما تأخذنيش في ده سؤال . حاكم انا ..
بدوى افندى : (مقاطعا في حدة) انت ايه يا اخى ؟ ماتعلش
الراجل عن شغله (للشاويش عفيفى) مع
السلامة . مع السلامة

(الشاويش عفيفي يغادر القهى محيا . سيد
يهمس في أذن الرئيس حنفي بكلمات فتبدو على
وجهه تعبيرات الجزع)

الرئيس حنفي : بوليس ! .. ياتهار أغبر ومطين . دا أنا كنت
حا أندب حنة دين دبة .

(سيد يعود الى المهمس في أذن الرئيس حنفي)
أم خليل : على فكرة ياسى بدوى افندى . ماتتعبش نفسك
علشان ورق العرايض أنا عندى شوية ورق من
النوبة اللى فاتت . بتقول الساعة كام ؟

بدوى افندى : حداشر .
المعلم شهدة : شايف يا ناشد افندى سامع . بتكيدنى . دا أنا
لازم أطرده لها .. استنى (يسبح) سبحان الله .
سبحان الله .

ميسيد : (مواصلا حديثه الذى بدأ همسا مع الرئيس
حنفي)

بدوى افندى : موش مصدقنى اسأل بدوى افندى .
أم خليل : (مؤيدا) بخمسة جنيه . الراس بخمسة جنيه
اسبيك بعافية بقا ياسى بدوى افندى . لاجل
الحق أخلص الهدوم السوداء .

بدوى افندى : (فى امتعاض) السوداء !
أم خليل : يقلعنى . بعد الشر عنك وعن الهدوم السوداء
ألف مرة . أصل الحكاية راجل عجوز . كان عمدة
قد الدنيا بيموت بقاله كام يوم .

بدوى افندى : بالتجلاعى يعنى !
أم خليل : (ضاحكة) بالتجلاعى ! الله يجازيك ياسى بدوى

افندى ضحككتنى . قصدى يعنى أهله مستنتين
بعيد عنك وعن احبابك موته النهارده . بكره .
النهارده . بكره . حالته خطر بعيد عنك . فبنته
طلبت منى أخيط لها فستانين مسود لاجل تبقى
مستعدة . ناقصين على تشاطيب . عايزة أخطف
رجلى النهاردة على العصر اوديهم وانتهى (يظهر
خليل عائدا بالسمن) ما تهد ياواد شويه .. انت

ماشي على قشر بيض ! اطلع ورينى اللى جبته .
أفوتك بعافية يا سى بدوى افندى . . ياواد .
(أم خليل تغيب من النافذة)

بدوى افندى : الله يعافيك (لاريس حنفى) انت ايه يا أخى .
كنت بالغ راديو . نازل كلام فى كلام فى كلام .
الرئيس حنفى : أعمل ايه ما هو قال لى انه صاحبك . يا ستار ده
راجل ناعم بشكل . تعبان . تعرف لو كان فضل
شوية كمان ؟ كان قشقتش مجلس الإدارة كله .
حاكم الزملا جايين هنا دلوقت . بدوى افندى !
نعم .

الرئيس حنفى : يا بدوى افندى مد لنا ايدك بقى وقول يا معين .
عايزين واحد زيك نور ومليان شهامة ورجولية
يمسك لنا السكرتارية . سكرتارية النقابة . تعرف
ان المعلم شهده بقى له يومين يزن على ودانى
علشان ناخذ ناشد افندى (هنيهة) أما ابليس
ابن ابليس صحيح . المعلم عفيفى ؟ !
سيد : شفت زغرته لبدوى افندى لما جه يقول لك
الشا . . . الشاويش عفيفى .

الرئيس حنفى : ماخدتش بالى والله يا سيد . خمسة جنيه الراس !
ياها أرخص البنى آدم فى البلد دى . ده رأس
الخروف بقت بعشرة جنيه .

(يتوافد بعض العمال على المقهى . يتبادلون مع
الحاضرين التحيات بالأيدي والبسمات) .

الرئيس حنفى : بدوى . سيد . أنا موش عارف أقول لكم ايه على
المعروف ده . الزملا أهم جم أهم . . أما نقعد
مع بعض شوية أقول لهم على الحكاية ونمشى على
طول . . قبل ما يهوب الشاويش عفيفى تانى
(يهم بالسير ولكنه يتوقف وهو واضعا يده على
كتف بدوى افندى) . وحياة غلاوة الحبايب عندك
يا بدوى افندى لتفكر بجد معنا أنا تارك لك
يومين تلاته . وإن شاء الله تكون قسمتنا مع
بعض (بفخر) تعرف المنشور اللى كتبناه سواك !

اللجنة وافقت عليه كله . بالحرف .
 (الرئيس حنفى يتجه الى زملائه فيجلسون حول
 المناضد مجتمعين وهم منصتين لحديث غير مسموع
 وان بدت آثار خطورته وأهميته على وجوه العمال
 وحركاتهم ونظراتهم) .

سيد : (وهو يخرج من جيبه قطعاً نقدية) خليك انت
 نايم كده مبلط في الخط لفاية ما المعلم يلهم
 منك ام خليل . وناشد افندى يلطش شغلانة
 النقابة . اتفضل أدى تلاته تعريفة . وتلاته
 تعريفة تمن الشاى . ييقوا تلاتة صاغ . كل اللى
 خر من ايد الدخاخنى . خليك كده نازل بيع في
 اعصابك ، وايمك ودموع عينك لغاية ما تدوب
 حقة بحتة .

بدوى افندى : سيد ! رجعنا للاسطوانة من تاتى . هو انا ناقصك
 يا سيد . صباحية ايه دى المقتدلة . نقابة ايه
 يا ابن الحلال انت موش شايف تعابين الحكومة
 اللى مسرحينهم ورا روس الجدعان . عايزنى
 أخش في الحديد تاتى . كفاية سنتين . السنة
 بعشرة . (ينشر الصحيفة امامه في عصبية)
 لايعام . خلينا في تجارتنا . لا ريس ولا شريك ولا
 حكومة ولا عهدة ولا عفيى الدفعة بسىجارة
 بلقمة .. بقرش . أهى ماشية . وريك بيعدلها .
 وانا راضى بقليلى (بحد صارم) يا سيد اجدادنا
 قالوا في الامثال القناعة كنز لا يفنى .

سيد : طبعا لا تفنى . لكن ماهياش كنز . دى بلوه .
 دى .. دى خنوعية . (هنيهة) استغفر الله .
 خلّيت الواحد كفر يا شيخ . استغفر الله . استغفر
 الله . بس يعنى القناعة دى (لحظة تردد) والا
 بلاش ..

أحد الرواد : حسابك يا سيد
سيد : حاضر . جاى ..

بدوى أفندى : أيوه بلاش كفر . وروح شوف أكل ميشك روح
(ينظر الى ساعة سيد وهي في يده) يا خبر !
الساعة قربت على حذاشر ونص ولسه ماعرفتشي
حامل ايه النهاردة . (بدوى أفندى يقلب
صفحات الجريدة ويستقر على أحداها . سيد
يفاديه قانطا . بدوى أفندى يحدث نفسه وهو
يطالع الجريدة)

بدوى أفندى : أيوه يا سيدى . وما سيدك الا أنا . عندك .
عندك . ايه الكلمة دى ؟ يا خالق الكون . حروف
الجرنال بقت نهم . كل حاجة اتخفست . الرغبة
صغر والقرش بقى يادوب يجيب بصلة . والناس .
والناس عقولها طارت منها . . . الدخاخنى ده
نصاب . عشر سجائر بتلات قروش ؟ ! ده انا دمي
ساح فيهم (يشير الى رأسه) نهايته . ايه (يقرأ
في صوت رتيب) لبت نداء ربها أمس سليله المجد
والشرف وربة الجود والكرم حرم المرحوم (يتوقف
عن القراءة) المرحوم كمان ! الله وانا مالى ومال
وجع القلب ده . اشتغل مع النسيوان ؟ ! والله
أهو ده اللى كان ناقصك يا بدوى .
(بدوى أفندى يحرك رأسه فجأة فتقع عيناه على
عيون المعلم شهده وناشد أفندى ، معلقة
فيه)

بدوى أفندى : يا مغيث ! بقى دى عيون بنى آدمين . أما حكاية .
مالهم متصلبين كده . طيب . اتصلب لهم انت
كمان . . هه

(بدوى أفندى يسدد نظرات طويلة الى المعلم
شهده وناشد أفندى فيضطربان ويجفل عيونهما
مرات . ناشد أفندى يحاول اتفاد الموقف بقول
شئ للمعلم شهده بصوت عال)
ناشد أفندى : وتعرف بقى الالتماس الجديذ اللى كتبته ده .

حاضيه أنا ومحمد أفندي القط . وترفّع على
طول للوزير . الوزير راسا .

بدوى أفندي : (مقلدا لصوت ناشد أفندي وهو يشرع في قراءة
الصحيفة من جديد) الوزير راسا ! ياسلام .
من جناب ناشد أفندي الكهنة أبو شعير مسبب
صاحب المعلم شهده أبو سبحة فالصو للوزير .
للوزير راسا . يا . . يا خالق الكون . ده شاب
صغير . لا حول الله . .

(يدقق في الجريدة) شوف بيضحك في الصورة
ازاى ولا واخذ خوانه ويبجى الموت ويروح خاطفك
ياسى . . عمر . . عمر النقيب المدرس بمدرسة
شبرا الابتدائية (متأوها) دنيا !

سيد : مالها الدنيا يا أخ ؟

بدوى أفندي : فائية يا سيد . غداره . شوف غمك ناشد أفندي
خلل فيها قد ايه ؟ شوف بسلامته وبسلامتهم
والشوايش عقيسى مبرطعين فيها ازاي يمين
وشمال وشوف الزهرة دى اللى انقطعت قبل
أوانها (يشير الى الصحيفة في اسى) وتقول لى
مالها الدنيا . صحيح مالها ؟ !

سيد : لا حول الله . ده بتاع اثنين وعشرين سنة بالكثير .
لكن قل لى مكتوب حاجة في الجرنال عن هدم
بيوت الحنة لاجل السكة الجديدة السراية بسلامته
(يشير الى القصر)

بدوى أفندي : واثت صعبان عليك ايه يا اخى . مايهـدوا ان
شالاه بيوت العالم كلها . حد شريكه . البلد
وملكه .

سيد : صعبان على القهوة اللى متاويانا .

بدوى أفندي : يا اخى . ريك يعدلها . اضربها طرمة

سيد : وتكون قديمة ! لكن ياترى هو متجوز يا بدوى
أفندي .

بدوى أفندي : مين ؟

سيد : الشاب اللى صورته في الجرنال ده .

بدوى افندى : اه . ! موش باين فى النعى يا سيد (بعد برهة)

مؤكد لا . تعرف ليه ؟ ما فيش والد فلان وفلان .
موجود ابن المرجوم على النقيب بس . (يشيى
الى موضع من الجريدة) دهه اللى تلاقيه متجوز
عشرة بالقليل .. عمدة ياعم شوف متصابى ازاي
ومربى شنيت بينوا عليها عمارة

سيد : تعرف ان الشنب بيدى قيمة للراجل منا . لكن
عمدة ايه ده ؟

بدوى افندى : ده يا سيدى عمدة بلد فى الغربية .. الشيخ حامد
الملا (قارئاً بمهل) روعت الغربية أمس بوفاه رجل
البر والتقوى ، صاحب الجود والكرم ، عميد
عائلة الملا .. يعنى رجلهم الكبير .. ده تلاقيه
سايب صفايح دهب .

سيد : (فى سخرية) طيب ماتلحق تروح وتكبش .

بدوى افندى : يا بى سيد بلاش نقورة . اسمع . الشغلانة دى .
أنا عمرى ملحا اتبطر عليها ابد . حالروح ياخويا
حالروح . بس لسه بافكر اشتغل مع مين . ماهى
موش سهلة زى ما أنت فاكرك . منع الشاب ، والا
مع العمدة ؟ ! الحقيقة العمدة باين عليه غنى
قوى . لكن .. حاجة تجنن صحيح ..

سيد : (مقاطعاً) ماتشوف لك شريك وتشتغوا مع
الأتنين .

بدوى افندى : (غاضباً) سيد ! غال الله ولا غالك . شريك !

أنا اشتغل مع شريك . أنا اعرف حد بالشغلانة .
اللى اتحدفت على من باب السما علشان يشفطها
منى . أنت بتهزر والا ايه . لا يا سيد بلاش هزار
فى المسألة دى . كله كوم وتجارة الدموع دى كوم .
أنا بس صاحبيها فى الدنيا دى كلها أوعى لسانك .
يفلت منك هنا والا هنا . اعمل معروف يا سيد .
(هنيهة) شريك ا . لا ياعم أنا اضحى بواحد .
بناقص واحد . بس مين يا بدوى .. مين يا بدوى .
الشباب والا العمدة مين ، مين يا بدوى .. (سيد

يفادر بدوى أفندى تلبية لنداء أحد رواد المقهى .
بدوى أفندى مستمرا في الحديث الى ذاته)

سيد : حاضر . جاى .

بدوى أفندى : مين يا بدوى ؟ الشاب . . بس العمدة أغنى .
أيوه أغنى . لكن دكه شباب . وحياته غالية على
جماعته أكثر من العمدة . يصدقوا كل حكاية
بسرعة وأيديهم أحسن . حاجة تحير . يعنى كان
لازم يموتوا الاثنين في يوم واحد . استغفر الله .
الواحد كفر . أيوه . (هنيهة) أحسن شيء إن
الواحد يستخير الله .
(بدوى أفندى يخرج من جيبه قرشا)

بدوى أفندى : (مستطردا) الملك للشباب . لا لا . الملك للعمدة .
والكتابة للشباب . . هه .

(بدوى أفندى يدير القرش على المنضدة ثم يكتمه
براحة يده ويرفعها عنه ببطء فيبدو عليه شيء من
عدم الرضا) .

بدوى أفندى : (مستطردا) أعوذ بالله . الملك . العمدة .
(يرفع صوت الرئيس حنفي محدثا زملاءه وهم
شارعين في مغادرة المقهى) .

الرئيس حنفي : (وهو يتحدث حتى يتلانى صوته) يا زملاء .
النقابة موش بسن هى اللي في خطر . دى البلاد
كلها في خطر من هنا ورايح لأبد نشتمل كلنا بد
واحدة . . يا الله بينا يا أخوانا .

بدوى أفندى : (ساهما) الملك مع العمدة . لا . الاسنخارة دى
ما تنفعش . اتلخبطت . . أيوه ا نعملها مع الراجل
المهخخ اللي جاى . يتقلقل من هناك دهه . . اذا
جه القهوة وقعد ناحيتى أروح للشباب . واذا . .
قعد ناحية أبو شمعر مسبب وأبو سبعة فالخسو
أروح للعمدة . وتبقى حكايته تتدبر أيوه . هه
هه . . .

(يظهر في الحارة رجل عجوز يتكئ على عصا
ويتجه نحو المقهى . يترث قليلا مستطلعا للرواد
ثم يتردد في سيره . وأخيرا يتجه نحو ناشد أفندي
والمعلم شهده . بدوى أفندي يتتبع قلعا خطوات
الرجل العجوز) .

ناشد أفندي : (قائما مرحبا بالقادم) أهلا . أهلا . محمد أفندي .
تصدق بالرب الالتماس طلع مزهزه جدا . حاي عجبك
خالص . اتفضل . يا معلم .. محمد أفندي القط
ريس قلم العقود . زميلي . تصدق بالرب يا معلم
كان بيمر بين ايديه مية .. ميتين كونتراتو في
اليوم بالآف الجنيهات .

بدوى أفندي : يا خالق الكون ! العمدة . العمدة ..

(بدوى أفندي ينهض مفسادرا المقهى عبوسا
غاضبا) . (المعلم شهده يقدم كرسيه لمحمد أفندي
القط ويساعده على الجلوس عليه)

المعلم شهده : أنعم وأكرم يا محمد أفندي . نورت القهوة (هامسا
لناشد أفندي) ماتسأله لنا عن كونتراتو بدوى
أفندي أنا لازم أعزله .. تصدق بالله ..

ستار

الفصل الثانى



الزمان — مساء ذات اليوم

المكان — سرادق للعزاء بأحد شوارع القاهرة . غير مسقوف .
تضيئه الكهرباء فى الصدر منه المقابيل للجمهور اصطفت كراسى
مذهبة يحتلها رجال تثقلهم الاناقة والوقار . فى حين يشغل الكراسى
الخيزران المنتشرة ببقية السرادق رجال أقل منزلة . شيخ مقرئ
يتربع مقعدا عاليا وسط الكراسى المذهبة . فى الجانب الايمن من
السرادق باب يقطعه المعزون داخليين اليه وخارجين منه . أما الجزء
الخالى من الشارع فهو الرصيف الذى ينتصب على قمته — فى مقدمة
المرح — عمود نور .

المآزل الحديثة تحيط بالسرادق من كل جانب . يتميز منها المنزل
المواجه للجمهور . أغلب غرفة مضادة . تتسع به غرفة ذات شرفة
مطلّة على السرادق . بين فيها من وقت لآخر نساء هزيناات متشحات
بالملايس السوداء .

السرادق فى حركة دائمة . بين حين وحين تدور على الحاضرين
القهوة والسجائر لنمايل رؤوس المعزين مع ترتيل المقرئ آيات
القرآن والسنتهم تشعك فى أحاديث هامسة) .

المقرئ : (مواصلا لقرئيله) .. « ولو بسط الله الرزق
 لعباده لبقوا فى الارض . ولكن ينزل بقدر مايشاء ،
انه بعباده خير بصير » .

أصوات : الله . الله .

أحد المعزين : حكمته .

المقرئ : « وهو الذى ينزل الغيث من بعد ما قنطوا . وينشر
 رحمته ، وهو الولى الحميد » .

أحد المعزين : جل جلاله .

المقرئ : صدق الله العظيم .

أصوات : أحسنت يا سيدنا الشيخ . أحسنت .
المقرء : (وهو يحيى المعزين بيده) الله يكرمك . الله يخليك .

(يتحرك بعض المعزين في الانصراف . وهم يشدون على يد ابن المتوفى الواقف على باب السرايق .
تسمع رويدا رويدا همهمات حزينة صادرة من النساء اللاتي يشغلن الغرفة المضاءة بالمنزل الواقع بصدر المسرح يرددن كلمات بكائية وراء (معدة ») .

صوت المعده : لأروح الجوامع واسالك يا خطيب .

أصوات النساء : يا خطيب

صوت المعده : أنهو بنات تجعد بلا أخ شجيج .

أصوات النساء : أخ شجيج .

صوت المعده : لأروح للجوامع واسأل العلما .

أصوات النساء : العلما .

صوت المعده : أنهو بنات تجعد بلا شججا .

أصوات النساء : بلا شججا .

(يسمع فجأة في خارج السرايق نافذة تفتح بشدة . سيدة تصرخ . صوت محرك سيارة يرتفع في جلبة ثم تتحرك فتخف جلبتها شيئا فشيئا)

صوت : (صراخ سيدة) ابني . ابني .

(السرايق يصيبه الهرج . ويسرع بعض المعزين الى الخارج مستطعين الابر) .

المعزى رقم ١ : هو المرحوم تارك أم عايشة . والا ايه ؟

المعزى رقم ٢ : أم ! دى تبقي لازم عايشة محنطة من أيام قدماء المصريين .

(يعود المعزون الذين كانوا قد خرجوا للاستطلاع يقول أحدهم وقد لمح في عيون الجالسين

تساؤلا) .

أحد المعزين : ده البوليس قابض على طالب عنده منشورات

ضد الانجليز . (يظهر التأثير على وجوه المعزين)

المعزى رقم ٢ : والله لما يقبضوا على كل الطلبة في البلد . ما عدا لهم عيش هنا .. هم ودلائهم .

(فترة سكون وهمس بين المعزين . يدخل الى السراىق الاساذ سليم المامى يشد على يد ابن المتوفى ثم يتوجه الى مقدمة السم اذى حيث يجلس وسط بعض المعزين بعد أن يتبادلواياهم تحيات تفصح عن سابق معرفة بينه وبينهم) .

المعزى ١ : دايا متأخر يا اساذ سليم .
آخر ٢ : بقى تبقى محامى المرحوم وماتمشيش فى جنازته ؟ !

الاساذ سليم : مرحوم ايه يا سعادة البيه . ده لهف من الدنيا على الاقل ثلاثين سنة زيادة عن عمره .

المعزى ٣ : يا راجل . لكل اجل كتاب .

الاساذ سليم : (متندا) ايوه صحيح . لكل اجل كتاب .
النهاردة بطوله ، والله يا اخوان قضيته جنب زميل .. محامى برضه .. مسكين ابنه طالب فى الجامعة بتاع تسعناشر عشرين سنة . انقل فى مظاهرة امبارح .

المعزى ١ : بتاعه ميدان الاسماعلية . ياسلام دى البلد كانت مشعللة نار . عمال وطلبة . واللى بطرابيش . واللى بعمم . واللى حافى . اولاد صغرين . والله اولاد بتوع عشرة واتناشر سنة . مالحقوش بينبسموا للدنيا .. كان الرصاص يفجر الدم من جنتهم وهم بهتفون الجلاء .. الجلاء ..

المعزى ٢ : ما هو علشان كده ياسيدى الحكومة والانجليز نازلين انتقام واعتقال وسجن فى الناس .

المعزى ٣ : دول بيقولوا انهم موش عارفين يمسكوا لجنة الطلبة والعمال اللى عملت المظاهرة (بحماس)
دول عيال جدعان صحيح .

المعزى ١ : ده انا سمعت ان الحكومة منعت اهالى الشهداء من تشييع جنازتهم . خايفين لتقلب مظاهرات .

الاستاذ سليم : والله مهنا عملوا . الشعب مفتوح خالص .
ووغية بقى ستة على ستة . والبلد زى ماتكون
قاعدة على بركان . بكره ينفجر ويطلع بالانجليز
وحكومة الانجليز . و . . (يلفت حوله قبل أن
يستطرد) وبسلامته كمان . لكن . لكن ايه ده
كله . أنوار وكراسى مدهبه وصوانى قد القصر .
طيب والله تلاقى المرحوم ماعمل الزينة دى كلها
يوم فرحه .

المعزى ٣ : يا راجل . ارحم الاموات . هو لسانك ده
مايرحمش حى ولا ميت .

الاستاذ سليم : ميت ! طيب احلف لك بياه انه لو كان يعرف
ان ابنه (يشير الى الشخص الواقف بجانب
المرادق يتلقى العزاء) حايغزق الفلوس دى
على روحه كان حرن ومامتش .
(علامات استنكار مشوية بالسخرية والضحك
المكتوم)

المعزى ٢ : لا . ده انت يظهر كنت زينا . ما عندكش فكرة
صحيحة عن المرحوم .

الاستاذ سليم : فكرة صحيحة ! انتم بتكلموا عن انهى مرحوم .
موش العمدة ؟ !

المعزى ١ : يا استاذ سليم . هو انت فاكركنا فى الحكمة .
حاتلف بعقولنا . طبعاً العمدة .

الاستاذ سليم : امال فكرة صحيحة ايه . طيب والله العظيم لو
كان فيه طريقة انه يعرف مطرح ماراح بالصيوان
المنور ده وال . . . المصاريف دى كلها كان
يستائن من عزرائيل ساعتين . يلطش اولاده
قلبين ويلم فلوسه ويأجدها معاه الآخرة .
المعزى ٢ : أعوذ بالله .

الاستاذ سليم : (مواصلاً الحديث) بقى الراجل اللي كانت جفته
تفضل على جسمه بالسنتين لغاية ماتدوب حته
حتة . وهو رايح جاى من البنك يخزن فلوس

ويشتري أرض . الرجل الذى لما طلبوا منه فى
البلد نص فدان علشان المدرسة الجديدة ...

المعزى ١ : (مقاطعا) الله يرحمه مات عن ربعية فدان
بالتليل .

الاستاذ سليم : (مستطردا) كل الذى طلبوه نص فدان وحياتك .
راج متنازل عن العمودية . وطفش من البلد
بحالها (بعد توقف برهة) طيب والله العظيم
أولاده ما عملوا الزيتة دى الا علشان يفرجوا
عن انفسهم بعد العيشة الضنك التى كان
دافنهم فيها .

المعزى ٣ : لا . انت بتظلم الرجل .

الاستاذ سليم : اظلمه !

المعزى ٢ : احنا برضه كنا ظالمينه زيك . وحاسبينه بخيل .
الميه ماتخرش من ايده .

الاستاذ سليم : بخيل ! ده البخل الذى كان ربنا حايبتلى به الشعب
المصرى كله جمعه وصبه فى الشيخ حامد الملا
(بعد تردد) الله يرحمه بقى .

المعزى ١ : (محتجا) لا . لا . اسمعى بس يا استاذسليم .
اصل المسألة (يتوقف المعزى عن الحديث بسبب
مرور خادم السراق بالقهوة على الاستاذ سليم
الذى يمتنع بداءة ولكنه بعد برهة يغير رأيه .
ويتناول فنان القهوة بحماس وعصبية يدهشان
الخادم والمعزين . وما أن يتحرك الخادم بعيدا
حتى ينطلق الاستاذ سليم فى حديث من يؤسد
موقفا اتخذه) .

الاستاذ سليم : عندا فيه ! والله انا ماحب قهوة المياتم . لكن
اهو عندا فى المرحوم . تصوروا انه ملاكاش
يرضى يقابل المستاجرين فى بيته علشان
ما يضطرش يقدم لهم قهوة أو شاي . فكان
دائما ابدا يقابلهم على قهوة المحطة ...

المعزى ١ : (مقاطعا) طيب ماهو برضه فى القهوة مضطر انه ...

الاستاذ سليم : (مستطردا) فى يوم ياسيدى كنت مسافر اترافع فى قضية فى طنطا وحصل تأخير فى ميعاد قيام القطر . فقلت اروح اقعد على قهوة المحطة اشرب لى فنجان قهوة . وكنت فعلا مصدع ومتقريف . وفى حاجة لفنجان قهوة على الريحه بضبط دماغى . فلقيت الشيخ الملا قاعد يبرم فى شنابه . والحاجة الوحيدة لاجل الحق - اللى كان المرحوم ما يخلش عليها ابدًا مسألة تبريم شنباته . كان يصرف عليها ولا عشرة جنيه فى الشهر ، زيت وكريم وحلاقة . هه . المهم . نادى على الشيخ الملا وقال لى ابن حلال . عاوزك فى حكاية مهمة . وسقف جه الجرسون وطلب لى واحد قهوة ...

المعزى ٢ : (مقاطعا) طيب امال ايه بقى !

الاستاذ سليم : (مستطردا) حلمك على تسوية قعد يستشترنى فى اشكال له مع المستاجرين . مجانًا طبعًا . وجه واحنا قاعدين تلاته مستاجرين . سقف برضه وطلب لهم قهوة . ونستى يا افندم ان القهوة تيجى . ابدًا . وكاننا قاعدين فى صحراء . والجرسون رايع جاي يجيب قهوة هنا وقهوة هناك ولا كاننا احنا موجودين . وجه ميعاد القطر قمت من غير ماتيجى القهوة .

المعزى ٢ : طيب وذنّب المرحوم ايه فى الحكاية دى ؟ !

الاستاذ سليم : (فى سخرية) عرفت ياسيدى بعدين انه متق مع الجارسون يديله قرشين بقشيش على أساس انه مهمّا طلب منه قهوة لضيوف تحل عليه يقول حاضر ويصهين على الطلب وما يجيبوش . (يتبادل المعزون نظرات باسمة ويدخل خلال ذلك الى السرايق شخص غريب الهيئة يرتدي

سروالا واسعا ويده مسبحة طويلة . وفوق
رأسه عمامة خضراء كبيرة يبين منها خصلات
من الشعر الاحمر) .

ذوالعمامة الخضراء: (في تساؤل عام) هل هذا ماتم المرحوم الشيخ
حامد ؟

أصوات متفرقة : أيوه . هو .

(ذو العمامة الخضراء يرسل نظرات في أرجاء
السادق ضامنا ثم يختار مكانا يتجه إليه في سكون
ووقار . وهو يحرك مسبحته ويجلس في هدوء ،
ثم يرفع رأسه إلى السماء برهة) .

ذوالعمامة الخضراء: (في صوت منغم) يا رحيم أرحم عبادك
الصالحين .

(يغود ذو العمامة إلى وضعه فيطرق برأسه
إلى الأرض وحيات مسبحته تتحرك بين أصابعه
في صمت . يهرع إليه ابن المتوفى وبعض المعزين
يستفسرون عن شخصيته . ذو العمامة لا يتحرك
ولا يجيب ، ويظل على صمته التام فيبتدد الجميع
من حوله ذاهلين) .

المعزى ٣ : يكون مين ده ؟

الاستاذ سليم : حايكون مين يعنى ؟! عفريت بخل المرحوم ؟!

المعزى ١ : يا راجل حرام عليك . أنا كنت عايز أقول لك

(يحاول الاستاذ سليم مقاطعته ولكنه يصر على

مواصلة حديثه) يا أخى اسمعنى امال . هو

مافيش طريقة أبدا تخلى الحامى يسمع وما

يتكلمش . ياسيدى احنا كنا برضه زيك فاكرين

المرحوم بخيل لغاية ماشقنا النهاردة الراجل

اللى اسمه .. اسمه ..

المعزى ٢ : بدوى أفندى ..

المعزى ١ : تمام . بدوى أفندى . ده بكى على النعش زى

الأطفال تمام .



الاستاذ سليم : ويكون مين بدوى أفندى ده ياسيدى (وكان الاسم يثير ذاكرته) بدوى !

المعزى ١ : راجل غلبان عنده ثلاث عيال (متلفنا حوله) هو راح فين ؟ كان قاعد هنا من شوية . أهو ابن المرحوم جاى الناحية دى . أما نسأله . (يتجه ابن المرحوم ناحية الاستاذ سليم ، وهو بيدى بيديه حركات الشكر للمعزين . يستوقفه أحدهم) .

المعزى ١ : هو بدوى أفندى راح فين ؟
ابن المرحوم : بدوى أفندى ، ده راجل مسكين صحيح . هو دلوقت جوه فى البيت بيستريح ويباكل لقمة . مسكين . شفت كان عامل فى روحه ايه . والله ولا واحد منا . تصور اتنا ماكناش نعرف عنه حاجه أبدا قبل النهارده .

الاستاذ سليم : (بدهشة مصطنعة) ياسلام .
(ابن المرحوم يميل ناحية الاستاذ سليم ويشرع فى حديث يخفت شيئا فشيئا) .
ابن المرحوم : أصل بدوى أفندى ده ياسيدى كان ..

(صوت ابن المرحوم لا يسمع ، وعلامات الانفعال بالحديث تبدو على وجوه السامعين . تخرج من بيت المتوفى المضاء سيده فى ملأه سوداء الى الشارع . وتسرع فى ذات الوقت الى الشرفة فتاة شابة بملابس سوداء تنادى على السيدة فى حرص) .

الشابة : يا أم خليل . يا أم خليل ..
(أم خليل تقف عند عمود النور ، وهى تفصح عن وجهها) .

أم خليل : نعم ياستى سميرة .
سميرة : تعالى والنبي خمس دقائق بس . أحسن نسيت أقولك على فستان تخطيطه لى بسرعة .. تعالى .

(أم خليل تعود الى المنزل من جديد . وقرب

الباب تفاجيء بدوى افندى خارجا منه . وجهه
منتفخ وعيناه محمرتان . أم خليل تشهق وتخبّط
صدرها براحة يدها) .

أم خليل

: بسم الله الرحمن الرحيم . سى بدوى افندى !
ايه اللى جابك هنا (بدوى افندى يصعق للمفاجأة
ولا يعرف ماذا يفعل . يلتفت يمينه ويسرة ثم
يجذب أم خليل بعيدا عن المنزل والسرادق ويقف
معها بجانب عمود النور فيكشف الضوء عن حالة
وجهه) .

أم خليل

: يا ندامتى . الشر بره ويعيد ياسى بدوى افندى .
مالك كفى الشر . مالك وشك منفوخ كده زى
القربة . وعينيك .. عينيك زى الدم . من ايه
ده يا سى بدوى افندى . مش كفاية اللى حصل
لراسك فى الشغل امبارح . ماتقول لى من ايه
ده ؟

بدوى افندى

: (بضيق وحيرة) من .. من المرحوم .

أم خليل

: المرحوم ! العمدة .. انت تعرفه ؟

بدوى افندى

: ياخالق الكون (بعد تردد) ده كان صديقى الروح
بالروح . اصله كان .. قصدى يعنى .. اصله
كان من زبائنى . الله يرحمه .

أم خليل

: (بفرح) يا سلام ياسى بدوى افندى . شوفة
الدنيا محندقة قد ايه وبتلمنا على بعض دايم .
المرحوم زبونك وبنته زبونتى أنا (تترعد بدوى
افندى) ماهى دى اللى كانت مكلفانى بالفساتين
السود وقعدت تتنقور على . تعرف انى خلصتهم
على الميعاد مظلوط . يادوب جبتهم من ههنا
وروح المرحوم راحت طالعة على طول .
(بدوى افندى يزوم متأثرا)

أم خليل

: يا سلام ياسى بدوى افندى على طيبة قلبك .
لازم كنت بتعزه قوى ياخويا .

بدوى افندى

: مين ؟ !

- أم خليل** : المرحوم ! اتاريك يا ضنای بسايب شغلك واخوانك
(في لهفة كمن تذكرت شيئا هاما) اسكت على
اللى جرى في الحنة النهاردة . اسكت ياسى بدوى
افندى (في ولولة) يا أختى / يا اختى ..
- بدوى أفندى** : خير ان شاء الله .
- أم خليل** : موش الحكومة جات فتشت قهوة الملوك وقلبتها
فوق دماغ المعلم شهده . وراح لونه مخطوف
زى الليمونة . ولسانه انحاش في حلقه . اياك
ينحاش على طول . وبقي ياسى بدوى افندى زى
وليه من غير راجل .
- بدوى أفندى** : يا خالق الكون . ليه ؟
- أم خليل** : قال بيقولوا ياخويا بيضوروا على حاجات
ومحتاجات وأبصر ايه عرايظ .
- بدوى أفندى** : (متزعجا) عرايظ . عرايظ ايه يا أم خليل ؟!
- أم خليل** : عرايظ ضد الحكومة .. بتاعة عمال النقابة .
وتبضوا على شوية منهم .. وماحناش عارفين
ان كان الرئيس حنفى منهم والا لا .
- بدوى أفندى** : يا خالق الكون . الرئيس حنفى ! (ساهما) كله
من الشاويش عفىنى .
- (أم خليل لاتسمع جيدا عبارة بدوى افندى
الاخيرة)
- أم خليل** : بتقول ايه يا خويا . هه . (ضاحكة) وفي الآخر
جرجروا المعلم شهدة من شنباته للقسام . وعدوك
.. الحنة اتملت بنى آدمين جنتهم عاملة زى
الدواليب ياخويا . وعينيهم .. عينيهم بتبرق في
وش الناس زى عنين أم قويق (مستعيذة)
يا أختى . اللهم احفظنا .
- بدوى أفندى** : وامتى حصل ده كله ؟ !
- أم خليل** : على العصر (متذكرة) وعلى فكرة .. سيد
القهوجى كان يدور عليك . هه (تحرك الى
داخل المنزل) اسبيك بعافية بقى احسن عايزنى

جوه (من داخل المنزل) أوعى تنسى الليلة تكتب
المرايظ للواد خليل ياسى بدوى أفندى . أنا
حافضل صاحبة لفاية ماتيجى .
بدوى أفندى : (ساهما) والله لحق الشاويش عيفى يلم روس
النقابة بسرعة !

(بدوى أفندى يتكىء على عمود التور وهو
يحدث نفسه . ذو العمامة الخضراء يرفع رأسه
داخل السراقق فجأة الى أعلى صارخا)
ذوالعمامة الخضراء: يارحيم أرحم عبادك الصالحين .

(ذو العمامة الخضراء يعود الى جلسسته الساكنة
من جديد ، ينظر الناس بعضهم الى بعض
مستفسرين . ابن المرحوم ينهض من جلسسته مع
الاستاذ سليم وأصدقائه وكأنه يختم حديثه) .
ابن المرحوم : يمكن يكون خلص اكل دلوقت . أما أروح أنادى
له ..

(ابن المرحوم ينشغل بعض الوقت في مصافحة
بعض المعزين ثم يغادر السراقق ويهم بالدخول
الى المنزل فيلمح بدوى أفندى متكئا على عمود
النور فيذهب اليه بقية المعزين داخل السراقق
يستأنفون الحديث) .

الاستاذ سليم : (محركا رأسه في استنكار) والله ما أصدق
الا لما أشوف بدوى أفندى ده بعينى . بدوى !
موش عارف الاسم ده لازق في دماغى ليه .
المعزى ١ : ياه . دا أنت صعب خالص يا استاذ سليم .

الاستاذ سليم : باقول لك لا يمكن اصدق . بقى الشيخ الملا
يصرف على عيلة بتلات عيال في المدارس ! والله
ما يجيله قلب يصرف على نملة
المعزى ٢ : لا .. تعرف احسن حاجة ايه !

الاستاذ سليم : ايه ؟
المعزى ٣ : نتراهن . تلاته جنييه لثلاثه جنييه يااعم .
الاستاذ سليم : (ضاحكا) ايه قصدك يعنى . كل عيله جنييه

(باصرار) موافق يا سيدى .. تلاته جنبه لتلاته جنبه .

(ابن المرحوم يضطحب بدوى افندى الى داخل السراى حتى يصل به الى فريق المعزين الجالسين مع الأستاذ سليم ويقدمه اليهم) .

ابن المرحوم : حضرته بدوى افندى (بعد تردد) صديق المرحوم والدى .

بدوى افندى : (وهو يهم بالجلوس) صديق ! ده الله يرحمه كان ولى نعمتى . انا وأولادى التلاته .

(تترقب الدموع من عيني بدوى افندى . ابن المرحوم يشرع فى مغادرة المكان) .

ابن المرحوم : استغفر الله يا بدوى افندى . استغفر الله عن أنفسكم .

أصوات : اتفضل . اتفضل .

الأستاذ سليم : (لبدوى افندى) وخضرتك بقا تعرف المرحوم من زمان ؟

(بدوى افندى يحس بخبرته كانه امام لجنة امتحان . يهز رأسه ويتنهد كى يكسب وقتا يرتب فيه اجابة مضمونة .) .

بدوى افندى : أعرفه أ أعرفه زى نفسى الى سلطنة جسمى تمام والمعرفة يا حضرة ماهياش بعدد الايام والسنين . المعرفة هى معرفة الروح للروح والقلب للقلب . الله يرحمه كان قلبه كبير . كبير قوى .

أصوات : الله يرحمه .

بدوى افندى : (مستطردا) يمكن مكان بيان عليه . لكن عطاياه دايما مستوره .. من تحت لتحت

(يسكت لحظات ثم يتابع ، وهو يراقب انفعالات المعزين لحدثه) رحمتك يارب . امبارح بالليل

زارنى المرحوم . .

الأستاذ سليم : فى البيت ؟ !

بدوى افندى : (بترنيد اعمى) فى البيت ..

الاستاذ سليم : يقول بقى حضرتك ان المرحوم زارك فى البيت . .
 بدوى أفندى : فى البيت . انا قلت فى البيت !
 الاستاذ سليم : امال فين يعنى ؟
 بدوى أفندى : فى المنام . فى المنام . امبارح ، تصور يابيه . .
 امبارح بس .
 المعزى ١ : (بتأثر) يا سلام .

بدوى أفندى : (مستطردا) وبعد ما سلم على مرة واثنين
 وتلاته . . دس فى جيبى عشرة اثناس ريال فضة
 بطلع على الآخر .
 وقال يا بدوى أفندى اوعى تشبى تمر على قبل
 ما اسافر قلت له مسافر فين يا عمدة ؟ قال لى :
 ارور احباب الله يا بدوى . اصلهم نادونى (تغلب
 الدموع على بدوى أفندى فيخفق صوته ويشهق
 شهقة اليمه يتأثر لها الجميع . يحاولون هواسته .
 يعود الى استئناف الحديث فى شكل مناجاة
 حزينة) .

بدوى أفندى : وادبنى اهو مريت يا عمدة لقيتك سبقتنى
 وسافرت . وتركتنى لوحدى مع اولادى من غير
 حبيب ولا معين .

المعزى ٢ : (مواشيا) اجهد امال يا بدوى أفندى .
 المعزى ٣ : أمر الله يا بدوى أفندى . لك رب .

بدوى أفندى : اى نعم أمر الله . لكن مين غيره يكسى العيال
 ويأكلهم ويدفع لهم مصاريف المدارس . ألف
 رحمة تنزل على روحك يا عمدة .
 (تبدأ علامات التأثر على وجه الاستاذ
 سليم)

الاستاذ سليم : ما هو البركة بقى فى اولاده . وخصوصا متحت
 بيه .

(يصل ابن المتوفى « مدحت بك » فى هذه اللحظة
 الى السراى ويشارك المعزين الجلوس) .
 بدوى أفندى : ربنا يبارك فى اعمارهم . الله يرحمك يا عمدة .

كنت دايما تكلمنى عن ابنك مدحت بيه . حاكم انا
ما كنتش شفت مدحت بيه ابدا . اصرى عمرى
ما زرتة الله يرحمه فى البيت . كنا دايما نتقابل
بره (بعد تردد) فى . فى الجامع . على
القهوة ...

المعزى ٢ : (الاستاذ سليم) شفت ! زى ما انت بتقول

تمام . كان يحب يقابل ضيوفه على قهوة
المحطة . موش فى البيت .

بدوى افندى : تمام . قهوة المحطة . ياما قعدنا . وياما رحنا .

وياما جينا (يريت على كفف مدحت بك) وياما

اتكلمنا عنك يا مدحت بيه . كان يعزك قوى .

(يغلب التأثر على مدحت بك فيقوم وينتحي

ناحية يختلى فيها بنفسه) .

الاستاذ سليم : (وهو يدق النظر طويلا فى بدوى افندى) انت

شكلك موش غريب على . انا شفتك قبل كده .

انا متأكد انى شفتك . لكن مين ؟

(بدوى افندى يضطرب ولا يجد منقذا له سوى

أن يقوم فى اثر مدحت بك ويجلس بجانبه بحجة

مواساته)

المعزى ١ : لازم مع المرحوم فى قهوة المحطة . حايكون فين

يعنى

الاستاذ سليم : (بتردد) جايز .

المعزى ٢ : (الاستاذ سليم) هه . ايه رأيك بقى يا عم ؟

المعزى ٣ : موش برضه كنت ظالم المرحوم والا ايه ؟ ايدك

على الرهان

الاستاذ سليم : والله انا محتار .. بقى المرحوم الشيخ الملا

يصرف على ثلاث عيال فى الدارس . حاجة

تجنن صحيح .

المعزى ١ : يعنى بتكذب الراجل برضه (مشير الى بدوى

افندى) شوف حالته يا شيخ .

الاستاذ سليم : وانا ما اكديش نفسى يا تاس . انا اعرف الشيخ

الملا كويس . كويس قوى . الله يرحمه مات وهو واكل على مؤخر أتعاب قضية كسبتها له من اربع سنين .

المعزى ٣ : طيب وايه رأيك فى اللى قال لك على طبيعته و .. قهوة المحطة و ..

الاستاذ سليم : (مقاطعا) أيوه صحيح . حكاية غريبة (بعد هنيهة صمت) حد عارف بقى . يمكن كان بخيل فى حاجات . وكريم فى حاجات ثانية . ماهى لابد هى كده . والا ايه اللى زنق بدوى افندى على تمويت نفسه عليه بالشكل ده (هنيهة) طيب لما هو بالحالة دى سى بدوى افندى يروح يخلف ثلاث عيال مرة واحدة !

المعزى ٣ : تعرف بقى . انا عندى فكره . الرهان اللى عليك على جنبه من عندى (يخرج من جيبه جنبها) وتبرع بيهم لبدوى افندى رحمة ونور على الشيخ الملا . وتكفيرا عن ظلمنا له .

الاستاذ سليم : (بعد تردد) وهو كذلك . بس انا حادفج جنبه واحد فقط ومعاه كارت بعنوانى لاجل اذا تعذر فى حاجة يعرف ييجى لى .
(يقوم الاستاذ سليم من مكانه ويجلس بجانب بدوى افندى ويتهامس معه ثم يدس النقود والكارت فى جيبه)

المعزى ٢ : شهم طول عمرك يا أستاذ سليم .

المعزى ١ : ده يابا اترافع عن ناس مظلومين من غير أتعاب خالص

(بدوى افندى يحس بحركة دس النقود فى جيبه . يصطنع الامتناع لحظات ثم تسكن مقاومته تحت ضغط المعزين . وما أن يفارقه الاستاذ سليم حتى يقوم بدوى افندى بأخراج النقود وعدها بخلسة ثم يعيد وضعها بجيبه الداخلى وهو يحدث نفسه) .

بدوى أفندى : اتنين جنبه فى حكاية واحدة ! يا مانت كريم

يارب . بقى شى أحسن من شغلانة الرئيس
حنفى فى النقابة بستة جنبه عمى فى الشهر ،
ووراهم الشاويش عفيفى كمان . ياخالق الكون
وايه ده كمان ؟ كارت (يقرأ) سليم بكر المحامى
لدى الاستئناف العالى شارع ... (يمضغ بفيه
العبارات وهو يعيد الكارت الى جنبه) الهى
ماتحوجنا لمحامى أبدا .

(يبدأ بعض المعزين فى الانصراف . يتوجهون
الى مدحت بك ويشدون على يده . يقوم
بمصاحبتهم حتى باب السراى . يقف به مودعا
ومستقبلا المعزين . يظهر بالشارع الرئيس
حنفى وهو يسير بحذر شديد . يتجه نحو
السراى ويحدث مدحت بك) .

الرئيس حنفى : من فضلك .. موش ده ميثم المرحوم الشيخ
الملا ... العمدة ..

مدحت بك : (يهم بمصافحته وكأنه أحد المعزين) أيوه .
اتفضل .. شكر الله ...

الرئيس حنفى : (مقاطعا) طيب والله تعمل فى معروف وتشوف
لى اذا كان الأستاذ سليم المحامى موجود
والا لا .

مدحت بك : موجود . اتفضل .

الرئيس حنفى : لامعلش . اصلى عايز الأستاذ فى حكاية
مستعجلة . ومش لايق أنى أكله جوه . ولو
فيها رزالة شوية تقدر تضاى له ؟

مدحت بك : (مناديا) يا أستاذ سليم . اتفضل هنا . فيه
واحد عاوزك .

(ينهض الأستاذ سليم الى باب السراى .
فيفاجأ بالرئيس حنفى) .

الأستاذ سليم : مين ؟ . الرئيس حنفى ! ايه اللى جابك هنا .
الرئيس حنفى : رحى لك المكتب قالوا لى أنك هنا يتعزى .

جيت لك على طول . عرفت يا استاذ باللى
حصل ؟ ! نازلين قبض فى الزملا من الصبح .
والنهاردة سرخوا علينا فى القهوة والمصنع يجى
دسته مخبرين .. وهو قدرنا نفلت منهم .

الاستاذ سليم : طيب والمنشورات ؟
الرئيس حنفى : اديتها لسيد القهوجى يخبئها عند صاحبنا اللى
قلت لك عليه .. جدع مؤتمن .

الاستاذ سليم : وانت اح تروح فين ؟
الرئيس حنفى : عند الدكتور ميلاد . بس جيت اقول لك علشان
تكون عارف حا اشتغل من هناك .. سلام
عليكم بقى

الاستاذ سليم : مع السلامة . ابقوا ادونا اخباركم اول بأول .
(الرئيس حنفى يخفى فى حذر . الاستاذ سليم
يعود الى داخل السرداق وقد بدأ عليه التفكير
العميق — ام خليل تخرج من البيت وتتجه لمغادرة
المكان . تتوقف عند السرداق لحظات . تختلس
النظر لداخله من خلال فرجة فيه وتحديث
نفسها) .

أم خليل : هو فين لا فين ؟ .. اهو ! .. يا اختى عليه .
النبي حارسه وصاينه سى بدوى افندى . قاعد
فى الصوان زايته . امال . تاجر قد الدنيا ..
يعرف الناس الاكابر .
(ام خليل تعاود سيرها حتى تختفى . وفجأة
يرتفع صوت صاحب العمامة الخضراء) .

ذوالعمامة الخضراء : يارحيم ارحم عبادك الصالحين .
(صاحب العمامة الخضراء يسقط على الارض
متشنجا فى صراخ وثفتاته تتمثمان دون
ما توقف) .

ذوالعمامة الخضراء : يارحيم . يارحيم . يارحيم ..
(يهرول الجميع عدا بدوى افندى ناحية الرجل
ذى العمامة الخضراء يحاوطونه . يحاولون

اسعافه . الرجل يظل مستمرا في هلوئته .
بدوى افندى يقوم ويراقب حركاته بدقة يداخله
نوع غريب من الخوف يبدو على مظهره)

المعزى ٣ : يا مدحت ييه . خدوه جوه البيت . فوشوه
بشوية كولونيا

(الجميع يوافقون على هذا الاقتراح . يقطع
البعض لحمله داخل البيت . يتبادل المعززون
التعليقات . وبدوى افندى صامت . كله آذان .
تنتابه حالة قلق غامض)

المعزى ١ : اما راجل غريب صحيح .

المعزى ٢ : ده من اول مادخل . وهو كمشان فى نفسه

زى القنفذ يسبح ويقول يارحيم ارحم عبادك
الصالحين .

المعزى ١ : حد شافه قبل كده ؟

المعزى ٣ : أبدا دى اول مرة .

المعزى ١ : له فى خلقه شئون .

(يعود الى السراى بعض المعزين الذى ساعدوا

فى نقل صاحب العمامة الخضراء فتسائلهم بعض

الاصوات)

أصوات : ايه الحكاية ؟

احدا المعزين القادمين : حالة تشنج عصبى بسيط . بدأ يفوق .

المعزى ١ : عرفتم مين هو ؟

احدا المعزين القادمين : ده راجل على باب الله . من محاسيب

المرحوم . كان بيصرف عليه هو وعيلته .

أصوات : لا حول ولا قوة الا بالله .

الاستاذ سليم : (ناهضا) لا . عيلة تانية ! اسمعوا يا جماعة .

يظهر انى صحيح ظامت المرحوم . وطولت

لسانى عليه قوى موش قادر اتعد فى معزته بعد

كده . ضميرى بيويخنى الله يرحمه ويغفر لنا

جميعا .. عيلتين !

(الاستاذ سليم يخرج مصطحبا بعض المعزين .

بدوى افندى يختلى بنفسه وهو فى حالة عصبية

واضحة () .
(يهدى نفسه بصوت مسموع) من محاسيب
المرحوم ! كان يصرف عليه هو وعيلته ! والله
عال . . يعنى تلجر دموع تانى !
(بدوى افندى يقوم من مكانه وقد ازداد اضطرابه
وحديثه الى ذات نفسه) .

المعزى ١ (مشيراً الى بدوى افندى) شوف بدوى افندى .
حالته اتغيرت على طول .

المعزى ٢ : ده من حزنه بيكلم روحه . لا حول الله .
بدوى افندى : (مستطردا الحديث الى نفسه) يابختك الاسود
يا بدوى طلع لك عفريت من تحت طقاطيق
الارض . خطف الشفلانة اللى كنت مخبىها عن
كل الناس . خلاص راحت عليك . انتهيت
يا بدوى . . حاتعمل ايه لا قسمتك كده ! كانت
صبحية ايه دى المدغمشة بوش ابو سبحة
ثالصو على وش روباكية الدولة ابو شعير
مسبب .

(مدحت بك « ابن المتوفى » يدخل الى السراى ،
ساندا ذى العمامة الخضراء . يجلسه فى مقعد
بمقدمة السراى . يذهب هو الى ركن يجالس
فيه بعض المعزين ويتبادل معهم الحديث فى
مهمات غير واضحة . بدوى افندى يسلط
نظراته الفاضية الى صاحب العمامة الخضراء
الذى يعود الى جلسته الهادئة يحرك مسبحته
ثم يرفع راسه هاتفا)

ذو العمامة الخضراء : يا رحيم ارحم عبادك الصالحين .
(تتقابل عيون بدوى افندى وصاحب العمامة
الخضراء مدة غير قصيرة . ينتقل بدوى افندى
الى المقعد المقابل لذى العمامة الخضراء . بدوى
افندى يشرع فى التحدث اليه أكثر من مرة ولكنه
يعدل ثم يتشجع أخيراً) .

بدوى أفندى : (ساخرا) بقى انت من محاسيب المرحوم . .
هيه ؟

(صاحب العمامة الخضراء لا يجيب . يزداد
توتر بدوى أفندى)

جوى أفندى : (فى حلق) ما ترد على . ده انا عمري ماشفتك
عند المرحوم .

ذوالعمامة الخضراء : (فى هدوء مثير) ولا أنا !

بدوى أفندى : (فى حلق) لازم بقى كنت انا باشوفه فى حته .
وانت بتشوفه فى حته تانيه .

ذوالعمامة الخضراء : (بذات الهدوء وبلغة عربية فصحي) كنت
أراه فى البيت .

بدوى أفندى : فى البيت ! يا ضلالى . والله لا فضحك .

ذوالعمامة الخضراء : اسمع ! انا كنت قاعد ومراقب كل حركاتك
وسامع كل كلامك . اسكت احسن لى واحسن لك :
وخلى كل واحد ياخذ رزقه ونصيبه .

(بدوى أفندى يهم باليهوض . تتلاقى نظراته مع
نظرات صاحب العمامة الخضراء طويلا دون
حرك . مدحت بك « ابن المتوفى » يفاجئهم على
هذا الوضع) .

مدحت بك : الله ! انت تعرف بدوى أفندى يا عم موسى ؟
(بدوى أفندى وعم موسى يظلان على حالهما .
يشوب الاضطراب أيديهما ونظراتهما . يسرع
ذو العمامة الخضراء الى الحديث والحركة) .

ذوالعمامة الخضراء : الله يرحمه . هو الذى عرفنا ببعض .

وى أفندى : (فى استسلام وبعد تردد) الله يرحمه !
(تظل عيون بدوى أفندى وصاحب العمامة
الخضراء معلقة بعضها ببعض) .

((سستار))

الفصل الثالث

فصل ثالث



« المنظر الاول »

الزمان — صباح اليوم التالي من عام ١٩٤٦ .
المكان — نفس مكان الفصل الاول . الحارة الشعبية ومقهى
الملوك نلاحظ على الجدران بعض العبارات المعادية للاستعمار
والحكومة . واخرى تمجد الكفاح والشعب ، واللجنة الوطنية
للطلبة والعمال . الصبي ينظم المقاعد والمقاعد . المقهى خال تماما
من الزوار .. المعلم شهده يدخل وهو يحرك حبات مسبخته .

المعلم شهده : يا فتاح يا عليم . اللهم اجعلها صباحية ..
(يقضم حبيته وهو يلتفت حوله) أعوذ بالله .
احنا امتى يا واد (ينظر الى ساعته) الساعة
داخلة على تسعة ! يانهار زى بعضه . ومالها
منفضة كده زى قرافة الاموات الفقرا . فمين
سيد يا واد ؟ هو حضرته لسه ما شرفش ؟
الله ! هو فمين يا واد .
(صبي المقهى حائر . تسمر فى مكانه لا يعرف
ماذا يصنع . شفتاه تتحركان ذون أن تصدر
منهما كلمة واحدة) .

المعلم شهده : ما تنطق يا واد .. سيد فمين ؟
(يبدو سيد خارجا من المنزل الجواجه)
سيد : أنا أهو يا معلم . صباح الخير .
المعلم شهده : (ساخرا) أهلا . أهلا وسهلا . شرفت .
آنسنت . هات قهوة سادة تعدل مزاج المعلم

سيد ياواد (صارخا) بقى جباب حضرتك بتلقه
منى ماهية علشان تنتط في البيت مع أبو قردان
بتاعك سى بدوى . ونستايب لى القهوة تنش
الديان . . . موش كفاية المصايب بتاعة امبارح .
: اصل . . .

سيد

المعلم شهده : (مقاطعا) اصل ايه وفصيل ايه ؟!
سيد : اصل كنت باوصل امانة الرئيس حنفى لبدوى
افندى . . .

المعلم شهده : (مقاطعا) الرئيس حنفى ؟! الله هم موش قبضوا
عليه مع العمال ليلة امبارح ياواد ؟
سيد : لا يا معلم . . . ده هرب . . .

المعلم شهده : وطى صنوك . الحارة بقى في كل شق منها ودين
من ودان بسلامته .
سيد : (في صوت خفيض) دول نكتوا عليه الارض .
موش عازمين له طريق ايدا . فات على نص
الليل في البيت وادانى رابطسة ورق لبدوى
افندى .

المعلم شهده : عرايط برضه . . . مالناش دعوة ياواد . كفاية اللي
حصل امبارح بقى انا المعلم شهده راجل لى
احترامى ومقبامى يجرجرونى على القسم زى
الحرامية (بعد برهة) لكن شفت العيال اللان
ماسكينهم . عيال جدعان زى الورد . الواحد
بمقام مية .

سيد

: وانا باطلع ربطة الورق . حسبت بى ام خليل .
نادت علي وقالت لى . . .

(يدخل أحد الزبائن الى المقهى في عجل)
: واحد شاي بسرعة ياسيد احسن مستعجل .
: (مناديا) واحد شاي ظبط عندك . مستعجل .
(يبدأ تواقد بعض الزبائن . المعلم شهده يجلس
على المقعد المخصص له) .

الزبون
سيد

المعلم شهده : يا الله ياواد روح شوف شغلك . وهات لى
الشيشة والقهوة .. يا كريم ! (سيد ينشط فى
اجابة طلبات الزبائن . عم موسى يظهر فى الحارة
بملايسه العادية . بيدو كمن يبحث عن شئ .
يطيل النظر الى المقهى ورواده بطريقة تثير انتباه
المعلم شهده وشكه) .

عم موسى : هل هذه قهوة الملوك ؟
المعلم شهده : (بارتباب) هى ياحضرة .. لازم خدمة ؟
عم موسى : اشكرك .

عم موسى : (عم موسى يدخل الى المقهى . ويتبقى مكانا فى
مواجهة المعلم شهده . ويصفق مناديا) .
واحد ينسون .

المعلم شهده : (ناشد أفندى بيدو قادما . المعلم شهده يهال
له ويقدم له مقعدا يجلس عليه فى ثان كالمعتاد)
أهلا . أهلا . أهلا . اشرفت الاتوار يا ناشد
أفندى (ينظر الى ساعته) تصدق بالله ..
الساعة تسعة بالدقيقة . انت كنت فمين يناشد
أفندى امبارح العصر . كنا عايزينك قوى .

ناشد أفندى : اسكت يا معلم . انا كنت جاى ضرورى .
ومدى ميعاد لحمد أفندى ويوسف أفندى نخاله
وبقية الاخوان علشان نمضى الالتماس الجديد
ونبعته لمعالى الوزير .

المعلم شهده : (مقاطعا) كانوا منتظرينك . ماجيتش ليه
يا ناشد أفندى ؟ دى حصلت حنة حكاية .

ناشد أفندى : (مستطردا) باقول لك كنت جاى . وأنا ماشى
لقيت السكك كلها مزروعة ناس من كل شكل .
فكرتنى بالشوارع أيام سنة تسعناشر . ماأنا
أصلى اشتركت فيها مع الموظفين .. تصدق بالرب
يا معلم . كلنا .. كل الموظفين اضرينا فى وقت
واحد . هيه ! فمين أيام زمان . المهم قعدت أدور
على سكة غاضية ما لقيتش أبدا . كلها انسدت

بالخلق وفجأة يا معلم وأسمع لك هيصة وخبط ورقع والناس يتقول الانجليز . البوليس . نزلوا ضرب في الشعب . أقولك الحق . أنا راجل مجزت خلاص . خدت بعضى ورحت راجع مروح على طول . هو فيه للبنى آدم الا عمر واحد يا معلم . فما بالك بقى فى اللى ماعدش له الا ربع عمر .

المعلم شهده : تعرف .. تعرف بقى يا ناشد افندى . الهيصة

والخبط والرقع اللى بتقول عليهم دول . وصلوا لغاية هنا . اكركبوا فوق نافوخي أنا .

ناشد افندى : كلام ايه ده يامعلم ؟! فى قهوة الملوك . ايه

المناسبة ؟ ومحمد افندى ونخله افندى كانوا قاعدين ؟

المعلم شهده : نخله مين وشجرة مين يا ناشد افندى ده اللى

حصل هنا امبارح عمره ما جرى أبدا . تصدق بالله (بعد تردد) جرجرونى على القسم

(بعد تردد) أقول لك ايه بس . جرجرونى من . من قفايا ، هيه .. ادبنى عقلك بقى ..

من قفايا !

ناشد افندى : (منزعا) كلام ايه ده ! رحى القسم !

المعلم شهده : رحى القسم ! دول بهدلونى بهدلة يا ناشد

افندى . ربنا ما يورك .. تقولش قاتل لى قتيل .

ناشد افندى : وايه المناسبة ؟ رخصة القهوة انتهت والا

ايه ؟

المعلم شهده : رخصة ايه يا ناشد افندى . الانجليز يا ناشد

افندى ..

ناشد افندى : الانجليز ؟

المعلم شهده : ايوه الانجليز . الانجليز والحكومة يا ناشد

افندى . الدوشة بتساع امبارح اللى بتقول عليها ..

ناشداً أفندي : طيب وإيه اللي حشرك انت فيها !
المعلم شهده : ما هي دي المصيبة . قسمتي يا ناشد أفندي .
امبارح بعد العصر بشوية كنت قاعد هنا . في
مطرحي دهه في إمان الله . باشد لي نفسين
شيشة . وشوية وأم خليل راحت خارجه من
البيت وواقفة على العتبة (يتوقف كهن تذكر
شيئا فجأة) الله . أم خليل !

ناشداً أفندي : مالها كمان أم خليل ؟
المعلم شهده : (مناديا لسيد) واد يا سيد . اسمع (سيد
يخضر إليه) انت ياواد ماقتليش لسا حسنت
بك أم خليل وانت طالع للدمعوق بدوي أفندي
تودي له .. هه . (يشير بيديه اشارات ذات
معنى له صلة بربطة الأوراق) ونادت عليك .
كانت عايزه ايه ؟

سيد : أم خليل آه . كانت عايزاني أشوف بدوي
أفندي كتب العرايظ لمدرسة الواد خليل والا لا ؟
المعلم شهده : هيه ؟

سيد : ما كتبهش .
المعلم شهده : طبعا ما كتبهش . هو ده صنف يعمل في حياته
خير أبدا . ده مافيش وراه غير النكد والتعب .
شوف حا يضيع مستقبل الواد ازاي . تصدق
بالله يا ناشد أفندي . أنا باحب الواد خليل ده
كانه ولد من أولادي . ده من عمر سمبكيه
ابني .

ناشداً أفندي : المهم وبعدين ؟

المعلم شهده : اسمع ياناشد أفندي . أنا لابد أعزل سي قطران
ده . واد يا سيد . ابقى روح قول لأم خليل
المعلم خلاص طلب من ناشد أفندي انه يكتب لها
العرايظ . وأتعايك عندي أنا يا ناشد أفندي .
هات القهوة لناشد أفندي ياواد .

سيد : حاضر .

(سيد يمضى لتلبية مطالب الرواد . المعلم شهده

يشرع في استئناف حديثه مع ناشد أفندى) .

المعلم شهده : أهو زى ما باقول لك كده يا ناشد أفندى . أم

خليل كانت خارجة من البيت . وقتت على العتبة

حسيت زى اللى عايزه حاجة . قمت ناديت سيد

وقلت له روح شوفها عايزه ايه . حاكم أنا احب

أريح سكاتى زى ما انت عارف . وكلنا كنا

قاعدين فى القهوة . العمال وأفندية المعاش

بتوعك وبقية الزباين . ويادوب الواد سيد

بيخطى الحارة ، الا وحنة دين كبسة من البوليس

على القهوة . تصدق بالله ...

ناشد أفندى : (مقاطعا فى انزعاج) كبسة !

المعلم شهده : كبسه ياناشد أفندى ! والدنيا ظاظت والحارة .

انلمت . وراحوا نازلين قبض على العمال .

وخدونى أنا معاهم . تصدق بالله كان فيه ناس

فى الحقة فرحانة فى (يزغد ناشد أفندى) لكن

تعرف .. أم خليل شفت اونها انخطف وانطريت

تعرف انها بنت حلال صحيح . كلام فى شرك .

(يقرب فمه من أذن ناشد أفندى ويهمس . صوت

عم موسى يرتفع مناديا سيد) .

: عن أذن حضرتك ؟

عم موسى

: نعم .

سيد

: هو موش فيه واحد بيتعد هنا اسمه بدوى

عم موسى

أفندى ؟

: (بارتباب) ماله !

سيد

: أصله أعطانى ميعاد اقباله هنا . وأهو أنا قاعد

عم موسى

انتظره ما جاش وساتأخر عن اتشغالى ومصالحى

: (كمن تذكر شيئا) آه . هو حضرتك عم موسى ؟

سيد

: اى نعم .

عم موسى

: أهلا وسهلا . ده بدوى أفندى موصينى اقول

سيد

لك انه جأى لك حالا . موش تقول لى من الصبح

يا عم موسى . تحب شأى والا قهوة بقى ؟

هم موسى سيد
 هم موسى سيد
 هم موسى سيد
 هم موسى سيد
 أشكرك . شربت يانسون كفاية .
 لا والله ما يصح أبدا .
 صحيح شربت . أشكرك .
 على الطلاق بالثلاثة ما يمكن أبدا .
 يبقى واحد شاي بالنعناع لأجل اليمين .
 (وهو يفادر عم موسى) وكان واحد شاي
 بالنعناع ووضع .

(صوت المعلم شهده يرتفع وهو لا يزال يواصل
 حديثه ناشد أفندي) .

المعلم شهده :
 بأقول لك أولاد . . أولاد راضعين لبن أمهم
 وشاربين جدعنة أبوهم . اللي عامل ، واللي
 طالب ، واللي ماتعرف له صنعة . قلب الواجد
 منهم على لسانه عدل . تصدق بالله . الواجد
 منهم ما يتحكم إلا في حبة العرق بتاعة بكرة .
 لكن ايه ؟ واقفين قدام المأمور والظباط والهيصة
 كلها زي السبوعه .

ناشد أفندي : طيب وانت دخلك ايه في الحكاية ؟
 المعلم شهده : جاي لك . قال ايه يا سيدى . القهوة بقت
 (يحاول أن يتذكر) بقت ايه ؟ اللهم صلى على
 النبي . كانت على لسانى . سبحان الله . آه .
 بقت و . . وكر . تمام . وكر .

ناشد أفندي : (بانزعاج) وكر !
 المعلم شهده : أى وحياتك وكر .
 ناشد أفندي : (بانزعاج أشد) وكر !

المعلم شهده : ما تتخضش كده ياناشد أفندي . دى عبارة
 بسيطة . أنا برضه كنت فاكّر المسألة كبيرة .
 لكن لما سألت عرفت ان وكر يعنى تعسده
 للعمال . عمال نقابة الرئيس حنفى . أما قرينة
 على أمخاخ الحكومة . طيب وهى القهوة معموله
 لايه يا خلق . موش للقعدة . والا يعنى اللقطة

(يضحك ضحكا عاليا) كويسة دى ؟ ! (يلتفت

فتقع غيناه على عم موسى) شايف الكتف اللى
قاعد هناك ذه يا ناشد أفندى ؟

ناشد أفندى : ماله !

المعلم شهده : أقطع دراعى لو ملاكشن وذن حكومة (بعدهنيه)
مخير .

(سيد يحضر القهوة لناشد أفندى ولكن هذا
الآخر يهم ناهضا فى ارتباك) .

ناشد أفندى : تصدق بالرب يا معلم . انا راسى حا تنفجر
من الصداع (يرنو بطرف عين الى عم موسى)
أنا مش قادر أقعد . أبدا . خالص (ناشد أفندى
يتحرك مغادرا المقهى وفى اثره المعلم شهده) .

المعلم شهده : وعرايظ الواد خليل يا ناشد أفندى ؟ مستقبل
الواد !

ناشد أفندى : عندك بدوى أفندى . صداع يا معلم . صداع
مفاجيء .

(يختفيان ولكن أصواتهما تسمعان) .

صوت المعلم شهده : الله .. الله .. وشغلانة النقابة اللى
كلهنا الرئيس حنفى عليها !

صوت ناشد أفندى : الرب يغنينا . أنا ماليش علاقة بالرئيس
حنفى ولا بالنقابة يا معلم . ماليش أى علاقة
خالص .. بالمره ناهم بالمره .

سيد : الله . الراجل ماله قام مسروع كده . يالله !
الركب اللى تودى أحسن من إالى تجيب .

(تفتح نافذة أم خليل وتطل منها) .

أم خليل : عملت ايه مع بدوى أفندى يا سيد ؟
سيد : أهو نازل أهو .

(يظهر بدوى أفندى بباب البيت ، ويخطو فى
الحارة الى المقهى) .

أم خليل : صباح الخير يا سى بدوى أفندى . اياك يكون

قهرك على المرحوم خف . ده انت يا ضناى كنت
مقطع قلبك عليه حقت .

(عم موسى يتحنج بشكل يلفت نظر بدوى أفندى)
(لعم موسى) عدم المؤاخذه فى التأخير ياعم موسى

عفوا . عفوا يا أخى .
(لام خليل) الحمد لله يا ست ام خليل . على
فكره العرايظ حاتكون جاهزة على الضهر ان
شاء الله .

(يسمع صوت بائع الصحف ينادى قبل أن يندف
الى الحارة) .

الاهرام ، والمصرى . اقرا حوادث ميدان
الاسماعيلية . الاهرام . والمصرى . اهرايك
يا بدوى أفندى .

(بدوى أفندى يتناول الجريدة ويتجه مرحبا بعم
موسى) .

(وهى تغادر النافذة) روح ربنا يتويك على كل
من يعاديك .

(بدوى أفندى يكتفى بشكرها بحركة من يده .
ويصل الى مكان جلوس عم موسى) .

أهلا نورت حارتنا .
نور الله قدرك ومقدارك .

يا اخويا ايه الملائظ الجميلة دى . انت لابد كفت
فى الازهر .

(بعد تردد) تقريبا .
تقريبا ! ده باين قوى . تعال يا سيد شوف عم

موسى يشرب ايه ؟
أشرك كثيرا . شربت .

والله لازم تشرب حاجة . علشان يبقى شاربين
النعمة مع بعض ده حتى يبقى فال كويس .

يبقى قرفة لاجل اليمين .
وعندك قرفة مع شاي بالجليب واليقسمات لبدوى

أفندى .

بدوى أفندى
عم موسى
بدوى أفندى

بائع الصحف

ام خليل

بدوى أفندى
عم موسى
بدوى أفندى

عم موسى
بدوى أفندى

عم موسى
بدوى أفندى

عم موسى
سيد

عم موسى : الفاتحه يا أخ ان الله يعمر بيننا . ويفتح قلوبنا
لبعضها . و .. ويحط ثره في طريقنا .. انه
على كل شيء قدير .

(يندمج الاثنان وأيديهما متشابكة في نالوة فاتحة
الكتاب .. سيد يقترب من بدوى أفندى قائلا) :
معاك سجائر ؟

سيد

(بدوى أفندى يسلم السجائر لسيد وهو مستهزئ
في قراءة الفاتحة . سيد يتوجه الى محل يائع
السجائر)

صوت بائع السجائر : ألا قل لى يا سيد . ايه اللى حصل لييلة
أبارح ؟

سيد : انت ماكتتش هنا وإلا ايه ؟!

صوت بائع السجائر : (يده تظهر ان فقط وهى تعد السجائر) لا ..
أصلى كنت .. ذول ستاشر سيجارة يا سيد ..
مظبوط .

سيد

صوت بائع السجائر : ما تقول لى يا سيد . حصل ايه ؟ أصلى
كنت غفلان شوية .

سيد : يا نهار زى بعضه . بقى يا راجل ما حسيش
بالزيطه والرقع والضرب ! ده البوليس نزل قبض
على عمال المصنع والمعلم .

صوت بائع السجائر : يا خبر أغبر . عمال المصنع ! دول زبائنى .
زبائنى ..

سيد : (وهو يغادر المحل) زبائنىك ! طيب نام بقى
وشخر ودخن مع المالاكة وبيع لهم سجائر عقبال
ما يفرجوا عنهم .

سيد

بدوى أفندى : (وهو يتناول من سيد ثمن السجائر) سيد ده
أحسن من أخ يا عم موسى . راجل من ضهر
راجل . بس عنده شوية أفكار كانت حا تودينا
سكة اللى يروح ما يرجع . نهايته ..

عم موسى : أنعم وأكرم يا أخ سيد .

سيد : الله يحفظك . ربنا يوفق ويعمر بيناتكو ويفتح

السكة في وشكم دايما ان شاء الله

بدوى أفندى : عم موسى ده راجل طيب . وفنى في شغله .

مرتب على الآخر . بذكك ياسيد أنا موش كنت

باطلب دايما من الله انه يرزقنى بشريك ابن

حلال نشغل باخلاص مع بعض . والواحد منا

يريح اخوه .

سيد : الحمد لله . اهو استجاب .

عم موسى : الحمد لله ! وهو خير ربنا كتير قوى .

بدوى أفندى : ألف حمد وشكر ، حقك يا سيد لو كنت سمعت

كلامك واشتغلت مع الرئيس حنفى .. يا رب

استرها ..

سيد : الا من حق . عملت ايه بربطة الرئيس حنفى

الى جبتها لك ؟

بدوى أفندى : فكرتني . ربطه ايه ؟ دى شوية منشورات من

الى كنت كتبتها للنقابة في الاسبوع اللي قبل

الى فات فاكرك ! لما ما عجبتهمش كتابة ناشد

افندى وقالوا عنها دى بتنوم اللي يقرأها ..

وعاملة زى طلبات الاسترحام .

سيد : هيه !

بدوى أفندى : وأنا مالى ومال المنشورات يا عم . اسمع أنا

حا اطلع أجيبها لك في جرنال وتوديتها للرئيس

حنفى احسن تجيب لى مصيبة واثت عارف ان

الشاويش عيفى عارفى . (ينهض جانباً عم

موسى) .

بدوى أفندى : تعال معايا يا عم موسى اتفرج على الاوضة ..

وما دام ما مندكش سكن اليومين دول اسكن

معايا . ما احنا خلاص شركة . والشركة

شركة في كل حاجة . الاصول كده .

(بدوى أفندى وعم موسى يختفيان داخل البيت

ويظهر في نفس الوقت المعلم شهده ضارباً كفا

بكف) .

- المعلم شهده** : أما راجل عجوز وخفيف صحيح . الله . واد
يا سيد . وذن الحكومة راح فين ؟ .
سيد : وذن الحكومة ! وذن الحكومة مين يامعلم ؟
المعلم شهده : وذن الحكومة ياواد . اللي كان قاعد هنسا
متقنعر ييخلق يمين وشمال وخوف ناشد أفندى
وجاب له صداغ وخلاه يهيج من القهوة .
(سيد لا يحير جوابا) .
المعلم شهده : أما اذك واد عديم المفهومية والحداقة صحيح .
يا واد وذن الحكومة ! البوليس السرى ابوشعر
أحمر اللي كان قاعد الناحية دى، يا واد .
سيد : أبو شعر احمر ! (يضحك) آه . . لمفهوميك
يا معلم . ده ولا وذن ولا رجل ولا عين . ده
عم موسى شريك بدوى أفندى .
المعلم شهده : شريكه ! شريكه فى آيه ؟
سيد : شريكه فى التجارة .
المعلم شهده : والله عال . حضرته بقاله شريك ! والله كبر
الفار الاجرب وبقاله شريك وشركه .
سيد : آمال ! ده ربنا فاتحه عليه قوى اليومين دول .
المعلم شهده : طيب ياأخى ما يفارقنا هو وشريكه . سبحانك
يارب . حكمتك . تعطى الحلق للى بلا ودان .
انجر هات لى شيشه . (يشرع سيد فى التحرك
فيمستوقفه المعلم شهده) .
المعلم شهده : (بصوت خفيض) اسمع يا واد . قرب بعلى
قرب كمان . أم خليل صحيت والا لسه ؟
سيد : صحيت وصبحت على بدوى أفندى .
المعلم شهده : طيب ويتاع القوطه فات ؟
سيد : لا يا معلم . يلزمك قوطه أروح أشتريها لك ؟
المعلم شهده : لا . أنا عايز أشتري من الراجل يتاع امبارح .
قوطنه كبيرة ورخبصة . ده قابلنى دلوقت وقال لى
جاي . روح شوف شغلك وهات لى الشيشة .
(لنفسه) صبحت عليه ! سيدى يا سيدى . .

آدام ربنا اداہ ما يفارقنا ويسيب سكانا في أمانة
الله . هو الواحد حايلاقيها منين والا منين .
بدوى أفندي من ناحية . والبوليس من ناحية .
والضرايب من ناحية . وحماتي من .. من كل
ناحية . بقي دى عيشة .. ؟

(يسمع صوت بائع الطماطم يقترب شيئا فشيئا
ثم يدخل الى الحارة .. يتلفت الى المعلم شهده
يتبادلان غمزات تأكيدا لاتفاق سابق ، والمعلم
شهده يشير الى نافذة أم خليل) :

بائع الطماطم : يا قوطه ياللى حمارك يسكسف حب الرمان .

ياست ياللى خدنى القوطه امبارح . ياست .

المعلم شهده : (هامسا الى بائع الطماطم) ست أم خليل .

بائع الطماطم : يا ست أم خليل . ياست أم خليل .

(سيد يحمل الشيشة الى المعلم . يتوجه
بالحديث الى بائع الطماطم وهو يضع الشيشة
أمام المعلم) .

تسديد : مالك يا راجل عمال تزعق من الصبح .

المعلم شهده : (ناهرا) ماتسييه يا أخى يشوف رزقه . خليك
في شغلك أنت .

(تبدو احدى سيدات الحى على عتبة دارها)

السيدة : يا عم يا بتاع القوطه . تعالى .

(يتوجه اليها بائع الطماطم وتبدأ بينهما مساومة
غير مسموعة . سيد منهما في وضع جمراته
الغار على فوهة شيشة المعلم شهده) .

المعلم شهده : الايراد حالته ايه النهارده ؟

تسديد : نص نص يا معلم . ما فيش عمال خالص عتبول
يم القهوة .

المعلم شهده : البركة في بوليس الحكومة يا سيدى . تصدق .

بالله الحكومة دى عاملة زى ما تكون حما .

تسديد : حما !

المعلم شهده : حما . . اتصور بقى ان الشعب ده كله راجل .

تسديد : اتصور كده يعنى ، ومتجوز .

سيد المعلم شهده : متجوز ! متجوز مين ؟
يا بنى آدم بأقول لك اتصور . بلاش دى ..
اتصور ان الشعب كلته كان اتنين .. اتنين فقط
لا غير . راجل سبع كبير وغنصوره حليوه
ومقططه . متجوزين بعض . تعرف الحكومة
تبقى ايه ؟

سيد المعلم شهده : ايه ؟
حماته . حماة الرجال . ام حرمة . بوليس
الاقسام هو لسانها الكرابيجى البوليس السرى
هو مقابلها وعكنة حياة الخلق . والضرايب
شفاطة الجيوب . والرخص ومفتش الصحة
والبلدية دى الحكومة حماه بصحيح .

سيد المعلم شهده : طبيب والانجليز يا معلم ؟
الانجليز (بعد تفكير) دول بيقولا .. تعرف دول
بيقولا ايه ؟ حموات الحكومة نفسها . ياستار
استرها ! قوم شوف شغلك قوم بلاش تهلوس
(محرضا) يا واد يا بتاع القوطه . الله !
وبعدين ..

بائع الطماطم : (مستانفا) ياست يالى خدتى القوطه امبارح .
يا ست يا ام .. يا ست يا ام خليل .
ام خليل : (من داخل النافذة) مين . مين اللى بينده
(تظهر فى النافذة) مالك ياراجل عمال تصرخ
على الصبح . هو الشرا بالزور .

بائع الطماطم : هو حد قال لك اشترى . الحنة بخمسة اللى
اديتها لى امبارح ..

ام خليل : مالها يا ادلعدى ؟
بائع الطماطم : موش ماشيه
ام خليل : ماشيه ولا منكسده . انا مالى ! روح قول
للحكومة . اهى غلوسها . على وشها صورة
الملك . موش صورتى يا ادلعدى . اهو قصره
قدامك اهو . اتجدهن كده وروح قول له .

بائع الطماطم : دى موش بتاعة الحكومة : دى برانى . مزيفة .
أم خليل : مزيفة ! لم لسانك يا بتاع القوطه يا مفعص . .

مزيفة آيه ياللى مزيفينك على الرجاله راجل .
بائع الطماطم : الم لسانى ازاي . عايزة تلهفى القوطه اونطه .
بفلوس مزيفة . .

أم خليل : اسمع يا راجل يا مفعوص يا منحوس . يا للى
الفشرة منك بقرشن . انا صحيح واخدة مست .
لكن نمتى احسن من ميت راجل .

(بدوى افندى وعم موسى يظهران على عتبة
المنزل فى طريقهما الى المقهى) .

بدوى افندى : يا خالق الكون آيه إالى حصل . مالك يا أم خليل ؟
أم خليل : (وهى تتصنع الضعف والبكاء) الحقنى يا سى

بدوى افندى : الراجل بتاع القوطه نازل فى سبب
من الصبح (يصدر عنها نسيج) هو اكمنى وليه
ماليش حد استند عليه . ماليش راجل يدافع
عنى . .

المعلم شهده : (ناهضاً) مالكش راجل ازاي يا أم خليل .
جرى لك آيه يا واد يا بتاع القوطه . هو اخنة
موش مالين عينك والا آيه ؟

بائع الطماطم : (بلهجة المعاتب) الله . . الله . . يا معلم .
بدوى افندى : الله لما ياخذ أجلك . معلم آيه ويتاع آيه ا غارة
آيه دى اللى أنت عامله على الصبح ؟

المعلم شهده : (غاضباً) معلم آيه يا سى بدوى ! المعلم شهده
معلمك وصاحب البيت اللى متاويك كل ليلة .
بدل ما ياخدوك تحرى . ما انتاشن قد المعلم
يا سى بدوى .

(عم موسى وسيد يتدخلان للتهدئة) .
بدوى افندى : أما عجائب والله على دى الخلق . هى المسألة
أخناقة لله . هو حد كلمه يا جدعان . حد طلب
منه حاجة .

(بائع الطماطم يسارع الى جر عربته هاربا من الحارة) .

بائع الطماطم : وأنا كان مالى ومال الثورة المهيبه دى (بصوت خفيض للمعلم) ما قلت لك يا معلم بلاش .

أم خليل : روق دمك يا سى بدوى أفندى . سيب اللى يهاتى بعض فى لسانه .

المعلم شهده : كده برضه يا ست ام خليل . بقى دى جزاة اللى يحامى لك .

أم خليل : (ضاحكة فى سخرية وهى تختفى من النافذة) يحامى لى !

(عم موسى يجنب بدوى أفندى الى داخل المقهى .. حماة المعلم شهده تظهر خلال ذلك الحديث) .

حماة المعلم : تحامى لمين يا معلم يا عبايق على الصبح . قاعد تحامى لنسوان العالم وسلايب مراتك مقهورة

طول الليل . وابنك سميكسه مجبر ما عارف يتحرك يا كبدى !

المعلم شهده : (محاولا اسكاتهما) يا ولاية قولى يا فتاح يا عليم . قولى يا صباح النور . هو انت لسانك ما يغلطش

بكلمة خير أبدا ! وتيجى كلمة الخير منين . وانت حابس الخير

عن بنتى هو امبارح كان ايه فى الايام ؟ موش ليلة السبت ! والا انا كمان غلطانه فى حساب الايام ؟!

(المعلم شهده يجر حماته مرتبكا خارج الحارة) .

المعلم شهده : يا ولاية استمهلى شوية . أيوة ليلة السبت . تعرفى ايه اللى حصل بقى فى ليلة السبت دى .

ليلة سودة . البوايس ...

(المعلم شهده وحماته يختفيان تماما من الحارة وينقطع صوتهما تدريجيا فى حين يرتفع صوت بدوى أفندى) .

- بدوى أفندى : باه ده بنى آدم ! ده بنى عزرائيل . أعود بالله .
عم موسى : أتركه . أتركه لله .
بدوى أفندى : منه لله ابو سبحة فالصو ودقن غيره .. منه
لله . اهو كل يوم نكد من الصنف ده . يأخر
الواحد عن شغله . تتصور انه شال البرميل
وملاه رمل . الله ! هى الساعة بقت كام .
الساعة كام يا سيد ؟
(سيد يشرح اليه بإصابعه دلالة على ان الساعة
قد بلغت الحادية عشرة) .
بدوى أفندى : يا خالق الكون . حذاشر ! اتأخرنا يا موسى .
يالله نشوف شغلنا (يفرد أمامه جانباً من الجريدة)
بقى حضرته معلمى . معلمى أنا !
عم موسى : يابدوى أفندى لا تعكر دمك . هيا .. هيا بنا
على الحانوتى .
بدوى أفندى : الحانوتى !
عم موسى : اى نعم . الحاج عمر الحانوتى . على بعد
فركت كعب من هنا .. حانوتى درجة أولى
وحياتك . انت بتعمل مع اى حانوتى ؟
بدوى أفندى : ولا حانوتى .
عم موسى : ولا حانوتى ! امال كيف تتعرف على زباينك ؟
بدوى أفندى : من الجرنال .
عم موسى : (دهشاً) من الجرنال ! والله فكرة . وعلى هذا
توفر عمولة الحانوتى . ياسلام . لكن ياخسارة .
بدوى أفندى : خسارة ايه قى ؟
عم موسى : (بعد تردد واستحياء) حاكم أنا . لاتؤاخذنى .
لا أعرف القراءة .
بدوى أفندى : (صارخاً) لا تعرف القراءة ! يا خالق الكون .
يا راجل قل كلام غير كده . دا انت لسانك
ولا لسان شيخ الجامع . نحوى وفصيح
على الآخر .
عم موسى : اصل الحكاية كلها انى اشتغلت صبى مانون
سبع سنين . قبل ما ربنا يهدىنى لهذه الشغلة

والمأذون ما كان يتكلم طول السبع سنين إلا
 بالنحوى . لسانى لقط من لسانه .
 (بدوى أفندى يصمت تماما من وقع المفاجأة .
 يتبادل وعم موسى نظرات صامتة ثم فجأة ينفجران
 بالضحك - يسمع شخير بائع السجائر .
 الشاويش عفيفى يدخل الى الحارة ويقف بجانب
 دكان بائع السجائر يراقب بدوى أفندى دون أن
 يراه هذا الأخير . بدوى أفندى وعم موسى
 منهكان في حديث غير مسهوع) .

الشاويش عفيفى: يا اخينا . ياسيدنا . ماتصحى أمال (الشخير
 ينقطع) ادينى عليه سجائر معدن ممتاز .
 عم موسى : (مستكملا حديثه) وهو كذلك . هذه أحسن
 فكرة ، انا أروح للحاتوتى وانت تنقى لك زيون
 من الجورنال . وبعد ذلك نبقى نرتب الامور
 كلها (ينهض) السلام عليكم . على فكرة اذا كنت
 تعبنا اليوم خذ أجازة وأنا أعرف أسد .
 بدوى أفندى : أجازة أيه يا موسى . بقى نستفتح الشركة
 بأجازة .
 عم موسى : انت وكيفك . السلام عليكم .

(عم موسى يفسد المقهى والحارة . بدوى
 أفندى يعمد الى تصفح الجريدة وهو يصدث
 نفسه) .

بدوى أفندى : أهى ده آخر حاجة كان الواحد يتصورها (مقلدا
 عم موسى) لا أعرف القراءة . (يتوقف قليلا
 وهو يهمهم قارئاً) يا خراب بيتك يا معلم شهده .
 دى خلاص البلدية ماشية جد فى هدم البيوت
 لاجل السراية (هنيهة) ما يهدوا الى يهدوه .
 واحنا مالنا . . نبقى ندور على أوضه ثانية . .
 هيه . . ياترى زباين النهارده شكلهم أيه ؟ .
 (بدوى أفندى يرفع بصره عن الجريدة فيفاجئ
 بالشاويش عفيفى أمامه) .



بدوى أفندى : الله .. الله الشاويش عفيى . أهلا أهلا ..
بعمنا الكبير .

الشاويش عفيى: ومالك مضطرب كده قدام عمك الكبير (يجلس)
هو حد يضطرب قدام عمه الكبير إلا إذا كان
عامل عاملة ..

بدوى أفندى : عمله ! عملة آيه يا شاويش عفيى !
الشاويش عفيى: عملة آيه ! والله ما كان العشم يابدوى أفندى .
تخون أخوك عفف وتقتصر رقبتة أمام رؤسائه
دى رقبتى من البهدة بقت قد السمسة .

بدوى أفندى : آيه كلام الالغاز ده يا شاويش عفيى ؟
(لحظة صمت) .

الشاويش عفيى: يا حدق ! (السيد) هات واحد قهوة يا أبنى
فعدل به الدماغ . بقى الرأس أكبر رأس مطلوبة
تبقي قدامى . بتكلمنى . تحت أيدى . وتهربها
هنى . ماكانش العشم والله يابدوى أفندى أنك
تحرم أولادى من خسة جنيه . وتحرمنى أنا
صديقك . أخوك .. من قرشية وعلاوة ..

بدوى أفندى : أنا ؟ ..

(لحظة صمت)

الشاويش عفيى: لا والله . حدق ! هو برضه لسه معلم والا
ريس .. ؟

بدوى أفندى : هو مين ؟

(يسمع شخير بائع السجائر)

الشاويش عفيى: حنفى ! المعلم حنفى ! السريس حنفى ! ريس
النقابة يا حدق . باقول لك أنت حدق . لهوجت
الكلام امبارح ووزعتنى وهربتة . هربتة بقى على
فين ؟ دلوقت تقول لى ما أعرفش . ما تخونش
عمك الكبير مرة ثانية يا بدوى .

بدوى أفندى : فـ .. فـ .. فعلا ما أعرفش .

(سيد يحضر القهوة الى الشاويش عفيى

ويقف من بعيد مراقبا مجرى الحديث الذى بينه وبين بدوى أفندى) .

الشاويش عفيفى: لا .. حذق ! بقى ما تعرفش ؟ مسيرها برضه تنكشف وتبان .

بدوى أفندى : اسمع يا شاويش عفيفى . أنا ماليش دعوة بالحاجات دى كلها . أنا راجل غلبان وفى حالى وباجرى ورا لقمة العيش .. هه .. السلام عليكم ..

(بدوى أفندى ينهض قائما فى عجلة وارتياك . يتناول الجريدة من فوق المنضدة بسرعة فتتساقط منها المنشورات الى الأرض فيسارع الشاويش عفيفى الى تلقتها وتصفحها) .

الشاويش عفيفى: يا نهارك الاغبر . منشورات ! لا والله غلبان صحيح وفى حالك .. منشورات .. والله وقعت يا بدوى أفندى وعوضت لى الراس إالى هربتھا منى .. وكمان بتوزع منشورات النقابة (يمسك بخناق بدوى أفندى) والله وقعتك بتحز فى قلب عمك الكبير . لكن أعمل إيه . أنت اللى بدأت الغدر . وقعتك متلبس زى تاجر الحشيش تمام . (تموج المقهى بالحركة المصاخبة . بدوى أفندى يضطرب لدرجة كبيرة . المعلم شهده يدخل المقهى فى الوقت الذى يتلفظ فيه الشاويش عفيفى بعبارة «تاجر الحشيش») .

المعلم شهده : (صارخا) حشيش ! بقى حضرته طلع بيناجر فى الحشيش . (أم خليل تطل من النافذة تستجلى الخبر) .

أم خليل : كفى الله الشر ! إيه الحكاية ؟

المعلم شهده : (فى هدوء متصنع) ولا حاجة .. بدوى أفندى طلع تاجر حشيش .

الشاويش عفيفى: أسخم من الحشيش .. أم خليل : حشيش !

(أم خليل تولول صارخة وتفادى منزلها الى الحارة حيث بدوى أفندى) .

أم خليل : يا مصيبي .. يادهوتى .. حشيش ! .. اهو ده اللى كان ناقص .

سيد : حشيش ايه يا أم خليل .. دى منشورات النقاية ..

احدروادالمقهى : (يردد لا شعوريا) حشيش فى منشورات .

المعلم شهده : انت فىن يا ناشد افندى . كنت عمال بتسألنى على تجارة بدوى أفندى .. اهو .. بدوى أفندى طلع تاجر حشيش .

أم خليل : (صارخة فى المعلم شهده) حشيش يحشوا به لسانك تلائيك انت اللى مبلغ عنه .

المعلم شهده : الله يسامحك . تصدقى بالله . انت صعبانه على ..

أم خليل : ولا يكون عندك فكر ياسى بدوى أفندى . والله لاجر لك اكبر بريند فى ابوكاتية يجرى عليك . (الشاويش عفيفى يقود بدوى أفندى الى خارج الحارة) .

بدوى أفندى : فكرتبنى (يبحث فى جيوبه ثم يخرج كارتا) خدى الكارت ده .. صاحبه أبو كاتو .. الاستاذ سليم بكر المحامى .. قابلى امبارح فى ميتم العمدة .. روحى له . اوعى تنسى . العنوان مكتوب على الكارت يا أم خليل . (الشاويش عفيفى وبدوى أفندى يختفيان عن المسرح وخلفهما سيد وأم خليل تولول . الضجة تملأ الحارة والمقهى .. المعلم شهده منبسط الاسارير . بائع السجائر يمد ذراعيه سائلا المسارة بصوت متثائب . وكلمة حشيش تتداول بين أهل الحارة) .

صوتبائعالسجائر: حشيش ! .. حشيش ايه اللى مسكوه .

أجدروادالمقهى : حشيش منشورات •
صوتبائعالسجائر : (بدهشة) منشورات ! غريبة ! عمرى ماسمعت
على الماركة دى ..

(ستار)

المشهد الثانى

الأزمان ... بعد خمسة عشر يوما . قبل الظهر .

المكان — نفس المكان السابق .

(أم خليل تطل من نافذة بيتها) •
أم خليل : (تحدث نفسها) يا اخواتى الواحد ما بقاش
طابق هدومه خلاص . خمستاشر برم وانت غايب
عن نن عيني يا سى بدوى أفندى • خمستاشر
يوم .. هو سيد راح فين بس ؟
(سيد يدخل لا هنا الى المقهى) •
أم خليل : سيد ! كنت فين من الصبح ؟
سيد : كنت باشوف ناشد أفندى مابجيش القهوة ليه •
المعلم عاوزه بقاله يومين • طلع روحى (مقلدا
صوت ناشد أفندى) عايزنى ليه ؟ القهوة فيها
ودان ؟ حصل كبسه جديدة ؟
أم خليل : قطيعه تقطع المعلم وناشد أفندى فى ساعة
واحدة • فيه أخبار يا سيد من الحكم ؟
سيد : لسه • أهو احنا مستنظرين • ان شاء الله

خير . المعلم راح الحكمة مع عمال النقابة .
 ماهو لنا قبضوا على الرئيس حنفى خطوه مع
 بدوى أفندى فى قضية واحدة . عم موسى هناك
 كمان . تعرفى وأنا جاى قابلت مين ؟ .. العمال !
 واخدين المزيكة معاهم . حالفين ليزفوا الرئيس
 وزمائلهم لو طلوعوا افراج .
 : على الله يا سيد ياما نفسى كده المزيكه تدق
 فرايحي النهارده . ربك قادر يفرج كربة كل
 مظلوم (وهى تختفى من النافذة) يا رب عدلها
 بقى .

أم خليل

(سيد يستحضر سلما ويضعه أمام المقهى .
 عم موسى يظهر وقد أثقل التعب حركات سيره .
 يجلس على مقعد بالمقهى يتحسس قدميه
 برفق) .

(هاتفا من فوق درجة السلم الاولى) :
 عم موسى ! خير ان شاء الله (يهبط الى الارض)
 : خير . خير . بس الحقنى بكوب ماء ساقع .
 احسن ريقى نشف (سيد يسرع باحضار كوب
 ماء) .

: الكالو تاعبنى جدا يا سيد . زبون امبارح مشيت
 وراه ولا عشرين كيلو . يظهر انه كان غاوى فمسح
 الله يرحمه ومشوار النهاردة بتاع بدوى أفندى
 جاء واكمل . اما حقة دين كالو .

: كالو ايه يا عم موسى ! الحكم .. الحكم ؟
 : ماهو صدر .. الحكم صدر .

: بيايه ؟

: بالافراج .

: عن بدوى أفندى ؟

: عن بدوى أفندى . انما الكالو .. .

: (مقاطعا) والرئيس حنفى .

: والرئيس حنفى . وكل المقبوض عليهم .

سيد

عم موسى

عم موسى

سيد

عم موسى

سيد

عم موسى

سيد

عم موسى

سيد

عم موسى

سيد : (مهللا وغير ملق بالا الى طلبات رواد المقهى)
طبيب ومستثنى ايه من الصبح يا عم موسى ؟ يا ست
أم خليل . . يا ست أم خليل (أم خليل تطل من
النافذة) .

أم خليل : جرى ايه يا سيد . خير ان شاء الله .
سيد : الحكم يا ست أم خليل . الحكم . افرجوا عن
بدوى افندى .

أم خليل : خرجوه !

(أم خليل تطلق الزغاريد . وتختفى من النافذة)
سيد : ايوه خرجوه . يا نهار زى بعضه يا اولاد .
خرجوهم !

عم موسى : خرجوهم ايه يا سيد . هو حد لاقيههم .
سيد : حد لاقيههم ! ده افراج . زمانهم جايين وبالمزيكه
كمان .

عم موسى : هم مين دول ؟
سيد : سبحان الله . جرى لك ايه يا عم موسى بدوى
افندى والرئيس حنفى وكل الجدعان . موسى
بتقول افراج .

عم موسى : انت راجل طبيب قوى . وعلى نيائك يا سيد .
هو لاجل الحكم صدر بالافراج بيقى خلاص .
أهو الحكم صدر من هنا وهم اختفوا من هنا .
فصوص ملح ودابت .

سيد : اختفوا ! كلام ايه ده يا عم موسى .

عم موسى : حلمك على . يا سيدى عساكر السجن دخلوا
بيهم المحكمة . شوية وجاء القاضى . شاب شهيم
ويشرب مريع شرب القهوة فى غرفة المداولة .
وبعد قليل فتح الجلسة قضية بدوى افندى
والرئيس حنفى كانت نمرة تسعة . تصور أن رول
المحكمة كان فيا واحد وعشرين قضية . كل قضية
فيها تسع . . عشر متهمين بالقليل . كلهم شباب
يا سيد . الواحد منهم يالف راجل !

سيد : (مقاطعا) هيه .. المهم يا عم موسى . هيه ..
عم موسى : القاضى بعد السؤال ومرافعة الاستاذ سليم نطق
بالحكم .

سيد : (مقاطعا بعصية) هيه . عملوا ايه بيهم بعد
الحكم ؟

عم موسى : خدوهم العساكر . على قسين ياجماعة ؟ على
التيابة . حصلونا على التيابة . حاضر . رحنا
التيابة . النياية قالت لنا روحوا القسم . رحنا
القسم . القسم قال لنا روحوا المحافظة .
المحافظة قالت روحوا السجن . رحنا السجن
السجن قال ...

سيد : (مقاطعا) يا نهار زى بعضه . وبعدين ؟
عم موسى : ولا قبلين . وعننا ورقعنا شوية مشاوير تيجي
بتاع خمس ست جنازات والله يا سيد . والكالو
أخذ ينقع على رجلى . تعبت . خدت بعضى
وجئت على هنا يمكن .. (هنيهة) . تعرف ياسيد
لو بدوى أفندى يخرج النهارده ؟

سيد : يخرج ! ... طبعا يخرج .

عم موسى : يا سلام ! ده احنا كنا نشتغل الليلة مع زبون
سنقع صخيخ . بائنا . بائنا رسقى يا سيد .
تعرف ! باليت نصفى احنا الاتنين على خمسة
جنيهات حنة واحدة .

سيد : حاجة غريبة . پكوتوش قبضوا عليهم تانى ..؟! :

أم خليل : (أم خليل تهبط الى الحارة في أبهى زينتها . ترتدى
الملءة السوداء وتطلق الزغاريد) .
سيد : يا الله يا سيد نروح نجيب بدوى أفندى . احنا
في ديك النهار .

سيد : (متلعثما) آه يالله . يالله بس ..

أم خليل : مالك يا سيد . بتبسبنس ليه ؟
سيد : بس . قصدى . ماتقول لها يا عم موسى
عم موسى : أصل الحكاية يا نست أم خليل أن الحكيم صدر

فعلا بالافراج . لكن التنفيذ بصراحة لم يتم

لان . . .

: (مقاطعة) لم يتم ! يطلع ايه النبى حارسه ده
اللى لم يتم .

: عم موسى قصده يعنى ان بدوى افندى والجدةان

تاهوا . تاهوا بين البوليس والنيابة والمحكمة . .

: تاهوا ! ياندامتى ! دول رجاله . كل راجل له

اسم وجسم . . يتوهوا ازاي ؟! يا ترى توهوك

فين يا سى بدوى افندى .

: (ام خليل تصرخ مولولة فتثير انتباه عم موسى)

يحاول تهدئتها) .

: جرى لك ايه يا سيد . من الذى قال انهم

تاهوا ؟ يا ست ام خليل اطمئنى لا تاهوا ولا

حاجة .

: امال ايه بقى ؟

: اصل الحكاية وما فيها ان الافراج مشروط

بكفالة . ندفع الكفالة يخرج بدوى افندى على

طول . هو دلوقت فى السجن . وانا جيت هنا

علشان نشوف نقدر ندفع والا . . .

: (مقاطعة) وتطلع كام الكفالة دى ؟

: عشرة جنيه !

: عشرة جنيه !

: ورقة بمادنه !

: آه يانى . لو كانوا ستة جنيه . كنت جريت

دفعتهم على طول . هم اللى حيلتى وديلتى فى

الدنيا .

: طيب عال . فرجت . معك ستة جنيه . وانا

معى لبدوى افندى تلاته جنيه وستين قرش

نصيه فى . . فى الشركة . خلاله عن الخمستاشر

يوم اللى غابهم واشتغلت فيهم وحدى . النصف .

النصف تمام . الحق كده .

ام خليل

سيد

ام خليل

عم موسى

سيد

عم موسى

ام خليل

عم موسى

ام خليل

سيد

ام خليل

عم موسى

أم خليل : والنبي شرك الحق طول عمرك يا عم موسى .
 بيتوا كام ؟ تسعة .. تسعة جنيه وستين قرش .
 فاضل يا سيدى ..

سيد : (مقاطعا) ولا فاضل ولا حاجة . أدى الكماله .
 أربعين قرش أهيه .

أم خليل : ابن أصل يا سيد . هات . ويالله بينا نشترى
 سى بدوى أفندى بالعشرة جنيه العمى . فداه
 الكفالة . وأم الكفالة وأبو اللى خلفوا أم الكفالة
 (تزغرد فرحة) .

سيد : مابلأش هيصة امال . ويالله بقى انت وعم موسى
 على السجن . يادوب تلحقوا تدفعوا الكفالة .
 احسن موسى قادر أسيب القهوة .

عم موسى : (وهو ينهض مثاقلا) الكالو ..
أم خليل : كاروا ! لا وحية اللى سوانى وليه . ما يخطى
 الحقة الا فى عربية حنطور . كارو ! كارو ايه
 يا عم موسى . ده تاجر قد الدنيا .

(يسمع شخير بائع السجاير . عم موسى وأم
 خليل يفادران الحارة . سيد يتسلى درجات
 السلم ويشرع فى نزع لافتة المقهى) .
 (ناشد أفندى يقد الى الحارة فى نفس الوقت) .

ناشد أفندى : سيد .. يا سيد . الرجال بتاع السجاير لسه
 برضه بيشخر ! ايه الحكاية ؟ مالك متشعل
 كده ؟ أمال مين المعلم ؟ هو لسه مارجعش من
 الفدا والا ايه ؟

سيد : (من فوق السلم) لا . المعلم خطف رجله فى
 مأمورية وجاى حالا . قهوة سكر ثنوية برضه ؟

ناشد أفندى : لا . خليها ساده . أهل ايه فى السكر . همد
 جتنى هو وجمعية التناولة بتوع المعاش . تصدق
 بالرب يا سيد ..

سيد : (مناديا) واحد سادة مستعجل مخصوص .
 (سيد ينتهى من نزع اللافتة ويبدأ فى انزالها
 ويتركها فى جانب من المقهى) .

ناشد أفندى : يا الطاف الرب ائت منزل الياطرة ليه ؟ ماتقول
لى ايه الحكاية ؟

سيد : أوامر المعلم . باينه عايز يغير الاسم .
ناشد أفندى : يغير الاسم ؟ اسم القهوة . ومناسبتة ايه ؟
طيب ويخليه ايه بقى باذن الرب ؟
سيد : أنا عارف . كنت سامعه مرة بيتقول قهوة العمال
ومرة تانية ...

ناشد أفندى : (مقاطعا) العمال ! بقى من الملوك للعمال
خبط لرق .. من الملوك للصناعية . تصدق
بالرب . المعلم بتاعك طلعت فى مخه تخاريف
ولا تخاريف سى صاحبك بدوى أفندى .

سيد : موش أفرجوا ده هو الرئيس حنفى بكفالة .
وكل الجماعة . دول صحيح طلعا جدمان نمام .
المعلم نفسه بيقول كده .

ناشد أفندى : جدمان ! هو دخول السجن يبقى جدمان لا هيه .
المهم . قل لى المعلم حاشرف أمتى باذن الرب .
أحسن أنا ورايا التماس للوزير لازم أخلصه على
العصرية . هو من حق عايزنى ليه ؟

سيد : الله أعلم يا ناشد أفندى أهو زمانه بجاي . ويقول
لك بنفسه . أصله راح مع عمال النقابة يجيبوا
الجدمان بالمزيكه .

ناشد أفندى : بالمزيكه ! الراجل ده جرى لعقله ايه لا هو موش
عارف انه بالأعمال دى بيتحدى حكومة صاحب
الجلالة هو يعنى فاكتر نفسه قد الحكومة .

سيد : حكومة صاحب الجلالة ! هى يعنى كانت حكومة
ربنا . ماهى اللى بدت وهانت المعلم . الله الله
على الجد . بقى البوليس يجرجره مرتين .
فى المرة الاولانية يطعوه ساعتين ويأخذه
تحرى . وفى المرة الثانية يحبسوه يوم ونص من
غير أيها سبب .

ناشد أفندى : من غير أيها سبب ! موش ممكن . دى حاجات

رسمية . ميري . انت ما تعرفش الميري . لازم
يبقى لها سبب . ايها سبب .

: قال ايه فاتح القهوة قعدة للعمال ! والصول
يضره على قفاه قدام كل رجالة الحنة في حوش
القسم . وموش عايزه يتنفس يا ناشد أفندي .
أهو ماشى مع الرئيس حنفى والنقابة . هم اللى
بهدلوا الصول علشانه آخر بهدلة .. موش تقول
لى صاحب الجلالة .

ناشد أفندي : أقول لك ايه بس . انت والمعلم بتعاك . انتم
ماتعرفوش الحكومة دى زى أنا . دى قوية
قوى . ورأسها ناشفة قوى . اسألنى أنا .
خمس وأربعين سنة خدمة . السنة سنة .
تصدق بالرب . أنا لما كنت ريس قلم الارشيف ..
(يدخل عامل الى المقهى ويتجه الى سيد) .

العامل
سيد
العامل
(باستفهام) الأسطى سيد ؟
نعم . أى خدمة . محسوبك سيد .
أنا من عند الخطاط . المعلم شهده فات علينا
علشان نيجى ناخذ الياقطة ونكتب عليها الاسم
الجديد .

سيد
سيد
: اتفضل آهى متلحة جنب الباب .. بالله ياعم
الفمها وخلصنا منها (العامل يرفع الالفة) .
: ما تقعد شوية نجيب لك واحد شأى ..
ولا كازوزه ؟!

العامل
سيد
: تشكر يا أسطى سيد . لازم أروح بالياقطة على
طول لحسن المعلم عايزها تخلص بسرعة .
: وعلى كده امتى حاجتنا الياقطة الجديدة لحسن
القهوة من غير ياقطة مالهائش طعم ولا روح .

العامل
سيد
: باذن الله على المغرب .. سلام عليكم .
(العامل يرفع الالفة تماما ويذهب بها) .
: مع السلامة .. بس اتوصوا بيها وخلوها كده
منورة وملمعة على الآخر ..

ناشد أفندى : (وهو يراقب سيد وعلامات الضيق بادية على وجهه) ملفلة ! بكرة تطلع فوق دماغكم باذن الرب . هي الدنيا جزى لها إيه بس !؟ لسه ويا ما حاشوف :

(يسمع عزف موسيقى شوقية تصاحبه ضجة بشرية وزغاريد نسائية .) **تترب الضجة شيئا فشيئا . ناشد أفندى بنصت متسمعا . بسيد يجرى الى أحد منافذ الخارة مستظلا .**

سيد : يا نهار زى بعضه ! المزيكه بتدق . أهم وصلوا . بدوى أفندى هناك أهه والريس حنفى الله . . الله . . المعلم بتاعنا قايد الزقه . الله . مالهم وقفوا . آه . العمال بتحبي .
(ناشد أفندى يتهيا للكتابة) .

ناشد أفندى : هيه لعب عيال . أما نخلص شغلنا (يقرأ من ورقة أمامه قراءة غير واضحة ثم يشرع في الكتابة) وهذا هو الالتباس الجادى عشر . نرفعه اليكم بكل أجلال واحترام وخشوع يا معالى الوزير .
(مستطردا) باه ! أم خليل وشها نور . ونزله **سيد :**

زغاريد مسكين عم موسى . التعب باين عليه قوى . التبت . التبت . التبت (يرقص على أنغام الموسيقى التي تأخذ في الابتعاد شيئا فشيئا)
الله ! هم رايعين على فين ؟ آه . ناحية المصنع . المعلم ماشى معاهم زى الاسد . وآندى بدوى أفندى جاى مع عم موسى وأم خليل .

ناشد أفندى : (يستمر في الكتابة) ونحن نلتهمس من معاليكم أن نثظروا بعين العطف والرحمة .

(بدوى أفندى يظهر في الحشارة مع أم خليل وعم موسى)

سيد : بدوى أفندى !
سيد : سيد . . أبو السيد .
(سيد وبدوى أفندى يتعانقان طويلا . عم موسى

يسرع بالجلوس على مقعد متحسسا قدمه في ألم
واضح . ناشد أفندي يكف عن الكتابة . ويتطلع
الى بدوى أفندي يسمع واضحا شخير بائع
السجاير) .

بعض رواد المقهى : حمد الله على السلامة يا بدوى أفندي .
آخرون : مبروك .

بدوى أفندي : الله يبارك فيكم يا جدعان . ناشد أفندي !
سلامات . ازاي الصحة ؟!

ناشد أفندي : (ماخوذا لمبادرة بدوى أفندي بتحيته)
نحمد الرب . ا . . ازيك انت . باذن الرب تكون
دي آخر مرة .

بدوى أفندي : آخر والا أول . السجن اليومين دول شرف .
والله سلامات يا أبو السيد . سلامات .
(بدوى أفندي وسيد يتعانقان مرة أخرى) .

ناشد أفندي : (متافقا بصوت خفيض) شرف ! السجن شرف !
(يعود للكتابة) .

(أم خليل تتطلع الى مدخل الحارة بانتباه ثم
تصرخ) .

أم خليل : الله . . بسم الله الرحمن الرحيم . موسى هو
ده الاستاذ سليم اللي جاي هناك ده ياسى بدوى
أفندي آه . . والنبي هو . أهلا وسهلا . .
(الاستاذ سليم يدخل الى الحارة) .

بدوى أفندي : كرسى للاستاذ يا سيد . اتفضل . اتفضل .
سيد : كرسى ! كراسى القهوة كلها . خطوة عزيزة
يا استاذنا .

(سيد يقدم كرسيا للاستاذ سليم)

الاستاذ سليم : هه . . مبسوطة بقى يا ست أم خليل . أهو بدوى
أفندي رجع تاني . ملكنتيش مصدقة .

أم خليل : البركة فيك يا استاذ . رديت للحته نورها اللي
كان مطفى .

بدوى أفندي : أم خليل !!

أم خليل : أسيبكم بعافيه . أحسن الشغل يعمد عنكم
متكوم على فوق .

أصوات : مع السلامة .
الاستاذ سليم : آمال فين الرئيس حنفي ؟
بدوى أفندي : وصل لغاية المصنع علشان يقول للعمال على
اجتماع الليلة . وجاى .

الاستاذ سليم : هيه .. وانت استقرت وناوى زى ما قلت فى
السجن والا ...

بدوى أفندي : (مقاطعا) الا ايه يا استاذ ؟ طبعا ناوى . همرك
شفت واحد أعمى يفتح ويرجع يطلب العمى
تاتى ؟

الاستاذ سليم : يمكن نور كلويات الميامن يزغلل عينيك تاتى ..
ويمكن ...

بدوى أفندي : (مقاطعا) يمكن ! شوف يا استاذ سليم .
الخمسة وتلاتين سنه اللي ضاعوا من عمرى
كوم . والخمستاشر يوم بتوع السجن ده كوم
تاتى .

عم موسى : يا سلام !
بدوى أفندي : وحياء معزتك عندى زى ما بقول كده يا عم
موسى . طيب اقول لك حاجه . مثلا يعنى مثلا ..
همرك شفت واحد يدخل السجن ويخرج مبسوط
منه ؟ !

عم موسى : مافيش غير المجانين .
بدوى أفندي : يبقى المجانين وأنا . أنا دخلت السجن نفسى
مسدودة من الدنيا واللى فيها . وخرجت من
السجن النوبه دى والدنيا .. اقول لك ايه بس
(هنيهة) الدنيا حلوه فى عيني ويتضحك فى وشى
كمان والناس . الناس كلهم بقوا بنى آدميين .
شوف أنا كنت باكره أبو سبحة فالصو وروباكية
الدولة قد ايه ؟ صدقنى لما اقول لك السجن
وأهل السجن وجدعان السجن بخروا الكره

من قلبى . ماعدش له أثر .. دول طلعوا غلابه

زيننا ..

: ده لازم كان سحر موش سجن ، اللى عمل فيك

العميل دى ..

: يا خالق الكون يا سيد ! احنا كنا عشرين .

عشرين زميل . موش كده يا استاذ .. عشرين

فى زنزانة واحدة .. من كل مله وشغله . اللى

مسلم . واللى مسيحي واللى .. واللى دكتور

واللى محامى واللى عامل واللى طالب . واللى

زى حالاتى لا شغله ولا مشغله .

: (محتجا) لا شغله ولا مشغله ازاي ؟

: لا ! العفو ؟ . تاجر . تاجر قد الدنيا زى ما ام

خليل فاهمه . احنا حانضك على بعض يا عم

موسى .

: بدوى أفندى !

: ماتخافش . الاستاذ سليم مابقاش غريب . ده

خلاص عرف البير وغطاه .. تعرف تجارتنا دى .

اقول لك ايه بس ؟ هى والسرقة واحد .

: (محتدا) سرقة ؟

: (بانفعال شديد) وحياة راسى وراسك سرقة ..

الحرامى من دول يمد ايده يسرق الخزنه ..

المحفظة .. الغسيل .. واحنا بنسرق قلوب

الناس وطبيعتها بدموع مزيهه .. زى الفلوس

الرصاص .. برانى ..

: (مأخوذا) برانى !

: غم موسى

: بدوى أفندى

: طبعا برانى .. الدموع الحقيقية يا موسى ،

عمرها ما تخرج من العين بس . دى بتنزل من

القلب . أنا .. أنا عن نفسى مش تاجر دموع .

أنا .. أنا حرامى .. كنت باسرق نفسى وعمري

وعفيتى و ... والناس الطيبين . اسكت ..

اسكت يا موسى . دى مش شغله . الشغل

سيد

بدوى أفندى

عم موسى

بدوى أفندى

عم موسى

بدوى أفندى

عم موسى

بدوى أفندى

غم موسى

بدوى أفندى

عرق وانتاج . موش كده يا استاذ ؟ . . الشغل
حاجه تانيه .

عم موسى : تانيه والا تالتيه . احنا لقينا شغل تاني
وما اشتغلناش ؟

الاستاذ سليم : امسك ! اهى دى المسالة .

عم موسى : مسالة ! مسالة ايه يا استاذ . انا موش فاهم

حاجه ابدأ من كلامكم . انتم زى اللى بيتكلمون
باللاوندى . تقول لى مسالة . مسالة ايه ؟

الاستاذ سليم : مسالة الشغل . لازم كل واحد منا . أنا وانت

وبدوى أفندى وسيد وناشد أفندى وام خليل .

وكل البنى آدمين اللى زينا يبقى لهم الحق فى

الشغل . الحق فى راحه الحق فى . . .

بدوى أفندى : (مقاطعا فى حماس) فى جوازہ . الحق فى جوازہ .

الحق فى بيت . الحق فى قعده على القهوه . الحق

فى شيشه .

ومن الذى يعطيك هاذہ الحق ؟

عم موسى

(بدوى أفندى لا تسعفه الإجابة فيضطرب .

يرسل نظرات نجدة الى الاستاذ سليم) .

الاستاذ سليم : الحق مالوش رجلين يجيك لغاية البساب ،

يخبط . تقول له مين . يقول لك أنا الحق .

تقوم تفتح له وتأخذه بالحضن . لا . الحق لازم

تأخذه أخذ .

أخذه ! أخذه ازای ؟ أخطفه يعنى ؟ بقى هاذہ

عم موسى

كلام يا ناس . الدنيا قسم ونصيب يا استاذ .

والكتوب للبنى آدم هو اللى يجرى له . فلان

ملك (يشير الى القصر) فلان غفير . فلان وزير .

فلان شحات . المعلم شهده صاحب قهوه . سيد

صبى قهوه . جناب حضرتك ابوكاتو . وأنا وبدوى

أفندى على باب الكريم . ارادة الله . ملكه واحنا

عبيده يتصرف على هواہ .

الاستاذ سليم : ودخله ايه فى الموضوع ده ؟

بدوى أفندى : أيوه صحيح . ربنا دخله ايه فى الموضوع ده !
عم موسى : استغفر الله فى قلبك . وبعدين معاك يا بدوى

أفندى . ربنا هو اللى كتب عليك الفقر والستر .
وكتب على غيرك الفنى يا أخى .

بدوى أفندى : يا خالق الكون . يا ناس ماتصدقوش حاجه من
دى ده كله تزوير فى تزوير . كله وحياتكم علشان
مانفتحش بقنا . علشان نفخبل كده مقربطين من
غير رباط . تعرغوا ليه ؟

عم موسى وسيد : (فى وقت واحد) ليه ؟

(بدوى أفندى يتبادل النظرات مع الاستاذ سليم
الذى يشجعه على مرأصلة الحديث) .

بدوى أفندى : أقول لكم ليه . الحكاياه انه . لا . لابد أحكى لكم
من الاول . شوفوا . الشعب فى كل بلد .

أيها بلد . هو صاحب كل شىء . كل حاجه .
والحكومہ زى ما تقولوا وكيله منه . والوكيل

لازم يسمع كلام الاصيل . فاذا لم يسمع . .
(تترامى الى الاسماع جلبة المعلم شهده ثم

دخوله مع بعض العمال . يضع صوت بدوى
أفندى فى الجلبه فلا يسمع) .

المعلم شهده : اتفضلوا . اتفضلوا . اعملوا قعده . اعملوها
وقفه . القهوه قهوتكم . ويا عوازل فلفلوا .

اتفضلوا . الرئيس حنفى جاى على طول . كراسى
هنا يا سيد (يلحظ ناشد أفندى) ناشد أفندى !

مرحب . تصدق بالله . انت نورت القهوه . كنت
مين يا راجل من زمان ؟

ناشد أفندى : (وهو يصافح المعلم شهده) الدنيا ! الدنيا
مشاغل وهموم .

المعلم شهده : كلك حكم يا ناشد أفندى . حقہ الدنيا صحيح
مشاغل وهموم . لكن الجدع بقى هو اللى

ما يطاطى لها . تصدق بالله . هات الشيشه
وقهوه لناشد أفندى يا سيد . . أنا ن اليوم ونص

اللى تعدتهم فى النخشيه ، الناس الاكابر كلتها ،
 الدكتوراه والمحامين والتلاميذ وعمال النقابه
 شالونى فوق راسهم شيل . ده كان فيهم واحد
 اسمه الدكتور .. الدكتور ميلاد . يا سلام
 يا ناشد أفندى . شاب زى الورد . عليه شجعنه
 سبع و دماغ يتوزن بالذهب الحر . ولسمان
 منقوع بالسكر .

ناشد أفندى : الدكتور ميلاد ؟! ابن مين ؟

المسلم شهده : أنا عارف يا ناشد أفندى . ابن ناس ويس .
 تصدق بالله عايز الحكومه تداوى وتعلم وتلاقى
 شغل لكل واحد . كبير وصغير . هات الشيشه .
 هات يا سيد . الله .. هى الياقله خدها
 الخطاط ؟ من حق يا ناشد أفندى ايه رايك ؟
 طلع فى دماغى انى اغير اسم القهوه (المعلم
 شهده وناشد أفندى يتاملان مكان اللافته المنزوعة
 قليلا ويخفت صوتهما حتى لا يكاد يسمع .
 الاستاذ سليم ينهض للانصراف) .

الاستاذ سليم : (متطلعا الى ساعته) استاذن أنا احسن ورايا
 ميعاد فى المكتب . على العموم يا بدوى أفندى أنا
 منتظركم فى الاجتماع .

بدوى أفندى : (وسيد . وعم موسى . فى وقت واحد) مع
 السلامه .

بدوى أفندى : الاستاذ سليم ده محامى يملأ الدماغ بصحيح .
 عليه لسان يكهرب الجلسه من أول كلمه .
 هيه .. احنا بنقول فى ايه ؟

سيد : فى كلام زميل السجن . الدكتور ميلاد ..
 بدوى أفندى : آه فالسأله ماهياش مخلوقه كده . ولابد تفضل
 كده لا . لازم تدور على حقتك . لكن تدور عليه
 ازاي ؟

عم موسى : ازاي هاذه هو المهم ؟

بدوى أفندى : تمام ! هو ده المهم . انت لوحذك . وأنا لوحدى .
وهو لوحده . صفر . ولاحد فينا يوصل لحاجه .
تروح فين يا صعلوك بين الملوك والاتجليز
وأصحاب الارض ومال قارون ؟ هم فى ايدهم
القوة والمال والسلطة وكل شىء . مايفيش
بنى آدم لوحده يقدر يقف قدامهم . لكن بنى آدم .
مع بنى آدم . مع بنى آدم . كل الشعب لو اتحد .
لو اتكتل يقدر يقف ويأخذ حقه .
(مقاطعا) على رأى المثل . الكثره تغلب
الشجاعه .

بدوى أفندى : عليك نور . وادينى عقلك بقى . لما يكونوا
كتره وشجاعه وحق مع بعض ويصبحوا يوم
يلاقوا العمال والمحامين والفلاحين والدكاتره
والكناسين والطلبة والقهوجية و .. وكل البنى
آدميين يد واحدة .

سيد : والله كلام معقول . دول يسلموا على طول .
عم موسى : يسلموا ! دول ينفسوا على طول . دول يضربوا
على طول . ياعم خيلنا فى حالنا . قوم استريح
شويه يا بدوى أفندى . لاجل نبدا الشغل تانى .
أحسن النهارده لاجل بختك الحلو واقعين مع
زبون لكن ايه ؟ باشا رسمى .
بدوى أفندى : باشا رسمى ! ياعم موسى انت يظهر موش
فاهمنى كويس .

عم موسى : أقول لك الحق . كلامك ده كله لم يدخل دماغى
ابدا . هيه (ينهض) أنا رايع للحاتوتى أستقهم
عن عنوان ميثم الباشا . وراجع لك تانى لاجل
ترتب الشغل .. سلام عليكم مؤقتا .
(ينهض عم موسى . بدوى أفندى يرسل وراءه
نظرة آسفة طويلة) .

بدوى أفندى : يا خالق الكون . الواحد عايز يتمدد شويه .
أنا طالع أستريح . لما ييجى الرئيس حنفى أبقى
نادى على يا سيد .

(أم خليل تطل من النافذة وتختفى فوراً عندما تجد بدوى أفندى يغادر المقهى الى المنزل) .
سيد : (وهو يجيب في نفس الوقت على نداء أحد الزبائن) حاضر . أبوه جاى .

المعلم شهده : يا ناشد أفندى ! سيب العرايظ اللى فى ايدك دى شويه . وقل لى رأيك فى اسم القهوه الجديد دا انا باعت لك مخصوص علشان تكتب لى طلب للسجل التجارى بتغيير الاسم . تعرف . أنا جات لى فكره . لكن معتبره . نويت خلاص أسميها باسم الجدعان دول . ايه رأيك بقى ؟

ناشد أفندى : الجدعان ! وليه تغيير الاسم يا معلم ؟ تصدق بالرب . أنت ماشى فى سكه مانتاش قدها . حاتفضب فيها الحكومه . هو انت قد الحكومه ؟ يا راجل اوعى لمصلحتك . وسيك من الجدعان دول .

المعلم شهده : سبحان الله . وأنا مالى ومال الحكومه . يا ناشد أفندى . أنا عملت لها حاجه ! مسيتها بشىء لا سمح الله .. قهوتى وغيرت اسمها حد شريكى .. هو مين اللى بيقتد عليها وينفعنى ... الملوك ... والا الجدعان دول ؟ اهى دى مصلحتى عمرك شفت بسلامته صاحب الجلاله (يشير الى القصر) نزل من سرايته وجه قعد هنا وطلب شيشه حمى والا شيشه عجمى .
والا حتى واحد ياتسون !

ناشد أفندى : يا راجل افهمنى .. غير الاسم زى مانتا عايز . لكن استنى شويه لما الحكايه نارها تبرد . أصبر . أصبر يا معلم . تصدق بالرب . أهوا احنا بنكتب فى الألفاس الحداشر ولسه ماحصلش حاجه . لكن صابرين . الصبر يا معلم أحسن دوا .

المعلم شهده : الصبر ! والصبر أشخته مئين . دول قلعوا لى

خيال الصبر . دول مرطونى يا ناشد أفندى .
تصدق بالله . صول مسلوغ زى العصايه .
ي . . . يضرينى على قفايا . ويشتمنى قدام
اللى يسوى واللى ما يسواش . ويقول لى أنا . .
أنا المعلم شهده . آه يا شعب جربوع . أنا
سكت . لكن عدوك الجدعان هبوا فيه هببه
كانوا حايكلوه . دول ناس قوايم بصحيح .

ناشد أفندى : انت وخلصك . اهو أنا نصحتك والسلام .

انت مش قد الحكومه . تصديق بالرب أنا لما
كنت فى الحكومه رئيس قلم الارشيف . . .
(غاضبا) حكومه ! حكومه ! ايه الحكايه ؟ هى
كانت حماى ؟ هو أنا كنت اتجوزت بنتها .

(تبسو حماه المعلم شهده مجاه على ناضيه الحازه
ملقوفة بملاءة سوداء حتى لا يكاد يبين منها شىء .
شيد يلحمها فينبه المعلم) .

سيد : يا معلم . الست حماك .

(مزعجا) يا الطاف الله . حماى ! يا ريتنا جينا
سلمه حاجه طوه . ام خليل مثلا . لكن لا . .
بختى دايم مطين .

(المعلم شهده يقوم للاقاة حماته . ناشد أفندى
ينهمك فى كتابة الاتهامس) .

المعلم شهده : (لحماته) نعم . أفندم . طلبات السياده .

الحماه : (غاضبة) عاجبك كده يا دلعدى . نسوانك

الاثنتين الخناشير . يمسكوا بنتى فى الشارع

ويطولوا لسباتهم عليها .

(ناشد أفندى تبدو عليه علامات الدهشة نتيجة

الحديث الدائر بين المعلم شهده وحماته) .

ناشد أفندى : (همسا لنفسه) غريبه ! يبقى متجوز تلاته .

المعلم شهده : وحصل ده امتى ؟

الحماه : من ساعه يا دلعدى . خليك انت بس مزروع

طول النهار فى القهوه قدام شبك الخياطه .

المعلم شهده : (وهو يدفع جماته الى خارج الحارة)

يا وليه لي لسانك . يا وليه هو انت ايه . حكمه
تانيه ؟

(المعلم شهده وجماته يختفيان . ثم موسى يدخل
لا هنا) .

سيد : بدوى افندى راح مين ؟

عم موسى

فوق .

سيد

عم موسى

عال ! اما زبون الليله .. كثر .. تفزرف .
الحنوتى قال لى ان ميتمه يساع عشره يشتعلوا
عليه . فزجت .. فرجت وكنت اظنها لم تفرج .
بدوى افندى رزقه فى رجليه .

بس يا ترى حا يرضى يروح معاك بعدما ..

سيد

(مقاطعا) ما يرحش ليه ؟ سيدان الله . تحن
شركه يا اخى . انت يغرك كلامه . زمانه تبجر
فى الهواء . اسعفى بواحد على الريحه .
اسعفى .

عم موسى

(المعلم شهده يعود الى المقهى) .

المعلم شهده : يا لطيف الطف من التسوان .

ناشد افندى : تعالى هنا . يلف ايه ؟ انت يا راجل موسى
طول عمرك بتقول لى انك متجوز اتنين بس ؟

المعلم شهده : آه .

ناشد افندى : امال ام مراتك الاخرانيه بتقول دلوقت ...

المعلم شهده : (مقاطعا) تمام . ما هم بالعدد يطلعوا ثلاثه .
انما بقى ..

ناشد افندى : انما بقى ايه ؟

المعلم شهده : انما بقى فيهم واحده ، عدم المؤاخذه ، ماتحبش .

ناشد افندى : ماتحبش ليه ؟

المعلم شهده : مكسورة خاطر ، من غير ذرية . بالعربى

مابتخلفش . تتحسب ازاي بقى (ناهضا) الله !

الرئيس حنفى .

(يظهر الرئيس حنفى الجميع يرحبون به ترحيبا شديدا وخاصة العمال) .

المعلم شهده : نورت القهوه ياريس الجدعان . شوف طلبات الرئيس يا سيد .
الرئيس حنفى : تشكر يا معلم .

المعلم شهده : الشكر لله وحده ولكل الجدعان .
سيد : أهلا أهلا بريسنا . والله جيت سليمه غضبن عن حبابى عنين الشاويش عفيفى .

الرئيس حنفى : ألا ما جاش تاتى ؟
سيد : تاتى ؟ من يوم ما قبض على بدوى أفندى . رجله ماخطتش الناحيه دى . والله لو هوب لاقطعها له .

الرئيس حنفى : والله جدع طول عمرك يا سيد وشهم . ادبنى واحد مطبوط (يلتفت حوله) تعرفش بدوى أفندى راح فين ؟
سيد : فوق أندھولك (صارخا) يا بدوى أفندى . بدوى أفندى . (بدوى أفندى يطل من نافذة أم خليل وهو يهضغ شيئا من طعام فى فمه) .
سيد : الرئيس حنفى وصل .

(عم موسى يراقب بدوى أفندى قلقا . يهم بالحديث معه لكنه يحجم . المعلم شهده يفقر فمه وتبدو عليه علامات الضيق والاضطراب) .
الرئيس حنفى : انت بفاكل وألا ايه ؟ طيب خلص على مهلك . وأنا مستيتك هنا .

بدوى أفندى : أنا خلصت خلاص . يادوب اشطف ايدى وانزل لك على طول (بدوى أفندى يختفى من النافذة) .
المعلم شهده : (بحق شديد) شفت! شفت! المسخره دى يانشد أفندى . لا . ده زودها قوى . يقعد لها فى شقه واحده . ياكل ويشرب مع ست عازيه لوحدها . لا . ده مايرضيش حق ولا شرع . .
ناشد أفندى . أنا لازم أعزله .

ناشد أفندى : يا معلم !
المعلم شهده : لازم اعزله بتاع النسوان ده . حاخسر سمعة بيتى . لازم اعزله . يعنى لازم اعزله . ارقعه بقلبك الحيانى جواب مسوَجِر بالطرد بعدما تكتب لى طلب تغيير اسم لقهوة . والا أقول لك اكتب الجواب المسوَجِر الاول .

ناشد أفندى : صبرك . صبرك شويه لما أخلص الالتماس .
(بدوى أفندى يقول ضاحكا على الرئيس حنفى .)
 ويتصل بينهما حديث خافت ، تبدو جديته على وجهيهما . عينا عم موسى تتبعان بدوى أفندى كظله) .

المعلم شهده : تصدق بالله . أنا نفسى كانت بتقول لى قوم ياواد اطلع وارميه من الشباك . لكن له عمر . . قصر الشر ونزل . يالله يا ناشد أفندى فش غلى فى الجواب المسوَجِر .

بدوى أفندى : (يعلو صوته خلال الحديث) ما هو الاستاذ سليم قال لى على الاجتماع (تسمع جلبة شديدة فى الخارج . تقترب شيئا فشيئا . ينتبه الجميع لها . سيد يجرى الى أحد منافذ الحارة مستطلعا) .

المعلم شهده : (واقفا) ايه الزيتطه دى يا سيد ؟
سيد : أنا شايف لمة بوليس .

(ناشد أفندى يتوقف عن الكتابة) .

ناشد أفندى : بوليس !

المعلم شهده : بوليس !

الرئيس حنفى : بوليس !

بدوى أفندى : بوليس !

عم موسى : وانت مالك ومال البوليس يا بدوى أفندى . كفايه بقى وتعالى نلتفت لشغلنا .

(الجلبة تزداد اقترابا سيد يؤوب الى المقهى فزعا) .

سيد : الحق يا معلم . مهندس البلدية ومغاه البوليس
بيعانوا البيوت اللى حاتنهد علشان طريق
السرايه الجديد .

المعلم شهده : البيوت اللى حاتنهد ! بيوت مين يا وله ؟
(أم خليل تطل من النافذة . تفتح جميع النوافذ
ويطل منها أهل الحى مستطلعين . يظهر مهندس
البلدية ومعه جنود البوليس يحملون مجموعة من
الخرائط والأوراق المختلفة) .

المهندس : (لاحد جنود البوليس) اسأل لنا بيت مين ده ؟
العسكري : (مشيراً الى منزل أم خليل) ملك مين البيت ده ؟
المعلم شهده : ملكى أنا .

المهندس : طيب اسمع يا راجل . أخلى البيت ده من سكانه
وسلمه للبلديه فى ثلاث ايام .

المعلم شهده : أخلى واسلم ! ليه بقى ؟
المهندس : ليه ؟ انت نايم على روحك والا ايه ! بينك واقع
فى الطريق الجديد للقصر . لازم يتهد .

المعلم شهده : يتهد ! بيتى يتهد !

المهندس : طبعا يتهد . البيوت دى كلها حاتنهد .

أصوات : (متناثرة) تتهد ؟ !

أصوات أخرى : البيوت كلها ؟ !

ناشد أفندى : (بصوت خافت) البيوت كلها ! وحياء الرب ده

حرام ده ظلم (بصوت أكثر ارتفاعاً) اعمل التماس

يا معلم .

المهندس : التماس علشان ايه ؟ ده خلاص امر نهائى .

أم خليل : وده امر مين بقى يا ادلعدى ؟ !

المهندس : امر مولانا .

عسكري : مولانا الملك .

أصوات : (متناثرة) الملك .

(يبهت الجميع بحيث تسكن الحركة تماماً بضع

لحظات يسمع خلالها شخير بائع السجائر) .

الريس حنفى : يا عم ! لا ملك الا الله .

(الجميع ينظرون باعجاب مفاجيء الى الرئيس
حنفى ويهمهمون) .

عسكرى : بتقول ايه ؟
المعلم شهده : (صارخا بخنق) طيب على الطلاق بالتلاته من
نسوانى التلاته ما انا مطلع حد من البيت .
الملك ! لا ملك الا الله .

(تثور ضجة الناس المجتمعين بعضهم يردد عبارة
« لا ملك الا الله » فى انفعال . يتحركون فى غضب
غير منظم نحو المهندس والجنود الذين بيدأون
فى التراجع وقد أصابهم شيء من الخوف) .
عسكرى : اسمع منك له .

عسكرى آخر : اسمع يا جدع انت وهو . وانت يا مره (يشير
الى أم خليل) .

أم خليل : مره ! مره فى شداتك . امشى انجر من هنا .
عيب عليكم يا رجاله الحته نشتم وانتم واقفين ؟
(الناس تتحمس ضد ممثلى البلدية . فيزداد
تراجع هؤلاء امام ثورة أهل الحى . ثم يجرون
هاربين والقساء ترميهم بالقلل من النوافذ .
والاصوات تزار خلفهم « لا ملك الا الله » بدوى
أفندى والمعلم شهده وناشد أفندى والرئيس حنفى
يتبادلون نظرات ودودة) .

المعلم شهده : مستنيين ايه يا جدعان ؟ يالله وراهم لفساية
ما نطفشهم من الحته كلها . خليك انت ياناشم
أفندى علشان تكتب لى الجواب المسوجر .
وكمات طلب تغيير الاسم .

(المعلم شهده يتحرك ومعه بدوى أفندى والرئيس
حنفى . عم موسى يتعلق ببدوى أفندى) .

عم موسى : على فين يا بدوى أفندى ؟ ميعاد الشغل قرب .
ده باشا . باشا رسمى .

بدوى أفندى : (وهو ينفلت من عم موسى للحاق بأهل الحى)
لا مؤاخذه يا عم موسى موش حاقددر .

عم موسى : (وهو يرتقى مجهدا يائسا على أحد المقاعد)
موش حاتقدر ! اسعفنى بواحد على الريحه تاتى
يا سيد .

سيد : موش قلب لك . وعندك واحد تاتى على الريحه .
عم موسى : (هامسا) والشركة !
(الخطاط يحضر اللافتة الجديدة فيהל سيد
لقدمه) .

سيد : يا مرحب .. يا مرحب .. (وهو ينظر الى اللافتة
المواجهة ظهرها للجمهور) حاجه نظاجه خالص .
ايدك معايا نعلقها (سيد والخطاط ينهمكان فى
تعليق اللافتة التى تبين باسمها الجديد « قهوة
العمال » . الرئيس حنفى يعود مسرعا ويقف عند
محل بائع السجائر وينظر للافتة فى اعجاب .
يتحسرج شخير البائع امام صيحات الرئيس حنفى
يخرج البائع بجسده الضخم منزعجا وهو يفرق
عينيه) .

بائع السجائر : ايه الحكايه ؟ حصل ايه ؟ طبطة حشيش تاتى ؟!
الرئيس حنفى : حشيش ايه ياراحل ! هات سيجارتين هوليوذ
هات . خلينى الحق الناس . يا أخى اصحى بقى
وفوق . دى الدنيا حواليك بتغلى وتفور .
(الرئيس حنفى يفادر المكان مسرعا وهو يشعل
سيجاره . الضجة الشعبية لا تزال مسموعة)

ناشد أفندى : (وهو يكتب) ونخطر عزتكم بموجب هذا تغيير
اسم قهوة الملوك الى قهوة الف .. العمال
(يتردد لحظة ثم يهب واقفا ويقول بتأفف)
العمال !! وأنا ايه اللي يحسرنى فى اللخطة دى
هيه . (يمزق الورقة وينسحب من المكان) من
الملوك للعمال . بقى ده كلام . من الملوك
للصناعيه !! (سيد يقدم فنجان القهوة الى عم
موسى المتكور فى حسرة على مقعده ونظره معلق
باللافتة فى وجوم) .

مسيق : الله ! هو ناشد افندى راح فين ؟ تهوتك يا عم موسى

عم موسى : (وهو يقوم من مقعده كأنه يستيقظ من حلم مفرع)
أنا خلاص معدنش عايز حالجيه من ريحتكم .
خلاص ! . خلاص ! . آه . . الكالو !

(عم موسى يهت مفادرا المقهى متعبا وهو يشهد
قدميه شدا . يصطدم بعامل آت للمقهى في
ملابسه الزرقاء) .

العامل : واحد شاي بالحليب يا سيد .
سيد : حاسب على نفسك يا عم موسى . اوعى الباشا

يمشيك كثير أحسن الكالو يتغبك . (للعامل)
شاي بالحليب يا أوسطى ؟ (للنصبه في نداء
مرح) وعندك واحد شاي بالحليب ! . . لصاحب
الجلاله . .

(العامل يجلس بملابسه الزرقاء في استرخاء
واضعا ساقا على ساق في اعتزاز وثقة) .

« ستار »

قدمت مسرحية « قهوة الملوك » لأول مرة بالمرح القومى
بالقاهرة فى يناير ١٩٥٩ .
وصور الشخصيات :

- | | |
|--------------------|--------------------|
| ١ - شفيق نور الدين | فى دور بدوى افندى |
| ٢ - توفيق الدقن | » » المعلم شهده |
| ٣ - على رشدى | » » ناشد افندى |
| ٤ - فردوس حنين | » » ام خليل |
| ٥ - سعيد ابو بكر | » » سيد |
| ٦ - محمد السبع | » » الرئيس حنفى |
| ٧ - احمد الجزيرى | » » عم موسى |
| ٨ - محمد الدفراوى | » » الشاويشى عفيفى |
| ٩ - عمر الحريرى | » » الاستاذ سليم |
| ١٠ - لطفى الحكيم | » » المعزى رقم ١ |

مع مجموعة من خريجى وطلبة معهد الفنون المسرحية

صمم المناظر : الفنان عبد الفنى ابو العينين

الاخراج : نبيل الالفى

Bibliotheca Alexandrina



0602576

مطابع مؤسسة الأهرام